

舊唐書

三



唐書本紀卷第九

劉

時

筆修

聞人詮校刻沈炯同校

玄宗下

開元二十五年春正月壬午制朕猥集休運多謝哲王然而哀矜之情小大必慎自臨寰宇子育黎烝未嘗行極刑起大獄上玄降鑒應以祥和思協平邦之典致之仁壽之域自今有犯死刑除十惡罪宜令中書門下與法官詳所犯輕重具狀奏聞崇德尚齒三代丕義敦風勸俗五教攸先其曾任五品已上清資官以禮去職者所司具錄名奏老疾不堪釐務者與致仕道士女冠宜隸宗正寺僧尼令祠部檢校百司每旬節休假並不須入曹司任遊勝爲樂宣示中外知朕意焉癸卯道士尹愔爲諫議大夫集賢學士兼知史館事二月新羅王金興光卒其子承慶嗣位遣贊善大夫邢璣攝鴻臚少卿往吊祭冊立之壬子加宗正丞一員戊午罷江淮運停河北運癸酉張守珪

破契丹餘衆於榛祿山殺獲甚衆三月乙卯河北節度使崔希逸自涼州南率衆入吐蕃界二千餘里已亥希逸至青海西郎佐素文子觜與賊相遇大破之斬首二千餘級夏四月庚戌陳許豫壽四州開稻田辛酉監察御史周子諒上書忤旨擢之殿庭朝堂決杖死之甲子尚書右丞相張九齡以曾薦引子諒左授荊州長史乙丑皇太子瑛鄂王瑶光王琚並廢爲庶人太子妃兄駙馬都尉薛鏞長流瀼州至藍田驛賜死六月壬戌熒惑犯房至心星越度而過秋七月己卯大理少卿徐帖奏天下今歲斷死刑五十八幾致刑措烏巢寺之獄上特推功元輔庚申封李林甫爲晉國公牛仙客爲豳國公己卯勅諸陵廟並隸宗正寺其宗正寺官貲自今並以宗枝爲之九月壬申頒新定令式格及事類一百三十卷於天下冬十月制自今年每年立春日迎春於東郊其夏及秋冬如常以十二月朔日於正殿受朝讀時令十一月壬申幸溫泉宮丁丑開府儀同三司廣平郡公宋璟薨十二月丙午惠妃武氏薨追謚爲貞順皇后葬於敬陵吐蕃使其

大臣屬盧論莽藏來朝貢

二十六年春正月乙亥工部尚書牛仙客爲侍中丁丑親迎氣于東郊祀青帝制天下繫囚死罪流嶺南餘並放免鎮兵部還京兆府新開稻田並散給貧人百官賜勳絹長安萬年兩縣各與本錢一千貫收利供駟仍付雜駟天下州縣每鄉一學仍擇師資令其教授諸鄉貢每年令就國子監謁先師明經加口試內外八品已下及草澤有博學文辭之士各委本司本州聞薦二月辛卯以李林甫遙領隴右節度使甲辰禁大寒食以雞卵相饋送庚申葬貞順皇后于敬陵乙卯以牛仙客遙領河東道節度使辛酉廢仙州分其屬縣隸許汝等州三月己巳朔減秘書省校書正字官貢丙子有星孛于紫微垣中歷斗魁十餘日因陰雲不見己酉河南洛陽兩縣亦借本錢一千貫收利克人吏課役癸未京兆地震吐蕃寇河西左散騎常侍崔希逸擊破之鄯州都督杜希望又攻拔新羅城制以其城爲威戎軍夏四月己亥朔始令太常卿韋縉讀時令于宣政殿百寮於殿上列坐而聽

之五月乙酉以李林甫遙領河西節度使兼判梁州事庚寅幸咸宜公主宅六月庚子立忠王璵爲皇太子秋七月己巳冊皇太子大赦天下常赦所不免者咸赦除之內外文武官及五品已下爲父後者各賜勲一轉忠王府官及侍講加一階賜酺三日庚辰分越州置明州九月丙申朔日有蝕之庚子於舊六胡之地置宥州益州長史王昱率兵攻吐蕃安戎城爲賊所據官軍大敗昱棄甲而遁兵士死者數千人冬十月戊寅幸溫泉宮是歲渤海靺鞨王大武藝死其子欽茂嗣立遣使吊祭冊立之其冬兩京建行宮造殿宇各千餘間潤州刺史齊澣開伊婁河於揚州南瓜州浦析左右羽林軍置左右龍武軍以左右萬騎營隸焉

二十七年春正月乙巳大雨雪二月己巳加尊號開元聖文武皇帝大赦天下常赦所不免者咸赦除之開元已來諸色痕癰人咸從洗滌左降官量移近處百姓免今年租稅三品已上賜爵一級四品已上加一階宗廟薦饗自今已後並用宗子賜酺五日夏四月丁丑

廢洮州隸蘭州改臨州爲洮州乙酉太子少傅竇瑊爲開府儀同三司吏部尚書李嵩爲太子少傅丁酉侍中牛仙客爲兵部尚書兼侍中兵部尚書兼中書令李林甫爲吏部尚書依舊兼中書令以東宮內侍隸內侍省爲署五月癸卯置龍武軍官員先是鄆國公主之子薛諗與其黨李談崔洽石如山同於京城殺人或利其財或違其志即白日椎殺煮而食之其夏事發皆決殺於京兆府門諗以國親流瀼州賜死於城東驛六月甲戌內常侍牛仙童坐賊決殺之幽州節度使兼御史大夫張守珪以賄貶爲括州刺史太子太師徐國公蕭嵩以嘗賂仙童左授青州刺史秋七月辛丑癸惑犯南斗北庭都護蓋嘉運以輕騎襲破突騎施於碎葉城殺蘇祿威震西陲八月吐蕃寇白草安人等甲申制追贈孔宣父爲文宣王顏回爲兗國公餘十哲皆爲侯夾坐後嗣褒聖侯改封爲文宣公九月皇太子改名紹汴州刺史齊澣請開汴河下流自虹縣隋清至淮陰北合于淮逾時而功畢因弃沙壅舊路行者弊之尋而新河之水勢淙急遂填塞矣前

唐紀九
三
刑部尚書致仕崔德甫卒冬十月將改作明堂訛言官取小兒埋於明堂之下以爲厭勝村野童兒藏於山谷都城騷然咸言兵至上惡之遣主客郎中王侁往東都及諸州宣慰百姓久之定冬十月毀東都明堂之上層改拆下層爲乾元殿戊戌幸溫泉宮辛丑至自溫泉宮十二月東都副留守太子賓客崔沔卒以益州司馬章仇兼瓊權劍南節度等使是歲蓋嘉運大破突騎施之衆擒其王吐火仙送于京師

二十八年春正月兩京路及城中苑內種果樹癸巳幸溫泉宮庚子至自溫泉宮壬寅以望日御勤政樓譙羣臣連夜燒燈會大雪而罷因命自今常以二月望日夜爲之三月丁亥朔日有蝕之壬子權判益州長史章仇兼瓊拔吐蕃安戎城分兵鎮守之夏五月乙未太子少師韓休太子少傅李暹卒六月懷州刺史信安王緯爲太子少師庚寅太子賓客李商隱卒秋七月壬寅追尊宣皇帝陵名曰建初光皇帝陵名曰啓運仍置官負九月魏州刺史盧暉開通濟渠自石

灰巢引流至州城而西却涯魏橋九月庚寅封皇孫倬等十九人爲郡王冬十月甲子幸溫泉宮辛巳至自溫泉宮乙酉夜東都新殿後佛光寺災吐蕃寇安戎城十一月牛仙客停遙兼朔方河東節度使十二月乙卯突騎施酋長莫賀達于率衆內屬己未禮部尚書杜暹卒是歲金城公主薨吐蕃遣使來告喪其時頻歲豐稔京師米斛不滿二百天下乂安雖行萬里不持兵刃

二十九年春正月丁丑制兩京諸州各置玄元皇帝廟并崇玄學置生徒令習老子莊子列子文中子每年准明經例考試内外官有伯叔兄弟子姪堪任刺史縣令所司親自保薦禁九品已下清資官置客舍邸店車坊士庶輓葬三月吐蕃突厥各遣使來朝丙午風霾日色無影夏四月庚戌朔丙辰以太原裴伷先爲工部尚書韋虛心卒親王已下及内外官各賜錢令讌樂壬午以左右金吾大將軍裴寬爲太原尹北都留守秋七月乙卯洛水汎漲毀天津橋及上陽宮伏舍洛渭之間廬舍壞溺死者千餘人突厥登利可汗死北州刺史王

解斯爲幽州節度使幽州節度副使安祿山爲營州刺史克平盧軍
節度副使押兩番渤海黑水四府經略使九月大雨雪稻禾偃折又
霖雨月餘道途阻滯是秋河北博洛等二十四州言雨水害稼命御
史中丞張倚往東都及河北賑恤之壬申御興慶門試明四子人姚
子產元載等冬十月丙申幸溫泉宮戊戌分遣大理卿崔翹等八人
往諸道黜陟官吏十一月庚戌司空邠王守禮薨辛酉至自溫泉宮
己巳雨水冰凝寒凍列數日不解辛未太尉寧王憲薨謚爲讓皇帝
葬于惠陵十二月丁酉吐蕃入寇陷廓州達化縣及振武軍石堡城
節度使蓋嘉運不能守女國王趙曳夫及佛逝國王日南國王遣其
子來朝獻

天寶元年春正月丁未朔大赦天下改元常赦不原咸赦除之百姓
所欠負租稅及諸色並免之前資官及白身人有儒學博通文辭秀
英及軍謀武藝者所在具以名薦京文武官才堪爲刺史者各令封
狀自舉改黃鉞爲金錢内外官各賜勲兩轉甲寅陳王府叅軍田同

秀上言玄元皇帝降見于丹鳳門之通衢告賜靈符在尹喜之故宅
上遣使就函谷故關尹喜臺西發得之乃置玄元廟於大寧坊陝郡
太守李齊物先鑿三門辛未渠成放流二月丁亥上加尊號爲開元
天寶聖文神武皇帝辛卯親享玄元皇帝于新廟甲午親享太廟丙
申合祭天地于南郊例天下囚徒罪無輕重並釋放流人移近處左
降官依資叙用身死貶處者量加追贈枉法賊十五疋當絞今加至
二十疋莊子號爲南華真人文子號爲通玄真人列子號爲沖虛真
人庚桑子號爲洞虛真人其四子所著書改爲真經崇玄學置博士
助教各一員學生一百人桃林縣改爲靈寶縣改侍中爲左相中書
左右丞相依舊爲僕射又黃門侍郎爲門下侍郎東都爲東京北都
爲北京天下諸州改爲郡刺史改爲太守陝州河北縣爲平陸縣老
幼版授文武官三品已上加一爵四品已上加一階庚子平盧節度
使安祿山進階驃騎大將軍夏六月庚寅武功山水暴漲壞人廬舍
溺死數百人秋七月癸卯朔日有蝕之辛未左相國公牛仙客卒

八月丁丑刑部尚書兼御史大夫李適之爲左相丁亥突厥阿布思
及默啜可汗之孫登利可汗之女相與率其黨屈來降壬辰吏部尚
書兼右相李林甫加尚書左僕射左相李適之兼兵部尚書左僕射
裴耀卿爲尚書左僕射九月辛卯上御花萼樓出宮女讌毗伽可汗
妻可敦及男女等賞賜不可勝紀丙寅改天下縣名不穩及重名一
百一十處兩京玄元廟改爲太上玄元皇帝宮天下往此冬十月丁
酉幸溫泉宮辛丑改驪山爲會昌山仍於秦坑儒之所立祠宇以祀
遭難諸儒新成長生殿名曰集靈臺以祀天神十一月己巳至自溫
泉宮是歲命陝郡太守韋堅引澧水開廣運潭於望春亭之東以通
河渭京兆尹韓朝宗又分渭水入自金光門置潭於西市之兩衙以
貯材木是冬無冰其年天下郡府三百六十二縣一千五百二十八
鄉一萬六千八百二十九戶部進計帳今年管戶八百五十二萬五
千七百六十三口四千八百九十萬九千八百
二年春正月丙辰追尊玄元皇帝爲大聖祖玄元皇帝兩京崇玄學

改爲崇玄館博士爲學士三月壬子親祀玄元廟以冊尊號制追尊
聖祖玄元皇帝父周上御史大夫敬曰先天太上皇母益壽氏號先
天太后仍於譙郡本鄉置廟尊咎繇爲德明皇帝改西京玄元廟爲
太清宮東京爲太微宮天下諸郡爲紫極宮韋堅開廣濟潭畢功盛
陳舟艦丙寅上幸廣運樓以觀之即日還宮夏六月甲戌夜雷震東
京應天門觀災延燒至左右延福門經日不滅七月癸丑致仕禮部
尚書王丘卒丙辰尚書右僕射裴耀卿薨九月太子少保崔琳卒辛
酉譙郡紫微宮改爲太清宮冬十月戊辰太子太保信安王禕卒戊
寅幸溫泉宮十一月乙卯至自溫泉宮十二月己亥東京應天門改
爲乾元門戊申幸溫泉宮丙辰至自溫泉宮十二月乙酉太子賓客
賀知章請度爲道士還鄉是冬無雪

三載正月丙辰朔改年爲載赦見禁囚徒庚子遣左右相已下祖別
賀知章於長樂坡上賦詩贈之壬寅幸溫泉宮二月己巳還京丁丑
封讓皇帝男琳爲嗣寧王故邠王守禮男承寧爲嗣邠王讓帝男璿

爲嗣申王惠宣太子男珍爲嗣岐王瑱爲嗣薛王唐寅皇太子紹改
名亨是月河南尹裴敦復卒閏月辛亥有星如月墜於東南墜後有
聲京師訛言官遣梃捕人肝以祭天狗人相恐畿縣尤甚發使安之
三月庚午武威郡上言番禾縣天寶山有醴泉湧出嶺石化爲瑞甍
遠近貧乏者取以給食改番禾爲天寶縣癸酉制天下見禁囚徒死
罪降流流已下並原之夏四月南海太守劉巨鱗擊破海賊吳令光
求嘉郡平勅兩京天下州郡取官物鑄金銅天尊及佛各一軀送開
元觀開元寺五月戊寅長安令柳升坐贓於朝堂決殺之秋八月丙
午九姓拔悉密葉護攻殺突厥烏蘇米施可汗傳首京師庚申內外
文武官六品已下自今已後赴任之後計載終滿二百日已上許其
成考冬十月癸巳幸溫泉宮丁未改史國爲來威國十一月癸卯還
京癸丑每載依舊取正月十四日十五日十六日開坊市門燃燈求
以爲常式玉真公主先爲女道士讓號及實封賜名摘盈十二月甲
午分新豐縣置會昌縣甲寅親祀九宮貴神於東郊禮畢大赦天下

百姓十八已上爲中男二十三已上成丁每歲庸調八月起徵可延至九月詔天下民間家藏孝經一本

四載春三月甲申宴羣臣於勤政樓壬申封外孫獨孤氏女爲靜樂公主出降契丹松漠都督李懷節封外孫楊氏女爲宜芳公主出降奚饒樂都督李延寵秋八月甲辰冊太眞妃楊氏爲貴妃是月河南睢陽淮陽譙等八郡大水九月契丹及奚酋長各殺公主舉部落叛隴右節度使皇甫惟明與吐蕃戰于石堡城官軍不利副將褚直廉等死之冬十月於單于都護府置金河縣安北都護府置陰山縣丁酉幸溫泉宮壬子以會昌縣爲同京縣十二月戊戌還京

五載春正月癸酉刑部尚書韋堅貶括蒼太守隴右節度使皇甫惟明貶播川太守尋決死於黔中乙亥勅大小縣令並准畿官吏三選聽集禮記月令改爲時令封中嶽爲中天王南嶽爲司天王北嶽爲安天王天下山水名稱或同義且不經多因於里諺宜令所司各據圖籍改定丙子遣禮部尚書席豫左丞崔翹御史中丞王鉷等七人

分行天下黜陟官吏夏四月庚寅左相渭源伯李適之爲太子少保
罷知政事丁酉門下侍郎陳希烈同中書門下平章事五月庚申敕
今後每至旬節休假中書門下文武百寮不須入朝外官不須衙集
癸卯停郡縣差丁白直課錢六月勅三伏內令宰相辰時還宅秋七
月丙子韋堅爲李林甫所構配流臨封郡賜死堅妹皇太子妃聽離
堅外甥嗣薛王瑒貶夷陵郡別駕女壻巴陵太守盧幼臨長流合浦
郡太子少保李適之貶宜春太守到任飲藥死八月以戶部侍郎郭
虛已爲御史大夫劔南節度使九月壬子於太清宮刻石爲李林甫
陳希烈像侍於聖容之側冬十月丁酉幸溫泉宮改臨淄郡爲濟南
郡十一月己巳還京十二月辛未贊善大夫杜有隣著作郎王曾左
驍衛兵曹柳勣等爲李林甫所構並下獄死

六載正月辛巳朔北海太守李邕淄川太守裴敦復並以事連王曾
柳勣遣使就殺之丁亥親享太廟戊子親祀圜丘禮畢大赦天下除
絞斬刑但決重杖於京城置三皇五帝廟以時享祭其章懷節愍惠

莊惠文惠宣等太子宜與隱太子懿德太子同爲一廟每日立杖食及設杖於庭此後並宜停廢五嶽旣已封王四瀆當昇公位封河瀆爲靈源公濟瀆爲清源公江瀆爲廣源公淮瀆爲長源公三月戊戌南海太守彭果坐賊決杖長流湊溪郡死于路夏四月戊午門下侍郎陳希烈爲左相兼兵部尚書癸酉復置軍器監自五月不雨至秋七月乙酉以旱命宰相臺寺府縣錄繫囚死罪決杖配流徒已下特免庚寅始雨冬十月戊申幸溫泉宮改爲華清宮十一月乙亥戶部侍郎楊慎矜及兄少府少監慎餘與弟洛陽令慎名並爲李林甫及御史中丞王鉷所構下獄死十二月丙辰工部尚書陸景融卒壬戌還京

七載春正月己卯禮部尚書席豫卒己亥韋縉奏御案褥祗帷等望去紫用赤黃從之三月乙酉大同殿柱產玉芝有神光照殿羣臣請加皇帝尊號曰開元天寶聖文神武應道許之夏四月辛丑以高力士爲驃騎大將軍五月壬午上御興慶宮受冊徽號大赦天下百姓

免來載租庸三皇以前帝王京城置廟以時致祭其歷代帝王肇跡之處未有祠宇者所在各置一廟忠臣義士孝婦烈女德行彌高者亦置祠宇致祭賜酺三日六月范陽節度使安祿山賜實封及鐵券秋八月己亥朔改千秋節爲天長節壬子改萬年縣爲咸寧縣冬十月庚午幸華清宮封貴妃姊二人爲韓國虢國夫人十二月戊戌言玄元皇帝見于華清宮之朝元閣乃改爲降聖閣改會昌縣爲昭應縣會昌山爲昭應山封山神爲玄德公仍立祠宇辛酉還京

八載春正月甲申賜京官絹備春時遊賞二月戊申引百官於左藏庫縱觀錢幣賜絹而歸三月朔方節度使張降丘於東受降城北築橫塞城夏四月咸寧太守趙奉璋決杖而死著作郎韋子春貶端溪尉李林甫陷之也幸華清宮觀風樓五月辛巳於開遠門外作振旅亭戊子南海太守劉巨鱗坐賊決死之六月大同殿又產玉芝一莖龍右節度使哥舒翰攻吐蕃石堡城拔之閏月己丑改石堡城爲神武軍劔南索磨川新置都護府宜以保寧爲名丙寅上親謁太清宮

冊聖祖玄元皇帝尊號爲聖祖大道玄元皇帝高祖太宗高宗中宗
睿宗五帝皆加大聖皇帝之字太穆文德則天和思昭皇后皆加順
聖皇后之字羣臣上皇帝尊號爲開元天寶聖文神武應道皇帝丁
卯上御含元殿受冊大赦天下自今後每至禋祫並於太清宮聖祖
前序昭穆初太白山人李渾言太白山金星洞有帝福壽玉版石記
求得之乃封太白山爲神應公金星洞爲嘉祥公所管華陽縣爲貞
符縣戊辰太子太師徐國公蕭嵩薨丁亥南衙立仗馬宜停省進馬
官秋八月戊子郡別駕宜停下郡置長史冬十月丙寅幸華清宮十
一月丁巳幸御史中丞楊釗莊

九載春正月庚寅朔與歲次同始受朝於華清宮己亥還京庚戌群
臣請封西嶽從之二月壬午御史中丞宋渾坐賊及姦長流高要郡
三月庚戌改軼使爲獻納辛亥西嶽廟災時久旱制停封西嶽夏五
月庚寅以旱錄囚徒乙卯安祿山進封東平郡王節度使封王自此
始也秋七月己亥國子監置廣文館徙生徒爲進士業者九月乙卯

處士崔昌上五行應運曆以國家合承周漢請廢周隋不合爲二王
後冬十一月庚寅幸華清宮己丑制自今告獻太清宮及太廟改爲
朝獻巡陵爲朝拜告宗廟爲奏天地享祀文改昭告爲昭薦以告者
臨下之義故也辛卯幸楊國忠亭子辛丑立周武王漢高祖廟於京
城司置官吏十二月乙亥還京

十載春正月乙酉朔壬辰朝獻太清宮癸巳朝饗太廟甲午有事于
南郊合祭天地禮畢大赦天下太廟置內官供洒掃諸陵廟己亥改
傳國寶爲奉天大寶丁未李林甫領安北副大都護朔方節度使庚
戌大風陝郡運船失火燒米船二百餘隻人死者五百計癸丑分遣
嗣吳王祗等十三人祭嶽瀆海鎮二月丁巳安祿山兼雲中太守河
東節度使夏四月劔南節度使鮮于仲通將兵六萬討雲南與雲南
王閣羅鳳戰于瀘川官軍大敗死於瀘水者不可勝數五月丁亥改
諸衛幡旗緋色者爲赤黃以符土運秋八月乙卯廣陵郡大風潮水
覆船數千艘丙辰京城武庫災燒器械四十七萬事是秋霖雨積旬

牆屋多壞西京尤甚冬十月辛亥幸華清宮十一月乙未幸楊國忠宅丙午兵部侍郎兼御史中丞楊國忠兼領劍南節度使

十一載春正月辛亥還京二月癸酉禁惡錢官出好錢以易之既而商旅不便訴於國忠乃止之三月朔方節度副使奉信王阿布思與安祿山同討契丹布思與祿山不協乃率其部下叛歸漢地丙午制今後每月朔望宜令薦食於太廟每室一牙盤仍五日一開室門洒掃改吏部爲文部兵部爲武部刑部爲憲部其部內諸司有部字者並改將作大匠少匠爲大少二監夏四月御史大夫兼京兆尹王鉉賜死坐弟鐸與兇人邢緯謀逆故也楊國忠兼京兆尹五月戊申慶王琮薨贈靖德太子六月戊子東京大風拔樹發屋八月己丑幸左藏庫賜羣臣帛有差九月甲寅改諸衛士爲武士冬十月戊寅幸華清宮十一月乙卯尚書左僕射兼右相晉國公李林甫薨於行在所庚申御史大夫兼蜀郡長史楊國忠爲右相兼文部尚書十二月甲戌楊國忠奏請兩京選人銓日便定流放無長名己亥還京

十二載春正月壬子楊國忠於尚書省注官注訖於都堂對左相與諸司長官唱名二月庚辰選人鄭對等二十餘人以國忠銓注無滯設齋於勤政殿下立碑於尚書省門癸未追削故右相李林甫在身官爵男特作監岫宗黨李復道等五十人皆流貶國忠誣奏林甫陰結叛胡阿布思故也夏五月乙酉以魏周隋依舊爲三恪及二王後復封韓介鄼等公辛亥太廟諸陵署依舊隸太常寺七月壬子天下齊人不得鄉貢湏補國子學生然後貢舉八月京城霖雨米貴令出太倉米十萬石減價糶與貧人仍令中書門下就京兆大理疏決囚徒九月己亥朔隴右節度使涼國公哥舒翰進封西平郡王食實封五百戶冬十月戊申幸華清宮和雇京城丁戶一萬三千人築興慶宮牆起樓觀至十二月改橫密城爲天德軍庚寅行從官憲部尚書張筠等請上尊號爲開元天地大寶聖文神武孝德證道皇帝十三載春正月丁酉朔上御華清宮之觀風樓受朝賀己亥安慶緒獻俘于行在帝引見於禁中賞賜鉅萬乙巳加安祿山尚書左僕射賜

實封千戶奴婢十房莊宅各一區又加開廐五坊宮苑隴右羣牧都使以武部侍郎吉溫爲副丙午還京二月癸酉上親朝獻太清宮上玄元皇帝尊號曰大聖祖高上大道金闕玄元太皇大帝甲戌親饗太廟上高祖神堯大聖大光孝皇帝太宗謚曰太宗文武大聖大廣孝皇帝高宗謚曰高宗天皇大聖大弘孝皇帝中宗謚曰中宗太和大聖大昭孝皇帝睿宗謚曰睿宗玄真大聖興孝皇帝乙亥御興慶殿受徽號禮畢大赦天下左降官遭父母憂放歸獻陵等五署改爲臺令丞各升一階文武三品已上賜爵一級四品已下加一階賜醵三日戊寅右相兼文部尚書楊國忠守司空餘如故甲申司空楊國忠受冊天雨黃土霑於朝服祿山奏前後討契丹立功將士跳盪等請超三資告身仍望好寫於是超授將軍者五百餘人中將者二千餘人三月丁酉太常卿張垧貶廬溪郡司馬垧兄憲部尚書均貶建安太守丙午御躍龍殿門張樂宴羣臣賜右相絹一千五百疋綵羅三百疋綵綾五百疋左相絹三百疋綵羅綾各五十疋餘三品八十

足四品五品六十疋六品七品四十疋極歡而罷壬戌御勤政樓大
酺北庭都護程千里生擒阿布思獻于樓下斬之於朱雀街乙丑左
羽林上將軍封常清權北庭都護伊西節度使萬春公主出降楊朮
夏五月樊熒守心五十餘日六月乙丑朔日有蝕之不盡如鈎侍御
史劍南留後李宓率兵擊雲南蠻於西洱河糧盡軍旋馬足陷橋為
閣羅鳳所擒舉軍皆沒廢濟陽郡以所領五縣隸東平郡秋八月丁
亥以久雨左相許國公陳希烈為太子太師罷知政事文部侍郎韋
見素為武部尚書同中書門下平章事是秋霖雨積六十餘日京城
垣屋頽壞殆盡物價暴貴人多乏食令出太倉米一百萬石開十場
賤糶以濟貧民東都漚洛暴漲漂沒一十九坊上御勤政樓試四科
制舉人策外加詩賦各一首制舉加詩賦自此始也冬十月壬寅幸
華清宮貶河東太守韋陟為桂嶺尉武部侍郎吉溫為澧陽郡長史
乙巳開府儀同三司畢國公竇瑊薨戊午還京其載戶部計今年見
管州縣戶口管郡惣二百二十一縣一千五百三十八鄉一萬六千

八百二十九戶九百六十一萬九千二百五十四三百八十八萬六千五百四不課五百三十萬一千四十四課口五千二百八十八萬四百八十八四千五百二十一萬八千四百八十不課七百六十六萬二千八百課

十四載春三月丙寅宴羣臣於勤政樓奏九部樂上賦詩數栢梁體癸未遣給事中裴士淹等巡撫河南河北淮南等道八月壬辰上親錄囚徒冬十月壬辰幸華清宮甲午頒御注老子并義疏於天下十一月戊午朔始寧太守羅希奭以停止張博濟決杖而死吉溫自縊於獄丙寅范陽節度使安祿山率蕃漢之兵十餘萬自幽州南向詣闕以誅楊國忠爲名先殺太原尹楊光翹於博陵郡壬申聞於行在所癸酉以郭子儀爲靈武太守朔方節度使封常清自安西入奏至行在甲戌以常清爲范陽平盧節度使兼御史大夫令募兵三萬以禦逆胡戊寅還京以羽林大將軍王承業爲太原尹以衛尉卿張介然爲陳留太守河南節度採訪使以金吾將軍程千里爲潞州長史

唐紀六
並令討賊甲申以京兆牧榮王琬爲元帥命高仙芝副之於京城召募號曰天武軍其衆十萬丙戌高仙芝等進軍上御勤政樓送之十二月丙戌朔祿山於靈昌郡度河辛卯陷陳留郡殺張介然甲午陷棗陽郡殺太守崔無諛丙申封常清與賊戰于成臯豐子谷官軍敗績常清奔於陝郡丁酉祿山陷東京殺留守李澄中丞盧奕判官蔣清時高仙芝鎮陝郡棄城西保潼關常山太守顏杲卿與長史袁履謙賈深等殺賊將李欽奏執賊將何千年高邈送京師辛丑詔皇太子統兵東討以求王璘爲山南節度使以江陵長史源洧副之顏王璘爲劔南節度使以蜀郡長史崔圓副之二王不出閣丙午斬封常清高仙芝于潼關以哥舒翰爲太子先鋒兵馬元帥領河隴兵募守潼關以拒之辛亥榮王琬薨贈靖恭太子

十五載春正月乙卯御宣政殿受朝其日祿山僭號於東京庚申以李光弼爲雲中太守河東節度使壬戌賊將希德陷常山郡執太守顏杲卿長史袁履謙殺民吏萬餘城中流血甲子哥舒翰進位尚

書左僕射同中書門下平章事乙丑賊將安慶緒犯潼關哥舒翰擊退之乙巳加平原太守顏真卿戶部侍郎獎守城也二月丙戌李光弼郭子儀將兵東出井陘與賊將史思明戰大破之進取郡縣十餘丙辰誅工部尚書安思順三月壬午朔以河東節度使李光弼爲御史大夫范陽節度使乙酉以平原太守顏真卿爲河北採訪使己亥改常山郡爲平山郡房山縣爲平山縣鹿泉縣爲獲鹿縣鹿成縣爲東鹿縣夏四月丙午以贊善大夫來瑱爲潁川太守招討使五月戊午南陽太守魯炆與賊將武令珣戰于洧水上官軍大敗爲賊所虜進寇我南陽詔嗣虢王巨自藍田出師救南陽六月癸未朔顏真卿破賊將袁知泰於堂邑北海太守賀蘭進明收信都唐寅哥舒翰將兵八萬與賊將崔乾祐戰于靈寶西原官軍大敗死者十六七日李光弼與賊將史思明戰于常山東嘉山大破之斬獲數萬計辛卯哥舒翰至潼關爲其帳下火拔歸仁以左右數十騎執之降賊關門不守京師大駭河東華陰上洛等郡皆委城而走甲午將謀幸蜀乃

下詔親征仗下從士庶恐駭奔走于路乙未凌晨自延秋門出微雨
霑濕扈從惟宰相楊國忠韋見素內侍高力士及太子親王妃主皇
孫已下多從之不及平明渡便橋國忠欲斷橋上曰後來者何以能
濟命緩之辰時至咸陽望賢驛置頓官吏駭散無復儲供上憇於官
門之樹下亭午未進食俄有父老獻麪上謂之曰如何得飯於是百
姓獻食相繼俄又尚食持御膳至上頒給從官而後食是夕次金城
縣官吏已遁令魏方進男允招誘俄得智藏寺僧進藟粟行從方給
丙辰次馬嵬驛諸衛頓軍不進龍武大將軍陳玄禮奏曰逆胡指闕
以誅國忠爲名然中外羣情不無嫌怨今國步艱阻乘輿震蕩陛下
宜徇羣情爲社稷大計國忠之徒可置之于法會吐蕃使二十一人
遮國忠告訴於驛門衆呼曰楊國忠連蕃人謀逆兵士圍驛四合乃
誅楊國忠衆方退一族兵猶未解上令高力士詰之迴奏曰諸將旣
誅國忠以貴妃在宮人情恐懼上即命力士賜貴妃自盡玄禮等見
上請罪命釋之丁酉將發馬嵬驛朝臣唯韋見素一人乃命見素子

京兆府司錄諤爲御史中丞克置頓使議其所向軍士或言河隴或言靈武太原或言還京爲便韋諤曰還京須有捍賊之備兵馬未集恐非萬全不如且幸扶風徐圖所向上詢于衆咸以爲然及行百姓遮路乞留皇太子願勦力破賊收復京城因留太子戊戌次扶風縣已亥次扶風郡軍士各懷去就咸出醜言陳玄禮不能制會益州貢春絲十萬匹上悉命置于庭召諸將諭之曰卿等國家功臣陳力久矣朕之優獎常亦不輕逆胡背恩事須迴避甚知卿等不得別父母妻子朕亦不及親辭九廟言發涕流又曰朕須幸蜀路險狹人若多往恐難供承今有此絲卿等即宜分取各圖去就朕自有子弟中官相隨便與卿等訣別衆咸俯伏涕泣曰死生願從陛下上曰去住任卿自此悖亂之言稍息庚子以司勳郎中劔南節度留後崔圓爲蜀郡長史劔南節度副大使以穎王璩爲劔南節度大使以監察御史宋若思爲御史中丞克置頓使韋諤克巡閣道使並令先發辛丑發扶風郡是夕次陳倉壬寅次散關分部下爲六軍穎王璩先行壽王

瑁等分統六軍前後左右相次丙午河池郡崔圓奏劒南歲稔民安
儲供無闕上大悅授圓中書侍郎同中書門下平章事蜀郡長史劒
南節度如故以前華州刺史魏犀爲梁州長史秋七月癸丑朔壬戌
次益昌縣渡吉栢江有雙魚夾舟而躍議者以爲龍甲子次普安郡
憲部侍郎房琯自後至上與語甚悅即日拜爲吏部尚書同中書門
下平章事丁卯詔以皇太子諱克天下兵馬元帥都統朔方河東河
北平盧等節度兵馬收復兩京永王璘江陵府都督統江南東路黔
中江南西路等節度大使盛王琦廣陵郡大都督統江南東路淮南
河南等路節度大使豐王珙武威郡都督領河西隴右安西北庭等
路節度大使初京師陷賊車駕倉皇出幸人未知所向衆心震駭及
聞是詔遠近相慶咸思効忠於興復庚午次巴西郡太守崔渙奉迎
即日以渙爲門下侍郎同中書門下平章事以韋見素爲左相庚辰
車駕至蜀郡扈從官吏軍士到者一千三百人宮女二十四人而已
八月癸未朔御蜀都府衙宣詔曰朕以薄德嗣守神器每乾乾惕厲

勤念生靈一物失所無忘罪已聿來四紀人亦小康推心于人不疑于物而姦臣兇豎棄義背恩割剥黎元擾亂區夏皆朕不明之過也今巡撫巴蜀訓厲師徒仍令太子諸王蒐兵重鎮誅夷兇醜以謝昊穹思與羣臣重弘理道可大赦天下癸巳靈武使至始知皇太子即位丁酉上用靈武冊稱上皇詔稱誥已亥上皇臨軒冊肅宗命宰臣韋見素房琯使靈武冊命曰朕稱太上皇軍國大事先取皇帝處分後奏朕知候克復兩京朕當怡神姑射偃息大庭明年九月郭子儀收復兩京十月肅宗遣中使啖廷瑶入蜀奉迎丁卯上皇發蜀郡十一月丙申次鳳翔郡肅宗遣精騎三千至扶風迎衛十二月丙午肅宗具法駕至咸陽望賢驛迎奉上皇御宮之南樓肅宗拜慶樓下嗚咽流涕不自勝爲上皇徒步控轡上皇撫背止之即騎馬前導丁未至京師文武百寮京城士庶夾道歡呼靡不流涕即日御大明宮之含元殿見百寮上皇親自撫問人人感咽時太廟爲賊所焚權移神主於大內長安殿上皇謁廟請罪遂幸興慶宮三載二月肅宗與羣

臣奉上皇尊號曰太上至道聖皇帝乾元三年七月丁未移幸西內之甘露殿時閣宦李輔國離間肅宗故移居西內高力士陳玄禮等遷謫上皇寢不自擇上元二年四月甲寅崩于神龍殿時年七十八羣臣上謚曰至道大聖大明孝皇帝廟號玄宗初上皇親拜五陵至橋陵見金粟山崗有龍盤鳳翥之勢復近先塋謂侍臣曰吾千秋後宜葬此地得奉先陵不忘孝敬矣至是追奉先旨以創寢園以廣德元年三月辛酉葬于泰陵

史臣曰孔子稱王者必世而後仁李氏自武后移國三十餘年朝廷罕有正人附麗無非險輩持苞苴而請謁奔走權門效鷹犬以飛馳中傷端士以致斲喪王室屠害宗枝骨鯁大臣屢遭誣陷舞文酷吏坐致顯榮禮儀無復興行刑政壞於大馬端揆出阿黨之語晁旒有和事之名朋比成風廉耻都盡我開元之有天下也紕之以典刑明之以禮樂愛之以慈儉律之以軌儀黜前朝僣倖之臣杜其姦也焚後庭珠翠之玩戒其奢也禁女樂而出宮嬪明其教也賜酺賞而放

哇淫懼其荒也叙友于而敦骨肉厚其俗也蒐兵而責帥明軍法也朝集而計最校吏能也廟堂之上無非經濟之才表著之中皆得論思之士而又旁求宏碩講道藝文昌言嘉謨日聞於獻納長轡遠馭志在於昇平貞觀之風一朝復振于斯時也烽燧不驚華戎同軌西蕃君長越繩橋而競款玉關北狄酋渠捐毳幕而爭趨鴈塞象郡炎州之玩雞林鯁海之珍莫不結轍於象胥駢羅於典屬膜拜丹墀之下夷歌立伏之前可謂冠帶百蠻車書萬里天子乃覽雲臺之義草泥金之札然後封日觀禪雲亭訪道於穆清怡神於玄牝與民休息比屋可封於時垂髫之倪皆知禮讓戴白之老不識兵戈虜不敢乘月犯邊士不敢彎弓報怨康哉之頌溢于八紘所謂世而後仁見於開元者矣年踰三紀可謂太平於戲國無賢臣聖亦難理山有猛虎獸不敢窺得人者昌信不虛語昔齊桓公行同禽獸不失霸主之名梁武帝靜比桑門竟被臺城之酷蓋得管仲則淫不害霸任朱异則善不救亡開元之初賢臣當國四門俱穆百度唯貞而釋老之流頗

以無爲請見上乃務清淨事薰修留連軒后之文舞詠伯陽之說雖
稍移於勤倦亦未至於怠荒俄而朝野怨咨政刑紕繆何哉用人之
失也自天寶已還小人道長如山有朽壤雖大必虧木有蠹虫其榮
易落以百口百心之讒譖蔽兩目兩耳之聰明苟非鐵腸石心安得
不惑而獻可替否靡聞姚宋之言妬賢害功但有甫忠之奏豪猾因
茲而睥睨明哲於是乎卷懷故祿山之徒得行其爲厲階之作匪降
自天謀之不臧前功併棄惜哉
贊曰開元握圖永鑒前車景氣融朗昏氛滌除政纔勤倦妖集廷除
先民之言靡不有初

唐書本紀卷第九

唐書本紀卷第十

肅宗

劉
聞人詮校刻
沈樹堧校
筆修

肅宗文明武德大聖大宣孝皇帝諱亨玄宗第三子母曰元獻皇后
楊氏景雲二年乙亥生初名嗣昇二歲封陝王五歲拜安西大都護
河西四鎮諸蕃落大使上仁愛英悟得之天然及長聰敏強記屬辭
典麗耳目之所聽覽不復遺忘開元十五年正月封忠王改名浚五
月領朔方大使單于大都護十八年奚契丹犯塞以上爲河北道元
帥信安王禕爲副帥御史大夫李朝隱京兆尹裴旻先等八人摠管
兵以討之仍命百寮設次於光順門與上相見左丞相張說退謂學
士孫逖韋述曰嘗見太宗寫真圖忠王英姿穎發儀表非常雅類聖
祖此社稷之福也二年諸將大破奚契丹以上遙統之功加司徒二
十三年改名瑛二十五年皇太子瑛得罪二十六年六月庚子立上

爲皇太子改名紹後有言事者云紹與宋太子名同改今名初太子瑛得罪上召李林甫議立儲貳時壽王瑁母武惠妃方承恩寵林甫希旨以瑁對及立上爲太子林甫懼不利已乃起韋堅柳勣之獄上幾危者數四後又楊國忠依倚妃家恣爲褻穢懼上英武潛謀不利爲患久之天寶十三載正月安祿山來朝上嘗密奏云祿山有反相玄宗不聽十四載十一月祿山果叛稱兵詣闕十二月丁未陷東京辛丑制太子監國仍遣上親摠諸軍進討時祿山以誅楊國忠爲名由是軍民切齒於楊氏國忠懼乃與貴妃謀間其事上遂不行乃召河西節度使哥舒翰爲皇太子前鋒兵馬元帥令率衆二十萬守潼關明年六月哥舒翰爲賊所敗關門不守國忠諷玄宗幸蜀丁酉至馬嵬頓六軍不進請誅楊氏於是誅國忠賜貴妃自盡車駕將發留上在後宣諭百姓衆泣而言曰逆胡背恩主上播越臣等生於聖代世爲唐民願勦力一心爲國討賊請從太子收復長安玄宗聞之曰此天啓也乃令高力士與壽王瑁送太子內人及服御等物留後軍

廐馬從上令力士口宣曰汝好去百姓屬望慎勿違之莫以吾為意且西戎北狄吾嘗厚之今國步艱難必得其用汝其勉之上迴至渭北便橋已斷水暴漲無舟楫上號令水濱百姓歸者三千餘人渭水可涉又遇潼關散卒誤以為賊與之戰士衆多傷乃收其餘衆比上軍既濟其後皆溺上喜以為天之佑時從上惟廣平建寧二王及四軍將士纔二千人自奉天而北夕次永壽百姓遮道獻牛酒有白雲起西北長數丈如樓閣之狀議者以為天子之氣戊戌至新平郡時晝夜奔馳三百餘里士衆器械亡失過半所存之衆不過一旅己亥至安定郡斬新平太守薛羽保定太守餘穀以其奔郡也庚子至烏氏驛彭原太守李遵謁見率兵士奉迎仍進衣服糧糗上至彭原又募得甲士四百率私馬以助軍辛丑至平涼郡蒐閱監牧公私馬得數萬疋官軍益振時賊據長安知上治兵河西三輔百姓皆曰吾太子大軍即至賊望西北塵起有時奔走戊申扶風人康景龍殺賊宣慰使薛揔等二百餘人陳倉令薛景仙率衆收扶風郡守之由是關

輔豪右皆謀殺賊賊故不敢侵軼上在平涼數日之間未知所適會朔方留後杜鴻漸魏少遊崔漪等遣判官李涵奉牋迎上備陳兵馬招集之勢倉儲庫甲之數上大悅鴻漸又發朔方步騎數千人於白草頓奉迎時河西行軍司馬裴冕新授御史大夫赴闕遇上於平涼亦勸上治兵於靈武以圖進取上然之上初發平涼有彩雲浮空白鶴前引出軍之後有黃龍自上所憩屋騰空而去上行至豐寧南見黃河天塹之固欲整軍北渡以保豐寧忽大風飛沙跬步之間不辨人物及迴軍趨靈武風沙頓止天地廓清七月辛酉上至靈武時魏少遊預備供帳無不畢備裴冕杜鴻漸等從容進曰今寇逆亂常毒流函谷主上倦勤大位移幸蜀川江山阻險奏請路絕宗社神器湏有所歸萬姓顙顙思崇明聖天意人事不可固違伏願殿下順其樂推以安社稷王者之大孝也上曰俟平寇逆奉迎鑾輿從容儲闡侍膳左右豈不樂哉公等何急也冕等凡六上牋辭情激切上不獲已乃從是月甲子上即皇帝位於靈武礼畢冕等跪進曰自逆賊憑陵

兩京失守聖皇傳位陛下再安區宇臣稽首上千萬歲壽羣臣舞蹈
稱萬歲上流涕歔歔感動左右即日奏其事於上皇是日御靈武南
門下制曰朕聞聖人畏天命帝者奉天時知皇靈聽命不敢違而去
之知曆數可歸不獲已而當之在昔帝王靡不由斯而有天下者也
乃者羯胡亂常京闕失守天未悔禍羣兇尚扇聖皇久厭大位思傳
眇身軍興之初已有成命予恐不德罔敢祗承今羣工卿士僉曰孝
莫大於繼德功莫盛於中興朕所以治兵朔方將殄寇逆務以大者
本其孝平須安兆庶之心敬順羣臣之請乃以七月甲子即皇帝位
於靈武敬崇徽號上尊聖皇曰上皇天帝所司擇日昭告上帝朕以
薄德謬當重位既展承天之礼宜覃率土之澤可大赦天下改元曰
至德内外文武官九品已上加兩階賜兩轉三品已上賜爵一級以
朔方度支副使大理司直杜鴻漸爲兵部郎中朔方節度判官崔漪
爲吏部郎中並知中書舍人以御史中丞裴冕爲中書侍郎同中書
門下平章事河西兵馬使周玘爲河西節度使隴右兵馬使彭元暉

爲隴右節度使前蒲州刺史呂崇賁爲關內節度使兼順化郡太守以陳倉縣令薛景仙爲扶風太守以隴右節度使郭英乂爲天水郡太守改靈武郡爲大都督府上縣爲望中縣爲上丁卯逆胡害霍國長公主末王妃侯莫陳氏義王妃閭氏陳王妃韋氏信王妃任氏駙馬楊拙等八十餘人於崇仁之街甲戌賊黨同羅部五千餘人自西出降朔方軍已卯京兆尹崔光遠長安令蘇震等率府縣官吏大呼於西市殺賊數千級然後來赴行在詔改扶風爲鳳翔郡八月壬午朔方節度使郭子儀范陽節度李光弼破賊於常山郡之嘉山上以治兵收京城詔子儀等旋師子儀光弼率所統步騎五萬至屯河北詔以子儀爲兵部尚書依前靈州大都督府長史光弼爲戶部尚書兼太原尹北京留守同中書門下平章事迴紇吐蕃遣使繼至請和親願助國討賊皆宴賜遣之是日上皇至成都大赦癸巳上所奉表始達成都丁酉上皇遜稱誥遣左相韋見素文部尚書房琯門下侍郎崔渙等奉冊書赴靈武九月壬辰上南幸彭原郡封故邠王守礼

男承采爲燉煌王今使廻紇和親冊廻紇可汗女爲毗伽公主仍令
僕固懷恩送承采至廻紇部內官邊令該背上皇授賊至是復來見
上命斬之丙子至順化郡韋見素房琯崔渙等自蜀郡貢上冊書及
傳國寶等至己卯斬潼關敗將李承光於蘄下十月辛巳朔日有蝕
之旣癸未彭原郡以軍興用度不足權賣官爵及度僧尼上素知房
琯名至是琯請爲兵馬元帥收復兩京許之仍令兵部尚書王思禮
爲副分兵爲三軍楊希文劉貴哲李光進等各將一軍其衆五萬辛
丑琯與賊將安守忠戰于陳壽斜官軍敗績楊希文劉貴哲等降於
賊琯亦奔還平原太守顏真卿以食盡援絕弃城渡河於是河北郡
縣盡陷於賊十一月辛亥河西地震有聲圯裂廬舍張掖酒泉尤甚
戊子廻紇引軍來赴難與郭子儀同破賊黨同羅部三千餘衆於河
上詔宰相崔渙巡撫江南補授官吏十二月戊子以王思禮爲關內
節度彭原郡百姓給復二載郡同六雄縣昇緊望以秦州都督郭英
又爲鳳翔太守諫議大夫高適爲廣陵長史淮南節度兼採訪使賊

將阿史那承慶攻陷潁川郡執太守薛愿長史龐堅甲辰江陵大都督府求王璘擅領舟師下廣陵

二載春正月庚戌朔上在彭原受朝賀是日通表入蜀賀上皇上皇在蜀每得上表疏訊其使者知上涕戀晨省乃下誥曰至和育物大孝安親古之哲王必由斯道朕往在春宮嘗事先后問安靡闕視膳無違及同氣天倫聯華棣萼居嘗共被食必分甘今皇帝奉而行之未嘗失墜每有銜命而來戒途將發必肅恭拜跪涕泗連而左右侍臣罔不感動間者抱戴赤雀白狼之瑞接武荐臻此皆皇帝聖敬之符孝友之感也故能誕敷德教橫干四海信可以光宅寰宇求綏黎元者哉其天下有至孝友悌行著鄉閭堪旌表者郡縣長官採聽聞奏庶孝子順孫沐于玄化也甲寅以襄陽太守李岍爲蜀郡長史劔南節度使將作少監魏仲犀爲襄陽山南道節度使求王傳劉彙爲丹陽太守兼防禦使以憲部尚書李麟同中書門下平章事上皇遣平章事崔圓奉誥赴彭原乙卯逆胡安祿山爲其子慶緒所殺辛酉

於江寧縣置金陵郡仍置軍分人以鎮之甲子幸保定郡丙寅武郡九姓商胡安門物等叛殺節度使周佖判官崔稱率衆討平之是日蜀郡健兒賈秀等五千人謀逆上皇御蜀郡南樓將軍席元慶等討平之二月戊子幸鳳翔郡文城太守武威郡九姓齊莊破賊五千餘衆上議大舉收復兩京盡括公私馬以助軍給事中李廙署云無馬大夫崔光遠劾之貶廙江華太守節度使李光弼大破賊將蔡希德之衆於城下斬虜士萬軍資器仗稱是朔方節度使郭子儀大破賊將崔乾祐於潼關收河東郡永王璘兵敗奔於嶺外至大庾嶺爲洪州刺史皇甫侁所殺三月癸亥河西自去冬地震至是方止辛酉以左相韋見素平章事裴冕爲左右僕射並罷知政事以前憲部尚書致仕苗晉卿爲左相吐蕃遣使和親遣給事中南巨川報命癸亥大雨至癸酉不止詔䟽理刑獄甲戌方止夏四月戊寅朔以郭子儀爲司空兼副元帥統諸節度李光弼爲司徒乙酉太史奏歲星太白熒惑集于東井五月癸丑郭子儀與賊將安守忠戰于清渠官軍敗績

子儀退保武功丁巳房琯爲太子少師罷知政事以諫議大夫張鎰爲中書侍郎同中書門下平章事以武部侍郎杜鴻漸爲河西節度庚申誥追贈故妃楊氏爲元獻皇太后上母也甲子郭子儀以失律讓司空許之七月庚戌夜蜀郡軍人郭千仞謀逆上皇御玄英樓節度使李岷討平之丁巳賊將安武臣陷陝郡民無遺類八月甲申以黃門侍郎崔渙爲餘杭太守江東採訪防禦使己丑以平章事張鎰兼河南節度採訪處置等使靈昌太守許叔冀爲賊所攻援兵不至拔衆投睢陽郡癸巳大閱諸軍上御城樓以觀之丁酉改雍縣爲鳳翔縣陳倉爲寶雞縣閏八月辛未賊將遽寇鳳翔崔光遠行軍司馬王伯倫判官李椿率衆捍賊賊退乘勝至中渭橋殺賊守橋衆千人追擊入苑中時賊大軍屯武功聞之燒營而去伯倫與賊血戰而死李椿力窮被執然自是賊不敢西侵九月丁丑上黨節度使程千里與賊挑戰爲賊將蔡希德所擒燉煌王承寀自迴紇使還拜宗正卿納迴紇公主爲妃迴紇封爲葉護持四節與迴紇葉護太子率兵四千

助國討賊葉護入見宴賜加笄寺丁亥元帥廣平王統朔方安西迴紇
南蠻大食之衆二十萬東向討賊壬寅與賊將安守忠李歸仁等戰
于香積寺西北賊軍大敗斬首六萬級賊帥張通儒奔京城東走癸
卯廣平王收西京甲辰捷書至行在百寮稱賀即日告捷于蜀上皇
遣裴冕入京啓告郊廟社稷冬十月乙巳朔以崔光遠爲京兆尹詔
曰緣京城初收要安百姓又洒掃宮闕奉迎上皇以今月十九日還
京應緣供頓務從減省吐蕃寇陷西平郡癸丑賊將尹子奇陷睢陽害
張巡姚閭許遠賊自香積之敗悉衆保陝郡廣平王統郭子儀等進
攻與賊戰于陝西之新店賊衆大敗斬首十萬級橫屍三十里庚申
安慶緒與其黨奔河北壬戌廣平王入東京陳兵天津橋南士庶歡
呼路側陷賊官僞署侍中陳希烈中書令張垞等三百餘人素服待
罪癸亥上自鳳翔還京仍遣太子太師韋素入蜀迎上皇鳳翔郡給復
五載丙寅至望賢宮得東京捷書至上大喜丁卯入長安士庶涕泣
拜忭曰不圖復見吾君上亦爲之感惻九廟爲賊所焚上素服哭於

廟三日入居大明宮是日上皇發蜀郡已巳文武脅從官免冠徒跣
朝堂待罪禁之府獄命中丞崔器劾之迴紇葉護自東京還宴之于
宣政殿便辭還蕃乃封葉護爲忠義王約每年送絹二萬疋至朔方
王便交授十一月壬申朔上御丹鳳樓下制曰我國家出震乘乾立
極開統謳謌曆數啓聖千齡文物聲名握圖六葉安祿山夷羯賤類
粗立邊功遂肆兇殘變起倉卒而毒流四海塗炭萬靈朕興言痛憤
提戈問罪靈武聚一旅之衆至鳳翔合百萬之師親搃元戎掃清羣
孽廣平王俶受委元帥能振天聲郭子儀決勝無前克成大業兼迴
紇葉護雲南子弟諸蕃兵馬力戰平兇勢若摧枯易同破竹朕早承
聖訓嘗讀禮經義切奉先恐不克荷今復宗廟於函洛迎上皇於巴
蜀導鑾輿而反正朝寢門而問安寰宇載寧朕願畢矣且復人將有
主敬當天地之心興豈在予實馮社稷之祐今兩京無虞三靈通慶
可以昭事宜在覃恩待上皇到日當取處分是時河南河東諸郡縣
皆平宮省門帶安字者改之僞御史大夫嚴莊來降新成九朝神主

上親告享十二月丙午上皇至自蜀上至望賢宮奉迎上皇御宮南樓上望樓辟易下馬趨進樓前再拜蹈舞稱慶上皇下樓上匍匐捧上皇足涕泗嗚咽不能自勝遂扶侍上皇御殿親自進食自御馬以進上皇上馬又躬攬轡而行止之後退上皇曰吾享國長久吾不知貴見吾子爲天子吾知貴矣上乘馬前導自開遠門至丹鳳門旗幟燭天綵棚夾道士庶舞柝路側皆曰不圖今日再見二聖百寮班於含元殿庭上皇御殿左相苗晉卿率百辟稱賀人人無不感咽禮畢上皇詣長樂殿謁九廟神主即日幸興慶宮上請歸東宮上皇遣高力士再三慰譬而止受賊僞署左相陳希烈達奚昫等二百餘人並禁於楊國忠宅鞫問甲寅以左相苗晉卿爲中書侍郎同中書門下平章事十二月戊午朔上御丹鳳門下制大赦蜀郡靈武元從功臣太子太師幽國公韋見素內侍齊國公高力士右龍武大將軍陳玄禮各加實封三百戶田長文張崇俊杜休祥各加二百戶右僕射裴冕異國公殿中監李輔國成國公宗正卿李遵鄭國公兼進封邑廣

平王倣封楚王加實封二千戶左僕射朔方節度郭子儀加司徒進封代國公實封一千戶兵馬使僕固懷恩封豐國公右金吾將軍李嗣業封虢國公司徒兼太原尹李光弼薊國公關內節度王思禮霍國公淮南節度來瑱潁國公南陽太守魯炆岐國公仍並加實封京兆尹崔光遠鄴國公開府李光進范陽郡公左相苗晉卿爲侍中封韓國公憲部尚書平章事李麟襄國公中書侍郎崔圓爲中書令趙國公中書侍郎張鎬南陽縣公近日所改百司額及郡名官名一依故事改蜀郡爲南陽鳳翔府爲西京西京改爲中京蜀郡改爲成都府鳳翔府官寮並同三京名號其李愬盧弈顏杲卿袁履謙許遠張巡張介然蔣清龐堅等即與追贈訪其子孫厚其官爵文武三品已上賜爵一級四品已下加一階賜醕五日進封南陽王傑爲趙王新城王僅爲彭城王潁川王憍爲堯王第七男倎爲涇王第九男倔封襄王第十男召封興王第十一男偲封杞王第十二男侗封定王甲子_上皇御宣政殿授上傳國王_上於殿下涕泣而受之己丑賊將僞

范陽節度使史思明以其兵衆八萬之籍與僞河東節度使高秀巖並表送降庚午制人臣之節有死無二爲國之體叛而必誅況乎委質賊廷宴安逆命耽受寵祿淹延歲時不顧恩義助其効用此其可宥法將何施達奚珣等或受任台輔位極人臣或累葉寵榮姻聯戚里或歷踐臺閣或職通中外夫以犬馬微賤之畜猶知戀主龜蛇蠢動之類皆能報恩豈曰人臣曾無感激自逆胡作亂傾覆邦家凡在黎元皆含怨憤殺身殉國者不可勝數此等黔首猶不肯國恩受任於梟獍之間咨謀於豺虺之輩靜言此情何可放宥達奚珣等一十八人並宜處斬陳希烈等七人並賜自盡前大理卿張均特宜免死配流合浦郡是日斬達奚珣等於子城西南隅獨柳樹仍集百寮往觀之

三載正月甲戌朔戊寅上皇御宣政殿冊皇帝尊號曰光天文武大聖孝感皇帝上以徽號中有大聖二字上表固讓不允乙酉勅因亂所失庫物先差使搜檢如聞下吏因便擾人其搜檢使一切並停務

今安輯內出宮女三千人庚寅大閱諸軍於含元殿庭上御棲鸞閣
觀之庚子冊良娣張氏爲淑妃二月癸卯朔賊將僞淄青節度能元
皓以其地請降用爲河北招討使并其子昱並授官爵乙巳上御興
慶宮奉冊上皇徽號曰太上至道聖皇大帝丁未御明鳳門大赦天
下改至德三載爲乾元元年成都靈武扈從功臣三品已上與一子
官五品已下與一子出身六品已下量與改轉死王事陷賊不受僞
命而死者並與追贈陷賊官先推鞠者例減罪一等今後醫卜入仕
者同明法例處分三月癸酉朔甲戌元帥楚王俶改封成王乙亥山
南東道河南淮南江南皆置節度使辛卯以歲飢禁酤酒麥依常式
太史監爲司天臺取承寧坊張守珪宅置仍補官員六十人夏四月
癸卯以太子少師嗣虢王巨爲東京留守河南尹克京畿採訪處置
使已酉冊淑妃張氏爲皇后辛亥九廟成備法駕自長安殿迎九廟
神主入新廟甲寅上親享九廟遂有事於圓丘即日還宮翌日御明
鳳門大赦天下戊辰上進鍊石英金龜於興慶宮五月壬申朔廻紇

黑衣大食各遣使朝貢至閣門爭長詔其使合從左右門入壬午詔近緣狂寇亂常諸道分置節度蓋摠管內徵發文牒往來仍加採訪轉滋煩擾其諸道先置採訪黜陟二使宜停癸未夜月掩心前星戊子以河南節度中書侍郎平章事張鎰爲荊州大都督府長史本州防禦使以禮部尚書崔光遠爲河南節度庚寅立成王俶爲皇太子以荊州長史季廣琛赴河南行營會計討賊於河北己未中書令崔圓爲太子少師刑部尚書同平章事李麟爲太子少傅並罷知政事以太常少卿知禮儀事王璵爲中書侍郎同中書門下平章事丙申燉煌王承寀薨六月辛丑朔吐火羅康國遣使朝貢己酉初置太一神壇於圓丘東是日命宰相王璵攝行祠事癸丑夜月入南斗魁戊午諸三司所推劾受賊僞官等恩澤頻加科條遞減原其事狀稍近平人所推問者並宜釋放秋七月辛未朔吐火羅葉護烏利多并九國首領來朝助國討賊上令赴朔方行營丙戌初鑄新錢文曰乾元重寶用一當十與開元通寶同行用丁亥制上皇第二女寧國公主

出降廻紇英武威遠毗伽可汗八月壬寅以青徐等五州節度使季廣琛兼許州刺史河南節度使崔光遠兼汴州刺史以青州刺史許叔冀兼滑州刺史克青滑六州節度使甲辰上皇誕節上皇宴百官於金明門樓朔方節度使郭子儀河東節度使李光弼關內節度使王思禮來朝加子儀中書令光弼侍中思禮兵部尚書餘如故九月庚午朔右羽林大將軍趙泚爲蒲州刺史蒲同號三州節度使貝州刺史能元皓爲齊州刺史齊充鄆等州防禦使庚寅大舉討安慶緒於相州命朔方節度郭子儀河東節度李光弼關內潞州節度使王思禮淮西襄陽節度魯吳興平節度李奐滑濮節度許叔冀平盧兵馬使董秦北庭行營節度使李嗣業鄭蔡節度使李廣琛等九節度之師步騎二十萬以開府魚朝恩爲觀軍容使癸巳廣州奏大食國波斯國兵衆攻城刺史韋利見弃城而遁十月乙未以鳳翔尹李齊物爲刑部尚書以濮州刺史張方須爲廣州都督五府節度使郭子儀奏破賊十萬於衛州獲安慶緒弟慶和進收衛州甲寅上皇幸華

清宮上送於灞上許叔異奏衛州婦人侯四娘滑州婦人唐期嬾婦人王二娘相與歎血請赴行營討賊皆補果毅壬申王思禮破賊二萬於相州十一月丁丑郭子儀收魏州得僞署刺史蕭華於州獄詔復以華爲刺史是日上皇至自華清宮上迎於灞上上自控上皇馬轡百餘步誥止之乃已十二月癸卯以河南節度崔光遠爲魏州刺史追蕭華赴相州行營甲辰以昇州刺史韋黃裳爲蘇州刺史浙西節度使庚戌以戶部尚書李岍充淮南浙西觀察使處置節度使丙寅立春上御宣政殿讀時令常叅官五品已上升殿序坐而聽之時王師圍相州慶緒食盡求於史思明率衆來援丁卯思明復陷魏州刺史崔光遠出奔

二年春正月己巳朔上御含元殿受尊號曰乾元大聖光天文武孝感皇帝是日史思明自稱燕王於魏州僭立年號丁丑上親祀九宮貴神齋宿於壇所戊寅有事於籍田上行九推禮官奏太過上曰朕勸農率下所恨不終于畝耳癸未夜月掩歲星乙丑以御史中丞崔

寓都統浙江淮南節度處置使丙申開府儀同三司衛尉卿懷州北
庭行營節度使號國公李嗣業卒于相州行營庚子以太子少師崔
圓克東京留守判尚書省事二月壬子望月蝕既百官請加皇后張
氏尊號曰翊聖上以月蝕陰德不修而止貶東京留守嗣號王巨以
陝州刺史苛政也丙辰月犯心大星壬戌遣侍中苗晉卿王瓌分錄
囚徒三月丁卯朔己巳皇后祀先蠶於苑中壬申相州行營郭子儀
等與賊史思明戰王師不利九節度兵潰子儀斷河陽橋以餘衆保
東京辛卯以衛尉卿荔非元禮爲懷州刺史權鎮西北庭行營節度
使以滑州刺史許叔冀克滑汴曹宋等州節度使以鄆州刺史尚衡
爲徐州刺史克毫潁等州節度使甲午以兵部侍郎呂諲同中書門
下平章事以太子賓客薛景仙爲鳳翔尹本府防禦使乙未侍中苗
晉卿爲太子太傅平章事王瓌爲刑部尚書並罷知政事以京兆尹
李峴爲吏部尚書禮部侍郎李揆爲中書侍郎與戶部侍郎第五琦
等並同中書門下平章事丙申以郭子儀爲東畿山東河南等道節

度防禦兵馬元帥權東京留守判尚書省事以河西節度副使來瑱
爲陝州刺史克虢華節度潼關防禦團練等使四月丁酉朔王思禮
奏於潞城縣東直千嶺破賊萬人壬寅詔以寇孽未平務懷搆搃自
今以後朕常膳及服御等物並從節減諸作坊造坊並停比緣軍國
務殷或宣口勅處分今後非正宣並不得行用中外諸務各歸有司
英武軍及六軍諸使比因論竟便行追攝今後須經臺府如處斷不
平具狀聞奏自文武五品已上正官各舉賢良方正直言極諫一人
任自封進兩省官十日一上封事御史臺欲彈事不須進狀仍服豸
冠殘妖未殄國步猶難共體至公以康庶政朕推誠御物與衆共之
思與蒼生臻夫至道宣示中外知朕意焉甲辰以鄧州刺史魯吳爲
鄭州刺史克陳鄭穎亳節度使以徐州刺史尚衡爲青州刺史克青
淄密登萊沂海等州節度使以商州刺史興平軍節度李奐兼豫許
汝等州節度使乙巳第五琦依舊判度支租庸等使史思明僭號於
魏州貶季廣琛宣州刺史崔光遠爲太子少保癸亥以久旱徙市雩

祈雨五月辛巳貶宰相李峴蜀州刺史丁亥上御宣政殿試文經邦國等四科舉人乃以汝州刺史劉展爲滑州刺史以平盧軍節度都知兵馬使董秦爲濮州刺史六月乙未朔以右僕射裴冕爲御史大夫成都尹持節克劍南節度副大使本道觀察使以邠州刺史房瑒爲太子賓客以饒州刺史顏真卿爲昇州刺史克浙江西道節度使已巳以明州刺史呂延之爲越州刺史克浙江東道節度使以右羽林大將軍彭元曜爲鄭州刺史克陳鄭申光壽等州節度使秋七月乙丑朔以禮部尚書韋陟克東京留守太子少傅充國公李麟卒辛巳制以趙王係爲天下兵馬元帥司空兼侍中李光弼爲副丁亥以兵部尚書潞州大都督府長史潞沁節度霍國公王思禮兼太原尹克北京留守河東節度副大使刑部尚書王璵爲蒲州刺史克蒲同絳三州節度使八月乙亥襄州偏將康楚元逐刺史王政據城自守丙辰寧國公主自迴紇還宮副元帥李光弼兼幽州大都督府長史河北節度等使九月甲午襄州賊張嘉延襲破荊州澧朗復郢破歸

等州官吏皆奔竄戊辰新鑄大錢文如乾元重寶而重其輪用
一當五十以二十二斤成貫丁亥以太子少保崔光遠克荆襄等州
招討使右羽林大將軍王仲昇克申安沔等州節度使右羽林將軍
李抱真爲鄭州刺史鄭陳潁毫四州節度使庚寅逆胡史思明陷洛
陽副元帥李光弼守河陽汝鄭滑等州陷賊冬十月丁酉制親征史
思明竟不行乙巳李光弼奏破賊於城下壬戌宰相呂誼起復依前
平章事十一月甲子朔商州刺史韋倫破康楚元荆襄平庚午戶部
侍郎同平章事第五琦貶忠州長史御史大夫賀蘭進明貶秦州司
馬十二月癸巳朔神策將軍衛伯玉破賊於陝東彊子坂甲寅以御
史大夫史翹爲襄州刺史克山南東道節度觀察處置等使

三年春正月癸亥朔辛巳李光弼進位太尉兼中書令餘如故以杭
州刺史侯令儀爲昇州刺史克浙江西道節度兼江寧軍使戊子以
朔方節度使郭子儀兼邠寧鄜坊兩道節度使二月癸巳朔以右丞
崔寓爲蒲州刺史克蒲同晉絳等州節度使庚戌第五琦除名長流

夷州癸丑以太子少保崔光遠爲鳳翔尹秦隴節度使三月壬申以
京兆尹李若幽爲成都尹劔南節度使甲申以蒲州爲河中府其州
縣官吏所置同京兆河南二府四月甲午李光弼奏破賊於懷州河
陽甲辰以禮部尚書東京留守韋陟爲吏部尚書太子賓客房琯爲
禮部尚書以太子賓客平章事張鎰爲左散騎常侍太子賓客崔渙
爲大理卿是歲饑米斗至一千五百文戊申襄州軍亂殺節度使史
翹部將張維瑾據州叛丁巳夜彗出東方在婁胃間長四尺許戊午以
右丞蕭華爲河中尹兼御史中丞克同晉絳等州節度觀察處置使
己未以陝州刺史來瑱爲襄州刺史克山南東道襄鄧等十州節度
觀察處置等使庚申以右羽林大將軍郭英乂爲陝州刺史陝西節
度潼關防禦等使閏四月辛酉朔彗出西方其長數丈壬戌以禮部
尚書房琯爲晉州刺史甲子制彭王僅克河西節度大使克王儁北
庭節度大使涇王佺隴右節度大使杞王倕陝西節度大使興王佖
鳳翔節度大使蜀王傀邠寧節度大使並不出閤丁卯太原尹王思

禮進位司空甲戌天下兵馬元帥趙王係改封越王己卯以星文變異上御明鳳門大赦天下改乾元爲上元追封周太公望爲武成王依文宣王例置廟時大露自四月雨至閏月末不止米價翔貴人相食餓死者委骸于路壬午以刑部尚書王璵爲太常卿右散騎常侍韓擇木爲禮部尚書五月庚寅朔丙午以太子太傅韓國公苗晉卿爲侍中壬子黃門侍郎同中書門下三品呂諲爲太子賓客罷知政事癸丑以河南尹劉晏爲戶部侍郎勾當度支鑄錢鹽鐵等使是夜月掩昴六月乙丑詔先鑄重稜錢一當五十宜減當三十文開元宜一當十七月己丑朔丁未上皇自興慶宮移居西內丙辰開府高力士配流巫州內侍王承恩流播州魏悅流秦州左龍武大將軍陳玄禮致仕丙辰御史大夫崔器卒八月辛未吏部尚書韋陟卒丁丑以太子賓客呂諲爲州大都督府長史澧朗硤忠五州節度觀察處置等使己卯以將作監王昂爲河中尹本府晉絳等州節度使丁亥贈故興王詔爲恭懿太子九月甲午以荊州爲南都州曰江陵府官

吏制置同京兆其蜀郡先爲南京宜復爲蜀郡十月壬申以廬州刺史趙良弼爲越州刺史克浙江東道節度使青州刺史殷仲卿爲淄州刺史淄沂滄德棣等州節度使甲申以兵部侍郎尚衡爲青州刺史青登等州節度使十一月乙巳李光弼奏收懷州宋州刺史劉展赴鎮揚州揚州長史鄧景山以兵拒之爲展所敗展進陷揚潤昇等州十二月庚辰以右羽林軍大將軍李鼎爲鳳翔尹興鳳隴等州節度使癸未夜歲星掩房

二年春正月丁亥朔辛卯温州刺史季廣琛爲宣州刺史充浙江西道節度使甲午上不康皇后張氏刺血寫佛經甲寅詔府縣御史臺大理疏理繫囚死罪降從流流已下並釋放乙卯平盧軍兵馬使田神功生擒劉展楊潤平二月己未党項寇寶雞入散關陷鳳州殺刺史蕭悞鳳翔李鼎邀擊之癸亥以鳳翔尹崔光遠爲成都尹劔南節度度支營田觀察處置等使以太子詹事趙國公崔圓爲揚州大都督府長史淮南節度觀察等使辛未夜月有蝕之旣戊寅李光弼率

河陽之軍五萬與史思明之衆戰於北邙官軍敗績光弼僕固懷恩走保聞喜魚朝恩衛伯玉走保陝州河陽懷州共陷賊京師戒嚴癸未中書侍郎同中書門下三品李揆貶爲袁州長史以前河中尹蕭華爲中書侍郎同平章事集賢殿崇文館大學士兼修國史三月甲子史朝義率衆夜襲我陝州衛伯玉逆擊敗之戊戌史思明爲其子朝義所殺李光弼以失律讓太尉中書令許之授侍中河中尹晉絳等州節度觀察使夏四月乙亥朔嗣岐王珍得罪廢爲庶人於秦州安置連坐竇如玢崔昌處斬駙馬都尉楊洄薛履謙賜自盡左散騎常侍張鎬貶辰州司戶長任己未以吏部侍郎裴遵慶爲黃門侍郎同中書門下平章事青州刺史尚衡兗州刺史能元皓並奏破賊壬午梓州刺史段子璋叛襲破遂州殺刺史嗣號王巨東川節度使李奐戰敗奔成都五月甲午思明僞將滑州刺史令狐彰以滑州歸朝授彰御史中丞依前滑州刺史滑魏德貝相六州節度使乙未劔南節度使崔光遠率師與李奐擊敗段子璋於綿州擒子璋殺之綿州

平李光弼來朝進位太尉兼侍中克河南副元帥都統河南淮南
南東道五道行營節度鎮臨淮北京留守守司空太原尹河東節度
副大使霍國公王思禮卒辛丑以鴻臚卿趙國公管崇嗣爲太原尹
兼御史大夫克北京留守河東節度副大使壬子太子少傅宗正卿
李齊物卒六月癸丑朔己卯以鳳翔尹李鼎爲鄆州刺史隴右節度
營田等使秋七月癸未朔日有蝕之既大星皆見甲辰延英殿御座
梁上生玉芝一莖三花上製玉靈芝詩八月癸丑朔以中官李輔國
守兵部尚書於尚書省上輪臣百官送之酣宴竟日自七月霖雨至
是方止牆宇多壞漉魚道中辛巳以殿中監李若幽爲戶部尚書克
朔方鎮西北庭陳鄭等州節度使鎮絳州賜名國禎九月壬午朔壬
辰以太子賓客集賢殿學士昌黎伯韓擇木爲禮部尚書壬寅制朕
獲守不業敢忘謙冲欲垂範而自我亦去華而就實其乾元大聖光
天文武孝感等尊崇之稱何德以當之欽若昊天定時成歲春秋五
始義在體元惟以紀年更無潤色至于漢武飾以浮華非前王之茂

典豈求代而作則自今已後朕號唯稱皇帝其年號但稱元年去上
元之號其以今北庭路儀隲等州行營本管節度觀察等事移鎮絳
州王申嗣寧王棣薨癸酉河南副元帥李光弼破賊於許州城下收
復許州建辰月庚辰朔壬午詔天下見禁繫囚無輕重一切釋放丙
戌夜月有白冠癸巳以襄州刺史來瑱爲安州刺史克淮西申安斬
黃河等十六州節度使甲午党項奴刺寇梁州刺史李勉弃郡走丙
申党項寇奉天上不康百寮於佛寺齋僧丁未詔左降官流人一切
放還戊申中書侍郎平章事徐國公蕭華爲禮部尚書罷知政事以
尚書戶部侍郎元載同中書門下平章事以禮部尚書韓擇木爲太
子太保建巳月庚戌朔壬子楚州刺史崔旆獻定國寶玉十三枚一
曰玄黃天符如笏長八寸濶三寸上圓下方近圓有孔黃玉也二曰
玉雞毛文悉備白玉也三曰穀璧白玉也徑可五六寸其文粟粒無
雕鐫之迹四曰西王母白環二枚白玉也徑六七寸五曰碧色寶圓
而有光六曰如意寶珠形圓如雞卵光如月七日紅靺鞨大如巨栗

赤如櫻桃八曰琅玕珠二枚長一寸二分九曰玉玦形如玉環四分
缺一十曰玉印大如半手斜長理如鹿形陷入印中以印物則鹿形
著焉十一曰皇后採桑鉤長五六寸細如筋屈其末似真金又似銀
十二曰雷公石斧長四寸濶二寸無孔細緻如青玉十三寶置于日
中皆白氣連天佚表云楚州寺尼真如者恍惚上昇見天帝帝授以
十三寶曰中國有災宜以第二寶鎮之甲寅太至上至道聖皇天帝崩
於西內神龍殿上自仲春不豫聞上皇登遐不勝哀悸因茲大漸乙
丑詔皇太子監國又曰上天降寶獻自楚州因以體元叶乎五紀其
元年宜改爲寶應建巳月爲四月餘月並依常數仍依舊以正月一
日爲歲首丁卯宣遺詔是日上崩于長生殿年五十二羣臣上謚曰
文明武德大聖大宣孝皇帝廟號肅宗寶應二年三月庚午葬于建
陵

史臣曰臣每讀詩至許穆夫人聞宗國之顛覆周大夫傷宮室之忝
離其辭情於邑賦諭勲懇未嘗不廢書興嘆及觀天寶失馭流離奔

播又甚於詩人之於邑也當其戎羯負恩奄爲狴突豺豕遽興於轂
下胡越寧慮於舟中借人之戈持之反刺變生於不意也所幸太
王去國邇人不忘於周君新莽據圖黔首仍思於漢德是以宣皇帝
蒙六聖之遺業因百姓之樂推號令朔方旬日而車徒雲合旋師右
輔朞月而關隴弭平故兩都再復於鑾輿九廟復歆於黍稷觀其迎
上皇於蜀道陳拜慶於望賢父子於是感傷行路爲之隕涕昔太公
迎子或從家令之言而西伯事親靡怠寢門之問曾參孝已足以擬
倫然而道屈知幾志微遠略殘妖未殄宜先恢復之謀餘燼纔收何
暇昇平之禮方聽王璵伏奏輔國贊成紺轅躬籍于春郊翠幃先蠶
於廟館或御殿曉宣時令或登壇宿禮貴神禮即宜然時何暇給鍾
縣未移於奠簏思明已陷於洛陽是知祝史疇人安能及遠猶賴大
臣宣力諸將効忠旄頭終隕於三川杲日重明於六合比平王之遷
洛我則英雄論元帝之渡江彼誠么麼寧親復國肅廼休哉
贊曰犬羊犯順輦輅播遷兇徒竟斃景祚重延星馳蜀道雨泣望賢

唐紀十
孝宣之謚誰曰不然

唐書本紀卷第十

唐書本紀卷第十一

代宗

劉
聞人詮校刊沈桐園校

代宗睿文孝武皇帝諱豫肅宗長子母曰章敬皇太后吳氏以開元十四年十二月十三日生千東都上陽宮初名俶年十五封廣平王玄宗諸孫百餘上為嫡皇孫字量弘深寬而能斷喜懼不形於色仁孝溫恭動必由禮幼而好學尤專禮易玄宗鍾愛之祿山之亂京城陷賊從肅宗蒐兵靈武以上為天下兵馬元帥時朝廷草創兵募寡弱上推心示信招懷流散比至彭原兵眾數萬及肅宗迴幸鳳翔時房琯郭子儀繼戰不利賊鋒方銳屢來寇襲上選求勇幹頻挫其鋒聖慮遑寧士心大振及師進討百官辭送步出闕門方始乘馬迴紇葉護王子率兵入助勇冠諸蕃上接以優恩結為兄弟故香積之戰賊徒大敗遂委西京而遁雖子儀嗣業之奮命由上恩信結於士心

故人思自效既收京城令行禁止民庶按堵秋毫不犯耆老歡迎對之歔歔聞賊殘衆猶保陝郊即日長驅東趨號洛新店之後一戰大捷慶緒之黨十殲七八數旬之間河南底定兩都恢復二聖迴鑾統率之功推而不受肅宗還京大赦改封楚王乾元元年三月改封成王四月庚寅立爲皇太子改名豫上元末年兩宮不豫太子往來侍疾躬嘗藥膳衣不解帶者久之及承監國之命流涕從之寶應元年四月肅宗大漸所幸張皇后無子后懼上功高難制陰引越王係於宮中將圖廢立乙丑皇后矯詔召太子中官李輔國程元振素知之乃勒兵於凌霄門俟太子至即衛從太子入飛龍廐以俟其變是夕勒兵於三殿收捕越王係及內官朱光輝馬英俊等禁錮之幽皇后於別殿丁卯肅宗崩元振等始迎上於九仙門見羣臣行監國之禮已巳即皇帝位於柩前甲戌詔國之大事戎馬爲先朝有舊章親賢是屬故求諸必當用制於中權存乎至公豈慙於內舉特進奉節郡王适可天下兵馬元帥乙亥以兵部尚書判元帥行軍閑廐等使李

輔國進號尚父飛龍閑廐副使程元振為右監門將軍流宦官朱光
輝啖庭瑤陳仙甫等於黔中五月己卯朔以李輔國為司空兼中書
令餘如故辛卯制曰三年之喪天下達禮苟或變革何以教人朕遵
此閔凶攀號罔極公卿固請俾聽朝務斬焉緣經痛貫心靈豈可使
議公除遽移諒闇昨見所司儀注今月十三日大祥十五日從吉仰
憑遺制又欲抑予竊惟哀思深謂未可其百寮並以此釋服朕將繼
武丁之道素冠之詩恭默再固不忍權奪凡庶在位宜悉哀懷宰臣
苗晉卿等三十表請依遺制方聽政丙戌嗣魯王宇改封鄒王奉節
郡王适進封魯王李光弼進封臨淮王貶禮部尚書蕭華為陝州司
馬改行乾元錢重稜小錢一當二重稜大錢一當三丙申以戶部侍
郎元載同中書門下平章事克度支轉運使改乾元大小錢並一當
一丁酉御丹鳳樓大赦子儀光弼李光進諸道節度使並加實封四
月十七日立功人並號寶應功臣内外文武官三品已上進爵四品
已下加階諸州防禦使並停内外官三考一轉益昌郡王邈進封鄭

王延慶郡王迥進封韓王故庶人皇后王氏故庶人太子瑛鄂王瑋
光王琚並宜復封號棣王琰永王璘並與昭雪建昌王追封齊王崇
恩王追封衛王靈昌王追封鄆王壬寅以來填復爲襄州刺史山南東
道節度使六月己酉朔百寮臨于西宮上不視朝自是每朔望皆如
之迄于山陵凡人臣有事辭見先臨西宮然後詣朝改豫州爲蔡州
避上名也侍中苗晉卿以老疾請三日一入中書從之己未罷尚父
李輔國判元帥行軍及兵部尚書閑廐節使輔國請遜位辛酉以輔
國爲博陵王罷中書令許朝朔望壬申以通州刺史劉晏爲戶部侍
郎兼御史大夫京兆尹克度支轉運鹽鐵諸道鑄錢等使秋七月己
卯朔辛巳觀軍容使魚朝恩封馮翊郡開國公宦官程元振爲鎮軍
大將軍保定郡開國公乙酉襄州刺史裴義長流費州賜死於藍田
驛庚寅詔不許廩使閱投匭人文狀賜道州司馬敬羽自盡來填自
襄州來朝郭子儀自河中來朝八月己酉朔自七月不雨至此月癸
丑方雨庚午夜西北有赤光亘天貫紫微漸移東北彌漫半天貶太

子少傳李遵爲袁州刺史台州賊袁晁陷台州連陷浙東州縣九月
丁丑朔魯王适改封雍王以山南東道節度使來瑱爲兵部尚書同
中書門下平章事節度如故程元振進封邠國公丙申右僕射山陵
使裴冕貶施州刺史戊戌迴紇登里可汗率衆來助國討逆令御史
大夫尚衡宣慰之甲午太州至陝州二百餘里黃河清澄澈見底甲
午祕書監韓穎中書舍人劉烜配流嶺表尋賜死坐狎昵李輔國也
冬十月辛酉詔天下兵馬元帥雍王統河東朔方及諸道行營迴紇
等兵十餘萬討史朝義會軍於陝州加朔方行營節度使大寧郡王
僕固懷恩同中書門下平章事丁卯夜盜殺李輔國於其第竊首而
去戊辰元帥雍王率諸軍進發留郭英乂魚朝恩鎮陝州壬申王師
次洛陽北郊甲戌戰于橫水賊大敗俘斬六萬計史朝義奔翼州乙
亥雍王奏收東京河陽汴鄭滑相魏等州乙酉陝西節度使郭英乂
權知東京畱守丁酉僞恒州節度使張忠志以趙定深恒易五州歸
順以忠志檢校禮部尚書恒州刺史克成德軍節度使賜姓名曰李

寶臣於是河北州郡悉平賊范陽尹李懷仙斬史朝義首來獻請降
十二月庚戌太子大師邠國公韋見素薨辛未僕固懷恩爲尚書左
僕射兼中書令靈州大都督府長史河北副元帥邛州新置鎮南軍
是歲江東大疫死者過半吐蕃陷我臨洮秦成渭等州二年春正月
丁亥朔甲午戶部尚書兼御史大夫都統淮南節度觀察等使越國
公李岍卒國子祭酒兼御史大夫京兆尹劉晏爲吏部尚書同中書
門下平章事度支諸使如故壬寅制開府儀同三司行兵部尚書同
中書門下平章事克山東道節度觀察處置等使上柱國潁國公來
瑱削在身官爵長流播州尋賜死于路閏月戊申以史朝義下降將
李寶臣爲檢校禮部尚書兼御史大夫恒州刺史清河郡王克成德
軍節度使薛嵩爲檢校刑部尚書相州刺史相衛等州節度使李懷
仙檢校兵部尚書兼侍中武威郡王幽州節度使田承嗣檢校戶部
尚書魏州刺史廂門郡王魏博等州都防禦使二月甲午迴紇登里
可汗辭歸蕃三月甲辰朔襄州右兵馬使梁崇義殺大將李昭據城

自固乃授崇義襄州刺史山南東道節度使丁未袁係破袁晁之衆
於浙東玄宗肅宗歸祔山陵自二月一日廢朝至於晦日百寮素服
詣延英門通名起居四月戊寅朔太州依舊爲華州太陰縣爲華陰
縣庚辰河南副元帥李光弼奏生擒袁晁浙東州縣盡平辛巳群臣
請上尊號五月癸卯朔丙寅尚書省試制舉人命左右丞侍郎對試
賜食如舊儀太常卿杜鴻漸奏婚槩合給鹵簿望於國立大功及二
等已上親則給餘不在給限從之六月癸酉朔癸未以陳鄭澤潞節
度使李抱王檢校司空封武威郡王河中節度使王昂檢校刑部尚
書封邛國公同華節度使李懷讓檢校工部尚書同日入省宰相
送上甲申以前淮西節度使王仲昇爲右羽林大將軍兼御史大夫
六軍將軍兼大夫自仲昇始也甲午觀軍容使魚朝恩自陝州入朝
上御達禮門命公卿百寮觀兵馬同華節度使李懷讓自殺爲程元
振所構秋七月壬寅朔戊申群臣上尊號曰寶應元聖文武皇帝御
含元殿受冊壬子御宣政殿宣制改元曰廣德大赦天下常赦不原

者咸赦除之安祿山史思明親族應在諸道一切原免不問民戶三
丁免一丁庸租稅依舊每畝二升男子二十成丁五十入老元帥雍
王兼尚書令河北副元帥僕固懷恩加太保迴紇登里可汗進徽號
功臣皆賜鐵券藏名太廟畫像凌煙閣刺史縣令自今後改轉刺史
以三年為限縣令四年為限員外及攝試不得釐務丁已僕固瑒兼
御史大夫克朔方行營節度是月吐蕃大寇河隴陷我秦成渭三州
入大震關陷蘭廓河都洮岷等州盜有隴右之地八月以荆南節度
使李峴為宗正卿九月壬戌朔僕固懷恩拒命於汾州遣宰臣裴遵
慶往宣撫之己丑吐蕃寇涇州刺史高暉以城降因為吐蕃鄉導冬
十月庚午朔辛未高暉引吐蕃犯京畿寇奉天武功盤屋等縣蕃軍
自司竹園渡渭循南山而東丙子駕幸陝州上出苑門射生將王獻
忠率四百騎叛脇豐王已下十王歸京從官多由南山諸谷赴行在
郭子儀收合散卒屯於商州丁丑次華州官吏藏竄無復儲擬會魚
朝恩領神策軍自陝來迎駕乃幸朝恩軍戊寅吐蕃入京師立廣武

王承宏爲帝仍逼前翰林學士于可封爲制封拜辛巳車駕至陝州
子儀在商州會六軍使張知節烏崇福長孫全緒等率兵繼至軍威
遂振舊將王甫誘聚京城惡少齊擊街鼓於朱雀街蕃軍震懾狼狽
奔潰庚寅子儀收京城壬辰以宰臣元載判天下元帥行軍司馬京
兆尹兼吏部侍郎嚴武爲黃門侍郎卽州刺史第五琦爲京兆尹兼
御史大夫癸巳以郭子儀爲京留守高暉聞吐蕃潰以三百騎東奔
至潼關爲關守李伯越所殺十一月辛丑朔太常博士柳伋上疏以
蕃寇犯京師罪由程元振請斬之以謝天下上甚嘉納以元振有保
護之功削在身官爵放歸田里十二月甲辰宦官市舶使呂太一逐
廣南節度使張體縱下大掠廣州丁亥車駕發陝郡還京辛卯鄂州
大風火發江中焚船三千艘焚居人廬舍二千家甲午上至自陝州
乙未以侍中苗晉卿爲太保黃門侍郎同平章事裴遵慶爲太子少
傅並罷知政事宗正卿梁國公李峴爲黃門侍郎同中書門下平章
事丙申放廣武王承宏于華州一切不問丁酉朔方行營節度使僕

固瑒爲悵下梟首來獻懷恩聞瑒死燒營遁入吐蕃朝臣稱賀上不悅曰朕之涼德信不及人致勲臣顛覆用增愧慙何至賀焉程元振自三原縣衣婦人服入京城京兆府擒之以聞乃下御史臺鞠問吐蕃陷松州維州雲山城籠城

二年春正月己亥朔壬寅御史臺以程元振獄狀聞配流漆州旣行追念舊勲特矜遐裔令於江陵府安置甲辰復置京畿觀察使以御史中丞領之癸卯尚書右丞顏真卿爲刑部尚書兼御史大夫充朔方宣慰使癸亥吏部尚書同平章事度支轉運使劉晏爲太子賓客黃門侍郎同平章事李峴爲太子詹事並罷知政事以前右散騎常侍王縉爲黃門侍郎大常卿杜鴻漸爲兵部侍郎並同中書門下平章事罷度支使以戶部侍郎第五琦專判度支及諸道鹽鐵轉運鑄錢等使甲子元帥尚書令雍王三上章讓皇太子第五琦奏諸道置常平倉使司量置本錢和糴許之丁卯司徒兼中書令郭子儀充河東副元帥河中等處觀察兼雲州大都督單于鎮北大都護二月己

已朔冊天下兵馬元帥尚書令雍王适爲皇太子癸酉上親薦獻太
清宮太廟乙亥祀昊天上帝於圓丘即日還宮戊寅以澧州刺史裴
冕爲左僕射兼御史大夫充東都河南江南淮南轉運使已未第五
琦開決汴河五月丁酉朔戊午勅中書門下兩省加置散騎常侍四
員官爲正三品庚申罷歲貢孝悌力田童子等科甲子禁錮作珠翠
等委所司切加捉搦癸未制太保兼中書令靈州大都督府長史單
于鎮北副大都護充朔方節度開內度支營田鹽池押諸蕃部落副
大使知節度事六城水運使河北副元帥上柱國大寧郡王僕固懷
恩先任靈州大都督府長史彈鎮北副元帥朔方節度使宜並停其
太保兼尚書令大寧郡王如故七月已酉朔河南副元帥太尉兼侍
中臨淮王李光弼薨於徐州廢朝三日判度支第五琦兼京兆尹御
史大夫八月丁卯宰臣王縉爲侍中持節都統河南淮南淮南山南
東道節度行營事進封太原郡公固讓侍郎從之宰相杜鴻漸判門
下省事癸巳王縉兼領東京畱守九月乙未朔丙申詔徵河中兵討

吐蕃將發是夜軍衆誼譟劫節度使崔寓家財及民家財產殆盡皆重裝而行吏不能禁自七月大雨未止京城米斗值一千文蝗食田丙午河東節度使辛雲京檢校尚書右僕射同中書門下平章事太原尹北京留守已酉江南西道觀察洪州刺史張鎬卒辛亥河東副元帥中書令汾陽郡王郭子儀加大尉充北道邠寧涇原河西已東通和吐蕃及朔方招撫使陳鄭澤潞節度使李抱玉進位司徒充南道通和吐蕃使鳳翔秦隴臨洮東觀察使子儀三表懇讓太尉許之己未劔南節度嚴武攻拔吐蕃當狗城破蕃軍七萬尚書左丞楊綰知東京選禮部侍郎賈至知東都舉兩都分舉選自至始也辛酉以太子詹事李峴爲吏部尚書兼御史大夫知江南東西及福建道選事并觀農宣慰使仍命洪州刺史李勉副知選事是秋蝗食田殆盡閔輔尤甚米斗千錢冬十月丙寅僕固懷恩引吐蕃二萬寇邠州節度使白孝德閉城拒守丁卯寇奉天京師戒嚴先鋒郭晞斬賊營於邠州西俘斬數百計子儀屯涇陽蕃軍挑戰子儀不出甲申河南

尹蘇震卒劔南嚴武奏收吐蕃鹽井城十一月乙未懷恩與蕃軍自
潰京師解嚴丁未子儀自涇陽入覲詔宰臣百寮迎之於開遠門上
御安福寺待之十二月乙丑加子儀關內河中副元帥兼尚書令吏
部侍郎暢瓘爲左散騎常侍河中尹子儀三表讓尚書令詞情懇切
優詔從之丁卯夜星流如雨戊辰子儀於鄯首領副元帥事宰臣百
寮送仍令射生五百騎戎服自光範門送至省門右僕射郭英乂以
樂迎之是日便赴奉天是歲戶部計帳管戶二百九十三萬三千一
百二十五口一千六百九十二萬三百八十六

永泰元年春正月癸巳朔制曰叶五紀者建號以體元授四時者布
和而順氣天心可見人欲是從爰立大中之道式受惟新之命朕嗣
膺下武獲主萬方顧以薄德乘茲艱運戎麾問罪今已十年飲至策
勲惟凶渠之授首勞師黷武豈人主之用心軍役屢興干戈未戢茫
茫士庶斃于鋒鏑皇穹以朕爲子蒼生以朕爲父至德不能被物精
誠不能動天俾我生靈淪於溝壑非朕之咎孰之過歟朕所以馭朽

懸旌坐而待曙勞懷罪已之念延想安人之策亦惟羣公卿士百辟
庶寮咸聽朕命協宣乃力履清白之道還淳素之風率是黎元歸于
仁壽君臣一德何以尚茲廼者刑政不修惠化未洽旣盡財力良多
抵犯靜惟哀矜實軫于懷今將大振綱維益明懲勸肇舉改元之典
弘敷在宥之澤可大赦天下改廣德三年爲永泰元年是日雪盈尺
戊申澤潞李抱玉兼鳳翔隴右節度使兼南道通和吐蕃鳳翔秦隴臨
洮已東觀察處置等使仍命四鎮行營節度使馬璘爲副和吐蕃使
癸丑罷岐州之鳳翔縣併入天興縣乙卯左散騎常侍高適卒戊午
劔南節度使嚴武加檢校吏部尚書山南節度使張獻誠加檢校工
部尚書以前太子少保王璵爲太子少師前袁州刺史李遵爲太子
少保聽朝朔望二月甲子夜雷霆震擊丁丑內出宮女千人品官六
百人守洛陽宮戊寅党項羌寇富平焚定陵寢殿庚辰儀王璿薨諸
陵署復隸太常寺戊子河西党項永定等十二州部落內屬請置宜
芳等十五州許之三月壬辰朔詔左僕射裴冕右僕射郭英乂太子

少傅裴遵慶檢校太子少保白志貞太子詹事減希讓左散騎常侍
暢璫檢校刑部尚書王昂高昇檢校工部尚書崔渙吏部侍郎李季
卿王延昌禮部侍郎賈至涇王傳吳令瑤等十三人並集賢院待詔
上以勲臣罷節制者京師無職事乃合於禁門書院間以文儒公卿
寵之也仍特給殮奉錢三千貫庚子夜降霜木有冰歲饑米斗千錢
諸穀皆貴丙午鳳翔李抱玉讓司徒從之授左僕射同平章事庚戌
吐蕃請和詔宰臣元載杜鴻漸與蕃使同盟于興唐寺辛亥大風拔
木是春大旱京師米貴斛至萬錢夏四月己巳乃雨戊子太保致仕
苗晉卿薨庚寅劔南節度使檢校吏部尚書嚴武卒五月癸丑以尚
書右僕射定襄郡王郭英乂爲成都尹御史大夫充劔南節度使是
月麥稔判度支第五琦奏請十畝稅一畝效古什一而徵從之六月
癸亥吏部尚書李峴南選廻至江陵貶衢州刺史自春無雷至此月
甲申大風而雷代州置代北軍平州置柳城析通州石鼓縣置巴渠
縣隴七月辛卯朔淄青節度使侯希逸爲副將李懷玉所逐制以鄭

王邈爲平盧巡青節度大使令懷王權知畱後事以久旱遣近臣分錄京城諸獄繫囚甲午昇平公主出降駙馬都尉郭曖庚子雨時久旱京師米斗一千四百他穀食稱是八月乙亥河南道副元帥涇原節度使馬璘封扶風郡王九月辛卯太白經天丁酉僕固懷恩死于靈州之鳴沙縣時懷恩誘吐蕃數十萬寇邠州客將尚品息贊磨尚悉東贊等寇奉天醴泉党項羗渾奴刺寇同州及奉天逼鳳翔府盤屋縣京師戒嚴時以星變羗虜入寇內出仁王佛經兩輦付資聖西明二佛寺置百尺高座講之及奴虜寇逼京畿方罷講已酉郭子儀自河中至進屯涇陽李忠臣屯東渭橋李光進屯雲陽馬璘郝王屯便橋駱奉仙李伯越屯塾屋李抱玉屯鳳翔周智光屯同州杜冕屯坊州上親率六軍屯苑內庚戌下詔親征內官魚朝恩上言請括私馬京城男子悉單衣團結塞京城二門之一士庶大駭有踰垣鑿竇出城者更不能禁自丙午至甲寅大雨平地水流丁巳吐蕃大掠京畿男女數萬計焚廬舍而去同華節度周智光以兵追擊于澄城

破賊萬計冬十月己未復講仁王經於資聖寺吐蕃至邠州與迴紇
相遇復合從入寇辛酉逼奉天癸亥党項攻同州焚州民廬舍丁丑
郭子儀說諭迴紇令與吐蕃疑貳庚辰子儀先鋒將白元光合迴紇
軍擊吐蕃之衆於靈臺縣之西原斬首五萬級俘獲人畜凡三百里
不絕辛巳京師解嚴壬午僕固懷恩大將僕固名臣以千騎來降詔
稅百官錢市絹十萬以賞迴紇乙酉迴紇首領胡祿都督來朝癸卯
朔方將李迴方奏收靈武郡丁亥分宣饒歙戶口於蘄浦縣置池州
分信州弋陽置貴溪縣閏十月辛卯以京兆少尹黎幹爲京兆尹丙
午封朔方大將孫守亮等九人爲異姓王李國臣等十三人爲同姓
王丁亥百寮上表以軍興急於糧餉請納職田以助費從之戊申進
封渭北節度使李光進爲武威郡王以刑部侍郎路嗣恭檢校工部
尚書兼御史大夫靈州大都督府長史充關內副元帥兼知朔方節
度等使劔南節度使郭英乂爲其檢校西川兵馬使崔旰所殺邛州
栢茂林瀘州楊子琳劔南李昌巵皆起兵討旰蜀中亂十一月宰臣

河南都統王縉請減諸道軍資錢四十萬貫修洛陽宮從之十二月
已酉勅如聞諸州承本道節度觀察使牒科役百姓致戶口凋弊此
後委轉運使察訪以聞

二年春正月丁巳朔大雪平地二尺壬申減子孫襲實封者半祖永
爲常式乙酉制治道同歸師氏爲上化人成俗必務于學俊造之士
皆從此途國之貴遊罔不受業修文行忠信之教崇祇庸孝友之德
盡其師道乃謂成人然後揚于王庭敷以政事徵之以理任之以官
實於周行莫匪邦彥樂得賢也其在茲乎朕志承理體尤重儒術先
王設教敢不虔行頃以戎狄多虞急於經略太學空設諸生蓋寡絃
誦之地寂寥無聲函丈之間殆將不掃上庠及此甚用閔焉今寓縣
人寧文武並備方投戈而講藝俾釋菜以行禮使四科咸進六藝復
興神人以和風化浸美日用此道將無間然其諸道節度觀察都防
禦等使朕之腹心久鎮方面眷其子弟爲奉義方修德立身是資藝
業恐干戈之後學校尚微僻居遠方無所咨稟負經來學宜集京師

其宰相朝官六軍諸將子弟欲得習學可並補國子學生其中身雖有官欲附學讀書者亦聽其學官委中書門下選行業堪爲師範者充其學生負數所習經業供承糧料增修學館委本司條奏以聞丙戌以戶部尚書劉晏充東都京畿河南淮南江南東西道湖南荆南山南東道轉運平鑄錢鹽鐵等使以戶部侍郎第五琦充京畿關內河東劔南西道轉運常平鑄錢鹽鐵使至是天下財賦始分理焉二月丁亥朔釋奠於國學賜宰臣百官殮錢五百貫於國學食壬辰鎮南都護依舊爲安南都護府乙未貶刑部尚書顏真卿爲峽州貳外別駕以不附元載載陷之於罪也壬子命黃門侍郎同平章事杜鴻漸兼成都尹持節充山南西道劔南東川等道副元帥仍充劔南西川節度使以平郭英乂之亂也以四鎮行營節度使馬璘兼邠州刺史癸丑以山南西道節度使梁州刺史張獻誠兼充劔南東川節度觀察使邛州刺史栢茂林充邛南防禦使劔南西山兵馬使崔旰爲茂州刺史充劔南西山防禦使從杜鴻漸請也三月辛未張獻誠與崔旰

戰于梓州爲盱所敗僅以身免夏四月辛亥詔尚書省郎中授中州刺史貞外郎授下州刺史爲定制五月丙辰稅青苗地錢使殿中侍御史韋光裔諸道稅地迴是歲得錢四百九十萬貫自乾元已未天下用兵百官俸錢折乃議於天下地畝青苗上量配稅錢命御史府差使徵之以充百官俸料每年據數均給之歲以爲常式六月戊戌以淮南節度使崔回檢校尚書右僕射自春旱此月庚子始雨丁未日重輪其夜月重輪穰七月辛酉檢校兵部尚書衢州刺史李峴卒自五月大雨洛水泛溢漂溺居人廬舍二十坊河南諸州水加荆南節度使衛伯玉檢校工部尚書癸未太廟二室芝草生八月丁亥國子監釋奠復用牲牢上元二年詔諸祠獻熟至是魚朝恩請復舊制壬寅以茂州刺史崔旰爲成都尹兼御史大夫劔南西川節度行軍司馬卬南防禦使卬州刺史栢茂林爲卬南節度使從杜鴻漸所請也癸卯太子少保裴遵慶爲吏部尚書吏部尚書崔寓爲太子少傅甲辰以開府儀同三司右監衛大將軍觀軍容宣慰處置使神策軍兵

馬使上柱國馮翊郡開國公魚朝恩加內侍監判國子監事充鴻臚
禮賓等使進封鄭國公辛亥以檢校禮部尚書裴士淹充禮儀使九
月庚申京兆尹黎幹以京城薪炭不給奏開漕渠自南山谷口入京
城至薦福寺東街北抵景風延喜門入苑闊八尺深一丈渠成是日
上幸安福門以觀之丙子宣州刺史李佚坐贓二十四萬貫集衆杖
死籍沒其家冬十月癸未朔己丑宗正卿吳王祗奏上皇室永泰新
論二十卷太常博士柳芳撰和蕃使楊濟與蕃使論位藏等來朝丙
申令宰臣宴論位藏於中書省十一月甲寅乾陵令於陵署得赤兔
以獻丙辰詔古者量其國用而立稅典必於經費由之重輕公田之
籍可謂通制履畝而稅斯誠弊法所期折中以便於時億兆不康君
孰與足故愛人之體先以博施富國之源必均節用朕自臨宸極比
屬艱難嘗欲闡淳朴之風守冲儉之道每念黎庶思致和平而邊事
猶殷戎車屢駕軍興取給皆出邦畿九伐之師尚勤王略千金之費
重困吾人乃者遵冉有之言守周公之制什而稅一務於行古今則

編戶流亡而墾田減稅計量入之數甚倍征之法納隍之懼當宁軫懷慮失三農憂深萬姓務從省約稍異蠲除用申勸卹之懷以救悞娶之弊京兆府今年合徵八十二萬五千石數內宜減放一十七萬五千石青苗地頭錢宜三分取一在京諸司官負久不請俸頗聞艱辛其諸州府縣官及折衝府官職田據苗子多少三分取一隨處糶貨市輕貨以送上都納青苗錢庫以助均給百官甲子日長至上御含元殿下制大赦天下改永泰二年爲大曆元年十二月己亥慧起匏瓜其長尺餘犯宦者星癸卯同華節度使周智光專殺陝州監軍張志斌前虢州刺史龐充據華州謀叛是冬雪

二年春正月壬子朔丁巳密詔關內河東副元帥郭子儀治兵討周智光壬戌貶智光爲澧州刺史甲子以兵部侍郎張仲光爲華州刺史潼關防禦使大理卿敬括爲同州刺史長春宮等使是日周智光帳下將斬智光并子元耀元幹三首傳之以獻已巳詔潼關置兵三千癸酉詔天文著象職在於疇人識緯不經蠹深於疑衆蓋有國之禁

非私家所藏雖裨寵明徵子產尚推之人事王彤必驗景略猶實於
典刑況動皆訛謬率是矯誣者乎故聖人以經籍之義資理化之本
側言曲學寔紊大猷左道之亂政俾彝倫而攸叙自四方多故一紀
于茲或有妄庸輒陳休咎假造符命私習星曆共肆窮鄉之辯相傳
委巷之譚作僞多端順非僥澤焚惑州縣註誤閭閻壞紀挾邪莫逾
於此其玄象器局天文圖書七曜曆太一雷公式等私家不合輒有
今後天下諸州府切宜禁斷本處分明榜示嚴加捉搦先藏蓄此等
書者勅到十日內送官本處長吏集衆焚毀限外隱藏爲人所告者
先決一百畱禁奏聞所告人有官即與超資注擬無官者給賞錢五
百貫兩京委御史臺處分各州方面勲臣洎百僚庶尹罔不誠亮王
室簡于朕心無近儉人愼乃有位端本靜末其誠之哉丁丑昇魏州
爲大都督府戊寅勅同華兩州頃因盜據民力凋殘宜給復二年一
切蠲免庚辰禁王公宗子郡縣主之家不得與軍將婚姻交好委御
史臺察訪彈奏二月壬午幸昆明池踏青丙戌封華州牙將姚懷爲

感義郡王李延俊爲承化郡王以斬智光之功也郭子儀自河中来朝癸卯宰臣元載王縉左僕射裴冕戶部侍郎第五琦京兆尹黎幹各出錢三十萬置宴於子儀之第三月辛亥夜大風丁巳河中府獻玄狐汴宋節度使田神功來朝戊辰貶太子少保李遵永州司馬坐賊也甲戌魚朝恩宴子儀宰相節度度支使京兆尹於私第乙亥子儀亦置宴于其第戊寅田神功宴于其第時以子儀元臣寇難漸平蹈舞王化乃置酒連宴酒酣皆起舞公卿大臣列坐於席者百子儀朝恩神功一宴費至十萬貫夏四月己亥以江南西道都團練觀察等使洪州刺史李冕爲京兆尹刑部侍郎魏少遊爲洪州刺史兼御史大夫江西觀察團練等使庚子宰臣內侍魚朝恩與吐蕃同盟於唐興寺丙午加田神功檢校右僕射癸酉以工部侍郎徐浩爲廣州刺史嶺南節度觀察使六月戊戌山南劔南副元帥杜鴻漸自蜀入朝壬寅荆南節度使衛伯玉封城陽郡王癸卯御史大夫王翊卒秋七月戊申朔以右散騎常侍于休烈爲檢校工部尚書知省事時

方面勲臣昇八座者多非正貢朝命正貢者以知省事爲名以中書
舍人張延賞檢校河南尹丙寅以劔南西川節度行軍司馬崔旰劔
南節度觀察等使遂州刺史杜濟爲劔南東川節度觀察等使以杭
州刺史張伯儀爲安南都護癸酉析道州延唐縣置大曆縣甲戌丙
時有白氣竟天八月庚辰鳳翔節度使李抱玉來朝壬午月入氐丙
戌渤海朝貢辛卯潭衡水災丙申月犯畢壬寅太常卿駙馬都尉姜
慶初得罪賜自盡勅陵廟署復隸宗正寺九月戊申朔歲星守東井
七日甲寅吐蕃寇靈州進寇邠州詔子儀率師三萬自河中鎮涇陽
京師戒嚴戊午夜白霧起西北竟天子儀移鎮奉天乙丑晝有大流
星出于午没于亥命左丞李涵宣慰河北焚惑犯南斗辛未韎韐使
來朝桂州山獠陷州城刺史李良遁去十月戊寅靈州奏破吐蕃二
萬京師解嚴甲申減京官職田三分之一給軍糧乙酉醴泉出于櫟
陽飲之愈疾迴紇党項使來朝癸卯上御紫宸殿策試茂才異行安
貧樂道孝悌力田高蹈不仕等四科舉人十一月庚申改黃門侍郎

依舊爲門下侍郎詔曰春秋以九命作上公而謂之宰臣者三公之職漢制中書令出納詔命典司樞密侍中上殿稱制參議政事魏晉已還益重其任職有關於公府事不係於尚書雖陳啓沃之謀未專宰臣之稱所以委遇斯大品秩非崇至于國朝實執其政當左輔右弼之寄總代天理物之名典領百寮陶鎔景化豈可具瞻之地命數不加固當進以等威副其僉屬其侍中中書令宜升入正二品門下中書侍郎升入正三品壬戌夜月暈南北河東并鎮星入輿鬼久之方散甲子月去軒轅一尺已丑率百官京城士庶出錢以助軍壬申京師地震自東北來其聲如雷十二月甲申鳳翔李抱王來朝丁酉太原節度使辛雲京來朝癸惑入壁壘戊戌黑氣如塵竟北方是秋河東河南淮南浙江東西福建等道五十五州奏水災

三年春正月丙午朔辛亥劔南西山罷乾州管招武寧遠二縣壬子夜月掩畢甲子冊新羅國王金乾運母爲太妃甲戌以工部侍郎蔣渙爲尚書左丞江西團練觀察使蘇州刺史韋元甫爲尚書右丞左

承李涵右承賈至並爲兵部侍郎乙亥永和公主薨二月己卯以常
州刺史李栖筠蘇州刺史兼御史中丞浙西團練觀察使壬午邠寧
節餽馬璘來朝三月乙巳朔日有蝕之壬申割恒州衛唐縣置洹州
以靈壽恒陽隸之夏四月戊寅以山南西道節度使鄧國公張獻誠
爲檢校戶部尚書以疾辭位也右羽林將軍張獻恭爲梁州刺史兼
御史中丞充山南西道節度觀察使兄獻誠所薦也壬寅滑亳節度
使令狐彰加檢校工部尚書劔南西川節度使兼御史大夫崔旰來
朝五月戊申加崔旰檢校右散騎常侍乙卯追謚故齊王倓爲承天
皇帝興信公主亡女張氏爲恭順皇后祔葬辛酉改桂州臨源縣爲
全義縣癸酉以左散騎常侍崔昭爲京兆尹是日地震戊辰以劔南
西川節度使崔旰檢校工部尚書改名寧寧爲栢茂林楊子琳所攻
寧旣入朝子琳乘虛襲據成都府朝廷憂之即日詔寧還成都庚午
以邛州刺史鮮于叔明爲梓州刺史充劔南東川節度使六月戊子
承天皇帝祔奉天皇帝廟同殿異室庚寅太子少師王璵卒壬辰幽

州節度使檢校侍中幽州大都督府長史李懷仙爲麾下兵馬使朱希彩所殺庚子淮南節度使檢校尚書左僕射知省事楊州大都督府長史趙國公崔圓卒閏月己酉郭子儀加司徒庚申宰臣充河南副元帥王縉兼幽州節度使以尚書右丞韋元甫楊州大都督府長史兼御史大夫克淮南節度觀察等使丁卯以幽州節度副使試太常卿朱希彩知幽州畱後遣兵部侍郎李涵兼御史大夫使河北宣慰以幽州亂故也庚午相州薛嵩魏州田承嗣恒州李寶臣並加左右僕射七月壬申崔寧弟寬攻破楊子琳收復成都府是月五星並聚於東井占曰中國之利也乙亥王縉赴鎮州八月己未月掩畢辛酉月入東井壬戌吐蕃十萬寇靈武焚惑犯太微垣丁卯吐蕃寇邠州京師戒嚴戊辰邠寧節度使馬磷破吐蕃二萬於邠州御史大夫崔渙爲稅地青苗錢使給百官俸錢不平詔尚書左丞蔣渙按鞫貶崔渙爲道州刺史庚午河東節度使檢校左僕射太原尹同中書門下平章事辛雲京卒門下侍郎同中書門下平章事兼幽州長史

持節河南副元帥都統河南淮西山南東道諸節度行營兼幽州盧龍等軍節度使太微官使弘文館大學士兼東都留守齊國公王綰兼太原尹北都留守充河東軍節度餘官使並如故辛未以門下侍郎同中書門下平章事山劔副元帥太清宮使崇玄館大學士杜鴻漸兼東都留守九月壬申郭子儀自河中移鎮奉天歲星入墮鬼丁丑濟王環薨焚惑入太微垣壬午吐蕃寇靈州甲申以尚書左丞蔣渙爲華州刺史充鎮國軍潼關防禦使丙戌檢校戶部尚書知省事鄧州國公張獻誠卒丁亥工部尚書趙國珍卒庚寅以前華州刺史張重光爲尚書左丞壬辰靈州將白元光破吐蕃二萬於靈武戊戌靈武奏破吐蕃六萬百寮稱賀京師解嚴冬十月甲寅朔方畱後靈武大都督府長史常讓光加檢校工部尚書乙未以京兆尹李勉爲廣州刺史充嶺南節度使丁卯子儀自奉天來朝十一月丁亥幽州畱後朱希彩爲幽州長史充幽州盧龍節度使癸巳加廊下百官厨料增舊五分之一十二月壬寅道州刺史崔渙卒己酉以邠寧節度

使馬璘爲涇原節度移鎮涇州其郃寧割穎朔方軍邠州將吏以燒馬坊爲亂兵馬使段秀實斬其兇首八人方定

四年春正月庚午朔甲戌大風乙亥大雪平地盈尺甲申日有蝕之子儀回河中戊子勅有司定王公士庶每戶秋錢分上中下三等宗室穎州刺史李岵專殺法司以議親宜賜自盡乙未福建觀察使李承昭請徙汀州於長汀縣之白石村從之黑衣大食國使朝貢二月乙巳以瀘州刺史楊子琳爲陝州刺史乙卯宰臣杜鴻漸讓山劔副元帥從之丙辰夜地震有聲如雷者三辛酉以湖南都團練觀察使衡州刺史韋之晉爲潭州刺史因是徙湖南軍於潭州江西團練使魏少遊來朝三月壬申詔夫計人而置官度事而賦任因時立制損益在焉吏足以理人人足以奉吏則官稱其祿祿當其秩然後上下相樂公私不匱晉漢光武時及魏太和中並減吏員兼省鄉邑致理之道此其一隅今連歲治戎天下凋瘵京師近甸煩苦尤重比屋流散念之惻然人寡吏多困於供費欲其蘇息不可得也設令廉恥守

分以奉科條猶有祿廩之煩役使之弊而況貪猾縱欲而動踰典章作威以震下厚歛以潤已者乎古者縣置大夫一貢足以爲治奚必貳佐分掌而後治耶且京畿戶口減耗大半職貢如舊何以堪之豈可以重困之人供不給之費使人不倦其在變通制事之宜式從省便其京兆府長安萬年宜各減丞一貢尉兩員餘縣各減丞尉一貢餘委吏部條件處分吏部尚書裴遵慶爲右僕射劉晏改吏部尚書庚寅江西團練使魏少遊封趙國公丙申復置仙州夏四月壬寅陝州虞邑縣復爲安邑縣號州天平縣復爲湖城縣五月丙戌京師地震辛卯以僕固懷安女爲崇徽公主嫁迴紇可汗仍令兵部侍郎李涵往冊命六月丁酉以太子詹事臧希讓檢校工部尚書充渭北節度以渭北節度李光進爲太子太保辛亥昇辰州爲都督府析辰巫溪錦業等州置團練觀察使秋七月己丑以澧州刺史崔瓘爲潭州刺史湖南○都團練觀察使癸未詔至理之代先德後刑上歡然以臨下下欣然而奉上禍亂不作法令可施去聖久遠薄於教化簡書填

委獄訟煩興苛吏舞文寃人致辟思欲剝取改行厥路無由豈天地
父母慈愛之意也朕主三靈之重託羣后之上夕惕若厲不敢荒寧
內訪卿士外咨方岳日不暇給八年于茲而大道淳風鬱而不振四
郊多壘連歲備邊師旅在外役費尤廣賦役轉輸疾耗吾人困竭無
聊窮斯濫矣下庶暗昧不見刑網戎士在軍未習法令犯禁抵罪其
徒實繁狴犴之間未詳事實吏議不決動淹時月傷沮和氣屢彰咎
徵此皆朕之不明教之未至上失其道而繩下以刑敢不罪己以荅
災青人者君之支體害之則君有所傷刑者教之輔助失之則人無
所措慮有寃濫慘然憂傷用明慎罰之典俾弘在宥之澤其天下見
禁囚死罪降從流流已下釋放左降流人移隸等奏聽進言如
聞州縣官比來率意恣行麁杖不依格令致使殞斃深可哀傷頻有
處分仍聞乖越自今已後非灼然蠹害不得輒加非理所司嚴加糾
察以聞先是皇姨弟薛華因酒色之忿手刃三人棄屍於井事發繫
獄賜自盡故有是詔八月丙申朔自夏四月連雨至此月京城米斗

八百文官出米二萬石減估而糶以惠貧民己卯虎入長壽坊元載家廟射生將周皓引弩斃之冬十月乙卯以汝州刺史孟皞為京兆尹十一月辛未禁畿內弋獵乙亥門下侍郎同中書門下平章事衛國公杜鴻漸卒丙子以左僕射翼國公裴冕同中書門下平章事充東都留守河南淮南淮西山南東道副元帥十二月乙未勅左右補闕拾遺內供奉員左右各置兩員餘罷之戊戌裴冕卒辛酉勅京兆府稅宜分作兩等上等每畝稅一斗下等稅六升能耕墾荒地者稅二升

五年春正月乙丑朔辛卯以陝州節度使皇甫溫判鳳翔尹充鳳翔河隴節度使鳳翔節度使李抱玉判梁州事充山南西道節度使壬申河南尹張延賞兼御史大夫充東都留守罷河南淮西淮南山南東道副元帥所管軍隸東都留守二月戊戌李抱玉○鳳翔移鎮鰲屋鳳翔軍忿發縱兵大掠數日方止己亥廢仙川襄城葉縣隸汝州詔罷魚朝恩觀軍容使己巳朝恩自縊而死戊寅詔定京兆府戶稅

夏稅上田畝稅六升下田四升秋稅上田畝五升下田三升荒田開墾者二升已丑勅唐虞之際內有百揆庶政惟和至于宗周六卿分職以倡九牧書曰龍作納言帝命惟允詩云仲山甫王之喉舌皆尚書之任也雖西漢以二府分理東京以三公總務至于領錄天下之綱綜覈萬事之要邦國善否出納之由莫不處正於會府也令僕以綜詳朝政丞郎以彌綸國典法天地而分四序配星辰而統五行元本於是乎在九卿之職亦中臺之輔助小大之政多所關決自王室多難一紀于茲東征西伐略無寧歲內外荐費徵求調發皆迫於國計切於軍期率於權便裁之新書從事且救當時之急殊非致理之道今外虞旣平罔不率俾天時人事表裏相符將明畫一之法大布惟新之命陶甄化源去末歸本魏晉有度支尚書校計軍國之用國朝但以郎官署領辦集有餘時艱之後方立便額叅佐旣衆簿書轉煩終無弘益又失事體其度支使及關內河東山南西道劔南西川轉運常平鹽鐵等使宜停禮儀之本職在奉常往年置使因循未改

有乖舊制實曠司存委太常卿自舉本職其使宜停漢朝丞相與公卿已下五日一決事帝親斷可否且國之安危不獨注於將相攷之理亂固亦在於庶官尚書侍郎左右丞及九卿叅領要重朕所親倚固當朝夕進見以之匡益也並宜詳校所掌具陳損益如非時宜須有奏議亦聽詣閣請對當親覽其意擇善而從朕受昊天之成命承累聖之鴻業齊心脩慮夙夜憂勞顧以不敏不明薄於德化致使舊章多廢至理未弘其心愧恥終食三歎雖詔書屢下以申振卹且朝典未舉猶深鬱悼思與百辟卿士勵精於理俾國經王道可舉而行各宜承式以恭爾位諸州置屯亦宜停于是悉以度支之務委於宰相辛卯以兵部侍郎賈至爲京兆尹以京西兵馬使李忠臣爲鳳翔尹代皇甫溫溫移鎮陝州庚子湖南都團練使崔灌爲○爲其兵馬使臧玠所殺玠據潭州爲亂澧州刺史楊子琳道州刺史裴虬衡州刺史楊濟各出軍討玠乙巳夜歲入軒轅丙午復置先農馬祖壇祀之丁未封幽州節度使朱希彩爲高密郡王己未夜禁起五車長三丈庚

申宰臣太原尹王縉入朝五月辛未刑部侍郎黎幹爲桂州刺史桂
管防禦經略招討觀察等使己卯夜彗起北方其色白庚辰貶禮儀
使禮部尚書裴士淹爲處州刺史戶部侍郎判度支第五琦爲饒州
刺史皆魚朝恩黨也元載旣誅朝恩下制罷使仍放黜之癸未以羽
林大將軍辛京果爲潭州刺史湖南觀察使甲申西北白氣竟徙置
當悉相靜恭五州於山險要害地備吐蕃也六月己未彗星始滅赦
天下見禁囚徒秋七月丁卯以浙東觀察使越州刺史御史大夫薛
兼訓爲檢校工部尚書太原尹北都畱守充河東節度使是月京城
米斗一千文八月辛卯宰臣元載上疏請置中都於河中府秋秒行
幸春中還京以避蕃戎侵寇之患疏入不報載疏大旨以關輔河東
等十州戶稅入奉京師創置精兵五萬以威四方辭多捍闔欲權歸
於已也九月丁丑以宣歙池等州都團練觀察使宣州刺史兼御史
中丞陳少遊充浙江東道團練觀察使吐蕃寇永壽汴州田神功來
朝十二月乙未改巫州爲渝州業州爲蔣州

六年春正月己未朔戊寅於鄜州之析城置肅戍軍二月乙酉御史大夫敬括卒夏四月丁巳上御宣政殿試制舉人至夕策未成者令太官給燭俾盡其才己未澧州刺史楊子琳來朝賜名猷丁丑改泉州爲充州戊寅詔纂組文繡止害女紅公師旅未息黎元空虛豈可使淫巧之風有虧常制其綾綿花文所織盤龍對鳳麒麟獅子天馬辟邪孔雀仙鶴芝草萬字雙勝透背及大綢綿竭鑿六破已上並宜禁斷其長行高麗白錦大小花綾錦任依舊例織造有司明行曉諭五月癸卯以河南尹張延賞爲御史大夫秋七月乙巳月掩畢八月乙卯淮南節度使韋元甫卒丙辰以東都副畱守常休明爲檢校左散騎常侍河陽三城使夏旱此月己未始雨庚午以御史大夫張延賞爲楊州大都督府長史淮南節度使丙午以蘇州刺史浙江觀察使李栖筠爲御史大夫丁丑獲白兔於太極殿之內廊庚辰夜月入紫微垣九月壬辰夜熒惑犯哭星自八月連雨害秋稼戊申於輪臺置靜塞軍辛亥熒惑入壁壘冬十月壬午滄州置橫海軍十一月己亥

文單國王婆彌來朝獻馴象一十一壬寅夜月入太微又掩氏十二
月己未江西觀察使檢校刑部尚書魏少遊卒庚午制以文單王婆
彌爲開府儀同三司試殿中監是歲春旱米斛至萬錢

七年春正月癸未朔戊子於魏州頓丘縣置澧州以頓丘縣之觀城
店置觀城縣以張之清豐店置清豐縣并割魏州之臨黃縣並隸澧州
以貝州臨清縣之張橋店置永濟縣乙未月犯軒轅庚子以檢校戶
部尚書路嗣恭爲洪州刺史兼御史大夫江西觀察使辛丑太常卿
楊綰兼充禮儀使甲辰迴紇使出鴻臚寺劫掠坊市吏不能禁止復
三百騎犯金光朱雀等門是日皇城諸門皆閉慰諭之方止二月甲
寅以兵部侍郎李涵爲蘇州刺史兼御史中丞充浙西觀察使鎮星
臨太微戊午夜月掩天關三月壬辰詔諫議大夫置四員爲定四月
甲寅迴紇王子李秉義卒歸國宿衛賜名也五月乙酉雨雹大風折
樹丙戌夜月入太微辛卯徙忻州之七聖容於太原府之紫極宮乙
未詔躋於道者化淳而刑措善於理者綱舉而網疎朕涉道未弘燭

理多昧常亦遐想太古高挹玄風保合太和在宥天下蓋德薄而未
臻也是用因時以設教便俗以立防務盡平恕用申哀卹又化淺而
多犯也加以邊虞未戢徭賦適繁荒廢之際寇攘斯起遂令園土嘉
石之下積有繫囚竹章牙簡之中困於法吏屬盛陽之候大暑分蒸
仍念狴牢何堪鬱灼所以汨傷和氣感致咎徵天道人事豈相遠也
如聞天下諸州或憊時雨首種不入宿麥未登哀我矜人何時不恐
皆由朕過益用懼焉惕然憂嗟深自咎責所以減膳徹樂別居齊宮
禱于神明冀獲嘉應仲夏之月靜事無爲以助晏陰以弘長養斷薄
決小已過於麥秋繼長增高宜順乎天意可大赦天下見禁囚徒罪
無輕重一切釋放癸亥以檢校禮部尚書蔣渙充東都留守六月庚
戌朔有司言日蝕陰雲不見丁丑詔誠薄葬不得造假花果及金手
脫寶鈿等物秋七月癸巳迴紇蕃客奪長安縣令邵說所乘馬人吏
不能禁八月庚戌賜北庭都護曹令忠姓名曰李元忠九月乙未工
部尚書于休烈卒冬十月壬子上畋于苑中矢一發貫二兔從臣皆

唐紀二十一
賀辛未以權知幽州盧龍節度畱後朱泚檢校左散騎常侍充幽州
盧龍節度使丙子以大府卿呂崇賁爲廣州都督充嶺南節度使十
一月庚辰詔自頃蕃戎入寇巴南屢多征役其巴逢渠集壁充通間
等州宜放二年租庸甲申以福建觀察使李承昭爲禮部尚書華州
刺史李琦爲福州刺史福建都團練觀察使辛卯以嶺南節度李勉
爲工部尚書十二月丙寅雨土是夜長星出於參辛未滑州置永平
軍壬子禁鑄銅器癸酉大雪是秋稔迴紇吐蕃大食渤海室韋靺鞨
契丹奚牂牁康國石國並遣使朝貢

八年春正月丁丑朔壬午昭義軍節度檢校右僕射相州刺史薛嵩
卒癸卯勅天下青苗地頭錢每畝十五文率京畿三十文自今一例
十五文京官三品已上郎官御史每年各舉一人堪爲刺史縣令者
甲子御史大夫李栖筠彈吏部侍郎徐○丁卯幽州○節度使朱泚
加檢校戶部尚書封懷寧郡王○徐浩薛邕違格並停知選事壬申永
平軍節度使檢校右僕射滑州刺史霍國公令狐彰卒遺表薦劉晏

李勉代已丙子以工部尚書李勉兼御史大夫滑州刺史充永平軍
節度滑臺觀察等使夏四月戊申乾陵上仙觀之尊殿有雙鵲啣紫
泥補殿之隙缺凡十五處戊午以太僕卿吳仲孺爲鄂州刺史鄂嶽沔
等州團練觀察使五月乙酉貶吏部侍郎徐浩明州別駕薛邑歙州
刺史京兆尹杜濟杭州刺史皆坐典選也以太府卿于頔爲京兆尹
辛卯鄭王邈薨贈昭靜太子壬辰曲赦京城繫囚癸卯詔赦天下繫
囚死罪降從流流已下並放六月隴州華亭縣置義寧軍癸亥戶部
侍郎判度支韓滉奏安邑鹽池生乳鹽是夏城奉天以備蕃寇秋七
月己卯太白入東井乙未月掩畢八月甲寅詔吏部尚書劉晏知三銓
選事己未吐蕃寇靈武庚午靈武奏蕃軍退去辛未幽州節度使朱
泚弟滔率五千騎來朝請河西防秋詔千騎迓於國門許自皇城南
面出開遠門赴涇州行營九月癸酉臨晉公主薨壬午嶺南節度使
廣州刺史呂崇賁爲部將哥舒晃所殺癸未晉州男子郇謨以麻辮
髮持竹筐及蓆席哭於東市請進三十字如不稱旨請裹尸於蓆筐

上召見賜衣館之禁中內二字曰監團欲去諸道監軍團練使也丁亥貶左巡使殿中侍御史楊護以其抑郇謨而不上聞也戊子詔○京五品以上各上封事言政得失是歲大有年己丑夜太白入太微甲午東都畱守蔣瓊兼知東都貢舉戊戌以辰錦觀察使李昌巖爲桂州刺史桂管防禦觀察使大鳥見武功肉翅狐首四足有爪爪長四尺三寸毛赤如蝙蝠羣鳥隨而噪之神策將張白芬射斃以獻冬十月癸卯魏博田承嗣加同平章事丁巳夜月掩畢吐蕃寇涇州邠州甲子子儀先鋒將渾瑊與吐蕃戰于宜祿我師不利瑊與涇原馬璘極力追躡蕃軍潰去乙丑以江西觀察使路嗣恭爲廣州刺史充嶺南節度使封翼國公以浙東觀察使越州刺史陳少遊爲揚州大都督府長史充淮南節度使戊辰郭子儀奏破吐蕃十萬百寮稱賀十月己卯夜月入羽林癸巳月入太微十一月壬寅朔庚戌汴宋節度使田神功來朝辛酉淮西節度使李忠臣來朝十二月癸酉月入羽林自冬無雪是歲大有年九年春正月庚子朔壬寅汴宋節度使太子

少師檢校尚書右僕射兼御史大夫汴州刺史田神功卒澧朗兩州鎮遏使澧州刺史楊猷擅浮江而下至鄂州詔許赴汝州遂汧漢而上復郢襄等州皆閉城拒之二月己丑以田神功弟神玉權知汴宋畱後癸巳郭子儀自邠州來朝李抱玉自鳳翔來朝三月丙午禁畿內漁獵採捕自正月至五月晦永爲常式戊子以澧州刺史楊猷爲洮州刺史○夏四月丁丑月入太微己卯以桂管觀察使黎幹爲京兆尹兼御史大夫甲申中書舍人常袞率兩省官一十八人詣閣請論事詔三人引各盡所懷乙酉詔郭子儀等大閱兵師以備吐蕃壬辰詔赦大辟已下繫囚無輕重釋放乙未華陽公主薨上悲惜之累日不聽朝宰臣抗疏陳請之庚戌廢洹州庚申詔度支使支七十萬貫轉運使五十萬貫和糴歲豐穀賤也乙丑詔四海之內方協大寧西戎無猷獨阻王命不可忘戰尚勞邊事朕頃以兵革之後軍國空耗躬率節儉務勤農桑上玄儲休仍歲大稔益用多愧不知其然雖屬此人和近於家給而邊穀未實戎備猶虛因其天時思致豐積將設

平糶以之餽軍然以中都所供內府不足租充常入之數豈齊倍餘之收其在方面蓋臣成茲大計其佐公家之急以資塞下之儲每道歲有防秋兵馬其淮南四千人浙西三千人魏博四千人昭義二千人成德三千人山南東道三千人荆南二千人湖南三千人山南西道二千人劔南西川三千人東川二千人鄂嶽一千五百人宣歙三千人福建一千五百人其嶺南浙東浙西亦合準例恐路遠往來增費各委本道每年取當使諸色雜錢及迴易利潤贖錢等每人計二十貫每道據合配防秋人數多少都計錢數市輕貨送納上都以備和糶仍以秋收送畢涇原節度使馬璘來朝丙寅加馬璘尚書左僕射知省事璘諷將士進狀求宰相故有是授幽州節度使朱泚遣弟滔奉表請自入朝兼自率五千騎防秋許之詔所司築第待之己卯月掩南斗庚辰月入太微秋七月甲辰月掩房又入羽林久旱京兆尹黎幹歷禱諸祠未雨又請禱文宣廟上曰丘之禱久矣八月辛未以號州刺史宋晦爲同州刺史充長春宮營田等使戊寅以陝州

大都督府長史皇甫溫爲越州刺史充浙東觀察使辛卯月掩軒轅
九月庚子幽州節度使朱泚來朝乙巳渭北節度使坊州刺史臧希
讓卒是秋大雨冬十月壬申信安王瑄薨乙亥梁王璿薨以前宣州
刺史李廣琛爲右散騎常侍十一月戊戌大雪平地盈尺庚子以商
州刺史李國清爲陝州大都督府長史充陝州觀察使十二月庚寅
以中書舍人楊炎祕書少監韋肇並爲吏部侍郎中書舍人常袞爲
禮部侍郎壬辰赦京繫囚死罪降從流流已下並釋放

十年春正月乙未朔己酉昭義牙將裴志清逐其帥薛寧薛寧奔洛
州上章待罪志清率衆歸田承嗣壬寅壽王瑁薨乙未朱泚抗表乞
畱京師西征吐蕃請以弟滔權爲幽州畱後許之以昭義將薛擇爲
相州刺史薛雄爲衛州刺史薛堅爲洛州刺史皆嵩之族人也戊申
遣使慰諭田承嗣令各守封疆承嗣不奉詔壬子兗州復爲果州癸
丑田承嗣盜取洛州又破衛州二月乙丑盜殺衛州刺史薛雄丙寅
罷辰錦溪獎五州經略使復隸黔中辛未制第四子述封睦王充嶺

南節度度支營田五府經略觀察處置等大使第五子逾可封郴王
充渭北鄜坊等州節度大使第六子連封恩王第七子韓王迥可充
汴宋節度大使第八子邁可封鄜王第十三子造封忻王充昭義節
度大使第十四子暹封韶王十五子運封嘉王十六子遇封端王十
七子適封循王十八子通封恭王十九子達封原王二十子逸封雅
王並可開府儀同三司不出閣丙子以華州刺史李承昭爲相州刺
史知昭義兵馬畱後時田承嗣盡盜入相衛所管四州之地自署長
吏是日河陽軍亂逐城使常休明迫牙將王惟恭爲畱後軍士大掠
數日休明奔東都甲申以平盧淄青節度觀察海運押新羅渤海兩
蕃等使檢校工部尚書青州刺史李正己檢校尚書左僕射前隴右
節度副使隴州刺史馬燧爲商州刺史充本州防禦使三月甲午陝
州軍亂逐觀察使李國清縱兵大掠國清卑詞遍拜將士方免禍一
夕而定己巳薛平常休明至闕下素服待罪丁未以左散騎常侍孟
皞爲棗州刺史充潼關防禦使庚戌熒惑入壁壘八月太常寺奏諸

州府所用斛秤當寺給銅斛秤州府依樣製造而行從之乙未制魏
博節度使開府儀同三司太尉檢校尚書左僕射同中書門下平章
事魏州大都督府長史上柱國鴈門郡王田承嗣可貶永州刺史仍
詔河東鎮冀幽州淄青淮西滑亳汴宋澤潞河陽道出師進討甲申
大雨雹暴風拔樹飄屋瓦落鴟吻人震死者十之二京畿損稼者七
縣五月乙未田承嗣部將霍榮國以磁州歸癸卯劍南置昌州罷兩
都貢舉都集上都停童子科六月辛未田承嗣遣其黨裴志清攻圍
翼州爲李寶臣所敗秋七月己未戶部尚書暢瑑卒杭州大風海水翻
潮溺州民五千家船千艘八月丁卯田承嗣上表請束身歸朝戊子
夜月入太微乙丑田承嗣將盧子期攻磁州九月戊戌荆南節度使
衛伯玉來朝壬寅宥京城繫囚戊申迴紇白晝殺人於市吏捕之拘
於萬年獄其首領赤心持兵入縣劫囚而出斫傷獄吏月暈熒惑犯
昴五車參東井等星癸丑吐蕃寇隴州鳳翔李抱玉擊退之戊午幽
州節度使朱泚鎮奉天冬十月辛酉日有蝕之癸亥以商州刺史馬

燧檢校左散騎常侍河陽三城使甲子昭義節度使李承昭與盧子
期戰於磁州清水縣大破之生擒子期以獻丙寅貴妃獨狐氏薨追
贈曰貞懿皇后己丑尚書右僕射裴遵慶卒十一月辛卯新平公主
薨丁酉田承嗣新署瀛州刺史吳希光以城降丁未路嗣恭攻破廣
州擒哥舒晃斬首以獻

十一年正月庚寅朔田承嗣上表請罪壬辰遣諫議大夫杜亞使魏
州宣慰許其自新辛亥劔南節度使崔寧奏大破吐蕃二十萬斬首
萬級生擒首領一千一百五十人獻于闕下二月癸亥荆南節度使
衛伯玉卒于京師戊子河陽軍復亂大掠三日監軍使冉廷蘭率兵
斬其亂首方定戊申昌樂公主薨辛亥御史大夫李栖筠卒夏四月
戊午朔丙子以浙西觀察使蘇州刺史御史大夫李涵知臺事充京
畿觀察使己卯以前淮南節度使楊州大都督府長史御史大夫張
延賞爲江陵尹兼御史大夫充荆南節度使五月癸巳以永平軍節
度使李勉爲汴州刺史充汴宋等八州節度觀察畱後時汴將李靈

耀專殺濮州刺史孟鑒北連田承嗣故命勉兼領汴州授靈耀濮州刺史靈耀不受詔六月戊戌以李靈耀為汴州刺史充節度畱後秋七月戊子夜暴澍雨平地水深盈尺溝渠漲溢壞坊民千二百家庚寅田承嗣兵寇滑州李勉拒戰而敗八月丙寅幽州節度使朱泚加同中書門下平章事李靈耀據汴州叛甲申命淮西李忠臣渭州李勉河陽馬燧三鎮兵討之閏月丁酉太白經天九月乙丑李忠臣等兵進營鄭州靈耀之衆來薄戰淮西兵亂乃退軍於滎澤戊辰淄青李正己奏取鄆濮二州冬十月乙酉忠臣等軍破賊於中牟進軍又敗賊於汴州郭外乃攻之乙丑承嗣遣姪悅率兵三萬援靈耀丙午淮西河陽之師合擊田悅營其衆大敗悅脫身北走靈耀聞悅之敗棄城遁走汴州平丁未滑將杜如江生擒靈耀而獻十二月丁亥加平盧淄青節度使檢校尚書左僕射青州刺史饒陽王李正己為檢校司空同中書門下平章事成德軍節度使太子太傅檢校尚書左僕射隴西郡王李寶臣檢校司空同中書門下平章事庚寅涇原節

度使檢校尚書左僕射知省事扶風郡王馬磷卒丁酉以涇原節度副使試太常卿張掖郡王段秀實權知河東節度畱後北都畱守薛兼訓病故也昭義節度使李承昭抗表稱疾以澤潞行軍司馬李抱玉權知磁邢兵馬畱後庚戌加淮西節度檢校右僕射安州刺史西平郡王李忠臣檢校司空同中書門下平章事仍兼汴州刺史

十二年春正月甲寅朔辛酉以四鎮北庭涇原節度副使知節度使事張掖郡王段秀實爲涇州刺史兼御史大夫充本州團練使月掩軒轅渤海使獻日本國舞女十一人癸酉夜月掩心前大星又入南斗魁京師旱分命祈禱二月戊子淄青節度使李正己之子納爲青州刺史充淄青節度畱後丁未以朗州刺史李國清爲黔州刺史經畧招討觀察使三月乙卯河西隴右副元帥鳳翔懷澤潞秦隴等州節度觀察等使兵部尚書同中書門下平章事潞州大都督府長史知鳳翔府事上柱國涼國公李抱玉卒壬戌月入太微癸亥以太原少尹河南節度行軍司馬權知河東畱後鮑防爲太原尹御史大夫充

北都畱守河東節度使戊辰夜月逼心前星庚午左降官永州刺史
田承嗣復授魏博節度使官並如故承嗣姪悅子綰緒綸並復舊官
庚辰宰相元載王縉得罪下獄命吏部尚書劉晏訊鞫之辛巳制中
書侍郎平章事元載賜自盡門下侍郎平章事王縉貶括州刺史夏
四月壬午以朝議大夫守太常卿兼修國史楊綰爲中書侍郎尚書
禮部侍郎集賢院學士常袞爲門下侍郎並同中書門下平章事癸
卯以右庶子潘炎爲禮部侍郎貶吏部侍郎楊炎爲遠州司馬元載黨
也諫議大夫知制誥韓洄王定包佶徐璜戶部侍郎趙縱大理少卿
裴翼太常少卿王紆起居舍人韓會等十餘人皆坐元載貶官也給
事中杜亞使魏州賜田承嗣鐵券癸巳以前秘書監李揆爲睦州刺
史揆故宰相爲元載所忌二十年流落丐食江湖間載誅方得爲郡
又召顏真卿於湖州亦載所忌斥外也乙未月掩心前星丁酉西川破
吐蕃於望漢城擒蕃將大籠官論器然以獻壬寅以前商州刺史烏
崇福爲安南都護本管經略使渤海奚契丹室韋靺鞨並遣使朝貢

已酉加京官料錢文武班諸司共二千七百九十六員文官一千八百五十四員武官九百四十二員歲加給一十五萬六千貫并舊給凡二十六萬貫以關內副元帥兵馬使渾瑊兼邠州刺史五月辛亥罷天下州團練守捉使名甲寅諸道邸務在上都名曰畱後改爲進奏院丙辰夜月入太微辛酉貶刑部尚書王昂連州刺史昂至萬州卒庚午勅毀元載祖父墳剖棺棄骸焚毀私廟主於大寧里甲戌以前安南都護張伯儀爲廣州刺史兼御史大夫充嶺南節度使六月癸巳時小旱上齋居祈禱聖體不康是日不視朝秋七月戊午罷潤州丹陽軍蘇州常州軍已巳中書侍郎同中書門下平章事集賢殿崇文館大學士兼修國史楊綰卒八月癸巳賜東川節度使鮮于叔明姓李氏癸卯宰臣讓賜食先是元載王縉輔政每日賜食因爲故事至是常袞等上表云殮錢已多更頒御膳胡顏自安乞停賜食從之甲辰以湖州刺史顏真卿爲刑部尚書乙巳以久雨宥常叅百寮不許御史點班九月乙卯許以庶人禮葬元載辛酉以涇原節度副

使段秀實爲四鎮北庭行營涇原鄭棣等節度使庚午吐蕃寇坊州掠党項羊馬而去是秋宋毫陳滑等州水冬十月丁亥戶部侍郎判度支韓滉言解縣兩池生瑞鹽乃置祠號寶應靈慶池壬寅夜月掩昴又入太微乙巳以滑州牙將劉洽爲宋州刺史京兆尹黎幹奏水損田三萬一千頃度支使韓滉奏所損不多兼渭南令劉藻曲附滉亦云部內田不損差御史趙計檢渭南田亦附滉云不損上曰水旱咸均不宜渭南獨免復命御史朱敖檢之渭南損田三千頃上歎息曰縣令職在字人不損亦宜稱損損而不聞豈有卹隱之意耶劉藻趙計皆貶官十一月癸丑太白臨哭星乙卯夜月入羽林癸酉以右散騎常侍蕭昕爲工部尚書刑部尚書顏真卿獻所著韻海鏡源三百六十卷十二月丁亥西川崔寧奏於西山破吐蕃十萬斬首八千生擒九百人己亥天下仙洞靈迹禁樵捕庚子以幽州節度使朱泚兼隴右節度副大使權知河西澤潞行營兵馬事京兆尹請修六門堰許之

十三年春正月戊申朔辛酉壞白渠碾磴八十餘所以奪農溉田也
壬戌刑部尚書魯郡公顏真卿三抗章乞致仕不允淄青節度使李
正己請附屬籍從之戊辰迴紇寇太原鮑防與之戰我師不利朱泚
徙封遂寧郡王二月庚辰代州都督張光晟擊迴紇戰于羊武谷破
之北人乃安己亥吐蕃寇靈武甲辰太僕寺佛堂有小脫空金剛石
臂忽有黑汗滴下以紙承之色類血三月甲戌河陽將士劫迴紇輜重
因與相鬪縱兵大掠久之方定四月丁亥以浙西觀察畱後李道昌
爲蘇州刺史兼御史中丞充浙西都團練觀察使己丑以前浙西觀
察使李涵爲御史大夫甲辰吐蕃寇靈州朔方畱後常謙光擊敗之
五月戊午宦官劉清潭賜名忠翼六月戊戌隴右節度使朱泚於軍
士趙貴家得猫鼠同乳不相害籠而獻之秋七月壬子中書舍人崔
祐甫知吏部選事癸丑劍南節度使崔寧加檢校司空東川李叔明
加檢校工部尚書辛未吐蕃寇鹽州慶州八月甲戌朔成德軍節度
使李寶臣抗章請復本姓張氏從之冬十月丁酉葬貞懿皇后於莊

陵十一月丁卯日長至有司祀昊天上帝於南郊上不視朝故也十二月丙戌以吏部尚書劉晏爲左僕射判使如故以給事中杜亞爲洪州刺史兼御史中丞充江西觀察使以江西觀察使路嗣恭爲兵部尚書是歲郴州黃山崩壓死者有數百人

十四年春正月壬寅朔壬戌以楚州刺史李泌爲澧州刺史二月癸未魏博七州節度使太尉檢校尚書左僕射同中書門下平章事魏州大都督府長史田承嗣卒甲申以魏博中軍兵馬使左司馬田悅兼御史中丞充魏博節度畱後三月丁未汴宋節度使李忠臣爲麾下將族姪李希烈所逐忠臣狼狽歸朝上以忠臣立功於國乃授檢校司空同平章事庚戌以河南尹嚴郢爲京兆尹河中少尹知府事趙惠伯爲河南尹辛酉以前容管經略使容州刺史王雄爲河中少尹知府事夏四月癸未成德軍節度使張寶臣復請姓李從之五月癸卯上不康至辛亥不視朝北都畱守鮑防以北庭歸朝辛酉詔皇太子監國是夕上崩于紫宸上內殿遺詔皇太子柩前即位壬戌遷神

月
紀
十一
柩于太極殿發喪八月庚申羣臣上尊諡曰睿文孝武皇帝廟號代
宗十月己酉葬於元陵十二月丁酉祔於太廟

史臣曰嗚呼治道之失也若河決金堤火炎崑崗雖神禹之乘四載
玄冥之灑八瀛亦不能堙洪濤而撲烈焰者何也良以勢旣壞而不
能遽救也觀夫開元之治也則橫制六合駿奔百蠻及天寶之亂也
天子不能守兩都諸侯不能安九牧是知有天下者治道其可忽乎
明皇之失馭也則祿山暴起於幽陵至德之失馭也則思明再陷於
河洛大曆之失馭也則懷恩鄉導於大戎自三盜合從九州羹沸軍士
膏於原野民力殫於轉輸室家相弔人不聊生而子儀號泣於用兵
元載殷憂於避狄然而代宗皇帝少屬亂離老於軍旅識人間之情
僞知稼穡之艱難內有李郭之効忠外有昆戎之幸利遂得兇渠傳
首叛黨革心闕輔載寧撫戎漸弭至如稔輔國之惡議元振之罪去
朝恩之權不以酷刑俾之自咎亦立法念功之言也罪已以傷僕固
徹樂而悼神功懲繙載之姦回重衮綰之儒雅脩己以禳星變側身

以謝咎徵古之賢君未能及此而輔李靈耀作梗田承嗣負恩命將
出軍勞師弊賦者蓋陽九之未泰豈君道之過歟
贊曰羣盜方梗諸戎競侵猛士嘗膽忠臣痛心掃除氛氣敷衍德音
延洪納祉帝慮何深

唐書本紀卷第十一

唐經

子

按本卷錯簡兩節均經後人校正若循原式閱者殊苦不便茲亦遵改並
於銜接處各加○以存其跡其原式如左

今第十六葉前十二行崔瓘爲潭州刺史湖南下原接今第十七葉前
十二行鳳翔移鎮整屋

今第十七葉前十二行二月戊戌李抱玉下原接今第十八葉前十一
行爲其兵馬使臧玠所殺

今第十八葉前十一行湖南都團練使崔瓘爲下原接今第十六葉前
十三行都團練觀察使癸未詔

今第二十葉後十二行李栖筠彈吏部侍郎徐下原接今第二十一葉
後三行京五品以上

今第二十一葉後二行戊子詔下原接今第二十葉後十二行節度使
朱泚加檢校戶部尙書封懷寧郡王

今第二十二葉前六行楊猷爲洮州刺史下原接今第二十葉後十二
行丁卯幽州

今第二十葉後十二行丁卯幽州下原接今第二十葉後十三行徐浩

薛邕違格

但殿本於今第十六葉前十三行癸未詔下增以天下刑官濫刑七字按上文三月壬申省減吏員詔並不先著理由今增七字必非原文又於今第十七葉前十二行移鎮整屋上刪鳳翔二字按鳳翔二字上似脫一自字是時抱玉固爲鳳翔節度使也殿本任意增損殊嫌臆斷今第十八葉前十一行都團練使崔灌句經改正後衍一爲字殿本亦已刪去又今第二十葉後十二行李栖筠彈吏部侍郎徐下殿本旁注闕字按徐浩傳浩爲吏部侍郎坐以妾弟冒選託侍郎薛邕注授京尉爲御史大夫李栖筠所彈今第二十葉後十三行原有徐浩薛邕違格並停知選事句是上文李栖筠所彈者必卽其人其事竊以爲李栖筠彈吏部侍郎徐下宜與徐浩薛邕云云相接於事方合特衍一徐字耳殿本插入丁卯幽州云云一十一字似有未愜並舉所疑以質讀者張元濟識

唐書本紀卷第十二

劉

聞人詮校刊本同校

德宗上

德宗神武孝文皇帝諱适代宗長子母曰睿真皇后沈氏天寶元年四月癸巳生於長安大內之東宮其年十二月拜特進封奉節郡王代宗即位之年五月以上爲天下兵馬元帥改封魯王八月改封雍王時史朝義據東都十月遣上會諸軍於陝州大舉討賊十一月破賊於洛陽進收東都河南平定朝義走河北分命諸將追之俄而賊將李懷仙斬朝義首以獻河北平以元帥功拜尚書令食實封二千戶與郭子儀等八人圖形凌煙閣廣德二年二月立爲皇太子大曆十四年五月辛酉代宗崩癸亥即位於太極殿閏月壬申貶中書舍人崔祐甫爲河南少尹甲戌貶門下侍郎平章事常袞爲潮州刺史召崔祐甫爲門下侍郎同中書門下平章事丙子詔諸州府新羅

渤海歲貢鷹鷄皆停戊寅詔山南枇杷江南柑橘歲一貢以供宗廟
餘貢皆停庚寅以兵部尚書路嗣恭爲東都畱守以常州刺史蕭復
爲潭州刺史湖南團練觀察使辛巳罷邕府歲貢奴婢癸未改括州
爲處州括蒼縣爲麗水縣停梨園使及伶官之冗食者三百人畱者
皆隸太常劔南歲貢春酒十斛罷之甲申以司徒兼中書令河中尹
靈州大都督單于鎮北大都護充關內河東副元帥朔方節度關內
支鹽池六城水運大使押諸蕃部落管內及河陽等道觀察使上柱
國汾陽郡王山陵使食實封一千九百戶郭子儀可加號尚父守太
尉餘官如故加實封通前二千戶月給一千五百人糧馬二百匹草
料以朔方都虞候李懷光爲河中尹邠寧慶晉絳慈隰等州節度觀
察使以朔方右畱後常譙光兼靈州大都督西受降城定遠軍天德
鹽夏豐節度等使以朔方左畱後單于副都護渾瑊爲單于大都護
振武東軍中二受降城鎮北及綏銀麟勝等軍州節度營田使丙戌
詔禁天下不得貢珍禽異獸銀器勿以金飾丁亥詔文單國所獻舞

象三十二今放荆山之陽五坊鷹犬皆放之出宮女百餘人已丑以
右羽林大將軍吳希光檢校散騎常侍兼御史中丞充渭北鄜坊丹
延都團練觀察使辛卯以河陽三城鎮遏使馬燧檢校工部尚書兼
太原尹御史大夫北都畱守河東節度使壬辰以河東節度畱後鮑
防爲京畿觀察使陳州刺史李芾檢校太常少卿爲東陽三城鎮遏
使癸巳以壽州刺史杜亞爲江西觀察使甲午冊太尉子儀自開元
以來冊禮多費天寶中楊國忠冊司空至是行子儀之冊以江西觀
察使杜亞爲陝州長史充轉運使丙申詔兵部侍郎黎幹害若豺狼
特進劉忠翼掩義隱賊並除名長流旣行俱賜死丁酉以京畿觀察
使鮑防爲福州刺史福建都團練觀察使以戶部侍郎判度支韓滉爲
太常卿吏部尚書劉晏判度支鹽鐵轉運等使初晏與滉分掌天下
財賦至是晏都領之六月己亥朔御丹鳳樓大赦天下罪無輕重咸
赦除之內外文武三品已上賜爵一級四品已下加一階致仕官同
見任百姓爲戶者賜古爵一級加李正司徒太子太傅崔寧李勉本

官同平章事天下進獻事緣郊祀陵廟所須依前勿闕餘並停諸州刺史上佐今後准式入計諸州刺史常叅官父在未有官量與五品致仕官父亡沒與追贈自至德已來別勅或因人奏或臨事頒行差互不同使人疑惑中書門下與詳定官決取堪久長行用者編入格條自今更不得奏置寺觀及度人庚子封元子誦爲宣王次子謨爲舒王諡爲通王諒爲虔王詳爲肅王並加開府儀同三司乙巳封皇弟廼爲益王迅爲隨王丙午舉先天故事非供奉侍衛之官自文武六品已上清望官每日二人更直待制以備顧問仍以延英南藥院故地爲廨癸丑詔皇族五服等已上居四方者家一人赴山陵縣次給食已未揚州每年貢端午日江心所鑄鏡幽州貢麝香皆罷之辛酉罷宣歙池鄂嶽沔二都團練觀察使陝虢都防禦使以其地分隸諸道復置東都京畿觀察使以御史中丞爲之壬戌處州刺史王縉湖州刺史第五琦皆爲太子賓客睦州刺史李揆爲國子祭酒並畱司東都中官邵光超送淮西旌節李希烈遺縑七百匹事發杖六十配

流由是中官不敢受賂癸亥詔中書門下御史臺五品已上諸司三品已上長官各舉可任刺史縣令者人中書門下量才進擬有犯坐舉主秋七月戊辰朔日有蝕之禮儀使吏部尚書顏真卿奏列聖謚號文字繁多請以初謚爲定兵部侍郎袁係議云陵廟玉冊已刻不可輕改罷係奏不知玉冊皆刻初謚而已庚午詔邕州所奏金坑誠爲潤國語人以利非朕素懷其坑任人開採官不得禁辛未以吏部侍郎房宗偃爲御史中丞東都畿觀察使罷右銀臺門客省歲給廩料萬二千斛自永泰已來或四方奏計未遣者或上書言事忤旨者及蕃客未報者常數百人於客省給食橫費已甚故罷之壬申毀元載馬磷劉忠翼之第以其雄侈踰制也癸酉減宮中服御常貢者千數丁丑復置厩馬隨仗於月華門外已卯詔王公卿士不得與民爭利諸節度觀察使於揚州置迴易邸並罷之庚辰詔鴻臚寺蕃客入京各服本國之服罷商州歲貢稿膠辛卯罷天下榷酒丁酉詔國用未給其宣王已下開府俸料皆罷給八月庚辰以門下侍郎平章

事崔祐甫爲中書侍郎平章事以道州司馬司正楊炎爲門下侍郎平章事以懷州刺史喬琳爲御史大夫同平章事京畿觀察使乙巳遣太常少卿韋倫使吐蕃以蕃俘五百人還之修好也癸亥詔人死亡於外以棺柩還城者勿禁九月甲戌以淮西節度爲淮寧軍辛巳以檢校刑部尚書白孝德爲太子少傅丙戌秘書少監邵說爲吏部侍郎給事中劉迺爲兵部侍郎中書舍人令狐峘爲禮部侍郎冬十月丁酉朔吐蕃合南蠻之衆號二十萬三道寇茂州扶文黎雅等州連陷郡邑發兵四千助蜀大破之巳酉葬代宗於元陵戊午九成宮貢立戰炭鑪襄州貢種蒺藜之工皆罷之散官秦豬三十頭給貧民十一月辛未以鴻臚卿賈耽爲梁州刺史山南西道節度觀察使丁丑以陝州長史杜亞爲河中尹河中晉絳慈隰都防禦觀察使壬午御史大夫平章事喬琳爲工部尚書罷知政事加劔南西川節度觀察度支營田等使檢校司空平章事成都尹崔寧兼御史大夫京畿觀察使癸巳加崔寧兼靈州大都督單于鎮北大都護朔方節度等使

出鎮坊州以荆南節度使檢校禮部尚書兼江陵尹御史大夫張延
賞檢校兵部尚書兼成都尹御史大夫劍南西川節度度支營田觀
察等使以朔方節度虞候杜希全爲靈州留後以鄜州刺史張光晟
單于振武軍使東中二受降城綏銀鄜勝等軍州留後延州刺史李建爲
鄜坊丹延留後楊炎素惡崔寧雖授以三鎮仍署此三人爲留後奪
寧之權也人皆憤之十二月己亥南選使可以專達勿復以御史臨
之乙卯制宣王某可立爲皇太子丙寅晦日有蝕之詔元日朝會不
得奏祥瑞事建中元年春正月丁卯朔御含元殿改元建中群臣上
尊號曰聖神文武皇帝己巳上朝太清宮庚午謁太廟辛未有事於
郊丘是日還宮御丹鳳門大赦天下自艱難以來徵賦名目頗多今
後除兩稅外輒率一錢以枉法論常叅官諸道節度觀察防禦等使
都知兵馬使刺史少尹畿赤令大理司直評事等授訖三日內於四
方館上表讓一人以自代其外官委長吏附送其表付中書門下每
官闕以舉多者授之王府六品以上官及諸州縣有司可併省及諸官

咸者量事廢省天下子爲父後者賜勲兩轉已巳福建觀察使鮑防湖南觀察使蕭復讓憲官從之自兵興已來方鎮重任必兼臺省長官以至外府僚佐亦帶臺省銜至是除韓滉蘇州刺史杜亞河中少尹而領都團練觀察使不帶臺省兼官自是諸道非節度而兼憲官者皆讓甲午詔東都河南江淮山南東道等轉運租庸青苗鹽鐵等使尚書左僕射劉晏頃以兵車未息權立使名久勤元老集我庶務悉心瘁力垂二十年朕以征稅多門鄉邑周耗聽于群議思有變更將置時和之理宜復有司之制晏所領使宜停天下錢穀委金部倉部中書門下棟兩司郎官准格式調掌是月浚豐州陵陽渠二月丙申遣黜陟使一十一人分行天下癸卯以戶部郎中韓洄爲諫議大夫以涇原節度使段秀實爲司農卿已酉貶尚書左僕射劉晏爲忠州刺史癸丑昭義軍節度畱後李抱真爲本道節度使甲寅貶史館修撰禮部侍郎令狐峘郴州司馬右補闕柳冕巴州司戶日本國朝貢癸亥朱泚兼四鎮北庭行軍涇原節度使三月丙寅禮儀使奏東都太廟

闕木主請造詔下議之不決庚午監察御史張著以法冠彈中丞嚴
郢浚陵陽渠匿詔不行削郢官著賜緋魚辛未左散騎常侍翰林學
士張涉放歸田里甲戌以前司農卿庾準爲江陵尹兼御史中丞荆
南節度使癸巳以諫議大夫韓洄爲戶部侍郎判度支時將貶劉晏
罷使名歸尚書省本司今又命洄判度支令金部郎中杜佑權勾當
江淮水陸運使一如劉晏韓滉之則蓋楊炎之排晏也夏四月乙未
朔涇原裨將劉文喜據城叛巳亥地震辛未命江西觀察使崔昭冊
命迴紇可汗戊申以福建觀察使鮑防爲麒麟刺史江西團練觀察使
癸丑上誕日不納中外之貢唯李正巳田悅各獻縑三萬匹詔付度
支妃父王景先駙馬高怡獻金銅像上曰有何功德非吾所爲退還
之壬戌以衡州刺史嗣曹王臯爲潭州刺史湖南團練觀察使御史
中丞元全柔爲杭州刺史五月甲子朔戊辰以太常少卿韋倫爲太
常卿復使吐蕃巳卯右金吾衛大將軍李通爲黔州刺史黔中經略
招討觀察鹽鐵等使湖州刺史常袞爲福建觀察使涇州將劉光國

殺劉文喜降荊州平六月甲午朔中書侍郎同中書門下平章事崔祐甫卒辛丑蔡奉天城加試殿中監劉海賓兼御史中丞封樂平郡王海賓涇州將賞殺劉文喜也乙卯京兆尹源休使迴紇冊武義成功可汗秋七月丁丑罷內出孟蘭盆不命僧爲內道場壬申以鴻臚寺左右威遠營隸金吾己丑忠州刺史劉晏賜自盡八月甲午振武軍使張光晟殺領蕃迴紇首頗突董統等千人收駝馬千餘繒錦十萬匹乃徵光晟歸朝以彭令芳代之乙未河中晉絳觀察使杜亞爲睦州刺史丁未加朱泚中書令餘官使並如故以舒王謨爲涇原節度大使尚書右丞孟皞爲涇州刺史知畱後東棘烏蠻守來朝貢丁巳遙尊上母沈氏曰皇太后戊午以吏部尚書顏真卿爲太子少師依前禮儀使改封嗣舒王藻爲嗣郢王九月戊辰判度支韓洄奏請於商州紅崖冶洛源監置十鑪鑄錢江淮七監每鑄一千費二千文請皆罷從之己卯雷冬十月甲午貶尚書左丞薛邕爲連山尉坐賊也乙巳太子少傅昌化郡王白孝德卒庚寅以睦王述爲奉迎皇太后使

工部尚書喬琳爲副十一月辛酉朔朝集使及貢使見於宣政殿兵興已來四方州府不上計内外不朝會者二十有五年至此始復舊制州府朝集者一百七十三人詔每令分番二人待詔乙丑贈敬暉等五王官又贈張九齡司徒鍾紹京太子太傅戊寅諸王有官者初令出閣就班又出嫁嶽陽等一十縣主皆在諸王院久而未適人者上悉命以禮出降十二月辛卯韋倫使迴與吐蕃宰相論欽明思等五十五人同至獻方物修好也丁酉令詳定國以來將相功臣房玄齡等一百八十七人據功績分爲三等是歲戶部計帳戶總三百八萬五千七十有六賦入一千三百五萬六千七十貫鹽利不在此限二年春正月庚申朔戊辰成德軍節度恒定等州觀察使司空兼太子太傅同中書門下平章事恒州刺史隴西郡王李寶臣卒丙子以汴宋滑毫陳潁泗節度觀察使檢校吏部尚書同平章事李勉爲永平軍節度汴滑陳等州觀察等使以兵部尚書東都留守路嗣恭爲鄭汝陝河陽三城節度東畿觀察等使以宋州刺史劉洽爲宋毫潁

節度使以鄭州隸永平軍自去年十月無雪至甲申方雨雪丁亥檢校戶部尚書張獻恭爲東都畱守以河南尹趙惠伯爲河中尹河中晉絳慈隰都防禦觀察使以前鄭州刺史于頔爲河南尹二月乙未以御史中丞盧杞爲御史大夫京畿觀察使以桂管觀察使李昌巖爲江陵尹兼御史大夫荆南節度等使以前荆南節度使庾準爲左丞甲辰以容州刺史盧嶽爲桂州防禦觀察使乙巳以門下侍郎楊炎爲中書侍郎同中書門下平章事以御史大夫盧杞爲門下侍郎同中書門下平章事丙午以宋亳節度爲宣武軍丁未以御史中丞裴高爲京畿觀察使乙卯振武軍亂殺其帥彭令芳監軍劉惠光三月庚申朔築汴州城初大曆中李正巳有淄青齊海登萊沂密德棣曹濮兗鄆十五州之地李寶臣有恒定易趙深冀滄七州之地田承嗣有魏博相衛洛貝澶七州之地梁崇義有襄鄧均房復郢六州之地各聚兵數萬始因叛亂得位雖朝廷寵待加恩心猶疑貳皆連衡盤結以自固朝廷增一城浚一池便飛語有辭而諸盜完城繕甲略無

寧日至是田悅初稟命劉文喜殄除群兇震懼又奏計者還都無賜
與旣歸皆構怨言先是汴州以城隘不容衆請廣之至是築城正已
田悅移兵於境爲備故詔分汴宋滑爲三節度移京西防秋兵九萬
二千人以鎮關東又於偃城置潁州辛巳以汾州刺史王相爲振武
軍使東中二受降城鎮北綏銀麟勝等州畱後以萬年令崔漢衡爲
殿中少監使吐蕃夏四月巳酉朔省沔州庚寅襄州梁崇義兼同中
書門下平章事巳亥省燕州順化州乙卯併平琴州爲黨州丁巳貶
禮部侍郎于召桂州刺史御史中丞袁高韶州長史五月丙寅以軍
興十一而稅已巳以淮寧軍節度使李希烈充漢南北諸道都知兵
馬招撫處置等使封南平王庚寅以浙江西道爲鎮海軍加蘇州刺
史韓滉檢校禮部尚書潤州刺史充鎮海軍節度使浙江東西道觀
察等使以御史中丞一官爲理匭使諫議大夫一員知匭使給事中
中書舍人爲監考使辛丑尚父中書令汾陽郡王郭子儀薨丙午以
檢校秘書少監鄭叔則爲御史中丞東都畿觀察使壬子以懷鄭河

陽節度副使李芄為河陽三城懷州節度使仍割東畿五縣隸焉秋七月戊子朔詔曰二庭四鎮統任西夏五十七蕃十姓部落國朝以來相奉率職自關隴失守東西阻絕忠義之徒泣血相守慎固封略奉遵禮教皆侯伯守將交修共理之所致也伊西北庭節度觀察使李元忠可北庭大都護四鎮節度畱後郭昕為安西大都護四鎮節度觀察使自河隴陷虜伊西北庭為蕃戎所隔間者李嗣業荔非元禮孫志直馬磷輩皆遙領其節度使名初李元忠郭昕為伊西北庭畱後隔絕之後不知存亡至是遣使歷迴紇諸蕃入奏方知音信上嘉之其伊西北庭將士叙官仍超七資庚申以中書侍郎平章事楊炎為左僕射以前永平軍節度使張鎰為中書侍郎同中書門下平章事司空淮陽郡王侯希逸卒丁丑以河中尹關播為給事中同州刺史李承為河中尹晉絳都防禦觀察使辛巳以邠寧節度使李懷光兼靈州大都督單于鎮北大都護朔方節度使以鄜坊丹延觀察畱後李建徽為坊州刺史鄜坊丹延都團練觀察使壬午以幽州隴

右節度使中書令朱泚爲大尉田悅攻寇臨洛守將張仵城守八月
辛卯平盧淄青節度觀察使司徒太子太保同中書門下平章事李
正己卒庚戌以中書舍人衛晏爲御史中丞京畿觀察使壬子淮寧
軍節度使李希烈攻襄陽誅梁崇義斬其同惡三十餘人九月辛酉
以易州刺史張孝忠爲恒州刺史充成德軍節度觀察使壬戌加李
希烈同中書門下平章事癸亥兵部尚書翼國公路嗣恭卒甲子以
晉絳觀察使李承爲襄州刺史山南節度觀察等使戊辰以杭州刺
史元全柔爲黔中經略招討觀察等使冬十一月乙酉尚書左僕射
楊炎貶崖州司馬尋賜死戊申加宣武軍節度使劉洽御史大夫徐
州刺史李洧棄其帥李納以州來降十一月辛未宣武節度劉洽與
神策將曲環大破李納之衆於徐州己巳詔成德軍節度都知兵馬
使恒州刺史龔高麗朝鮮郡王李惟岳以其父寶臣有忠勞於王室
惟岳墮父業茂棄國恩緣經之中擅掌戎務外結兇黨並固姦謀
不孝不忠宜肆原野削爾在身官爵乙亥貶戶部侍郎判度支韓洄

蜀州刺史以江淮轉運使度支郎中杜佑代判度支戶部事丁丑以陝州長史李齊爲河中尹充河中晉絳防禦觀察使以商州刺史姚明敷爲陝州長史本州防禦陸運使以權鹽鐵使戶部郎中包佶充江淮水陸運使李納將海州刺史王涉以州降十二月庚寅河中節度使馬燧檢校左僕射澤潞節度使李抱真檢校兵部尚書賞破田悅之功也丙申太子賓客王縉卒

三年春正月乙卯朔丙寅幽州節度使朱滔張孝忠破李惟嶽之兵於東鹿辛未詔供御及太子諸王常膳有司宜減省之於是宰臣上言減堂廚百官月俸請三分省一以助軍從之庚辰追封皇叔僖爲宋王贈皇弟選荆王閏月丙申以文宣王三十七代孫齊賢爲兗州司功襲文宣公辛丑復置具負簿甲辰成德軍兵馬使王武俊殺李惟嶽傳首京師庚戌馬燧李抱真李芄破兵於恒水進攻魏州二月戊午惟嶽將定州刺史楊政義以州降加朱滔檢校司徒以張孝忠檢校兵部尚書易定滄三州節度使以檢校太子賓客王武俊檢校秘書

監恒州刺史恒異都團練觀察使康日知爲趙州刺史深趙都團練
觀察使三月丁亥贈故衛尉卿顏杲卿司徒故常山太守袁履謙左
散騎常故許州長史龐堅右散騎常侍故鞏縣主簿蔣清禮部侍郎
贈故驍衛將軍代國公安金藏兵部尚書授其子承恩廬州長史乙
未以徐州刺史李洧爲徐沂海團練觀察使戊戌田悅洛州刺史田
昂以城降以嶺南節度使張伯儀檢校兵部尚書兼江陵尹御史大
夫荊南節度等使以容管經略使元琇爲廣州刺史嶺南節度使丙
午貶京兆尹盧慈爲撫州長史夏四月李納守德州將王士真守棣
州將李長卿皆以城降庚申先陷蕃僧尼將士八百人自吐蕃而還
壬戌封朱滔爲通義郡王朱滔王武俊與田悅合從而叛太常博士
韋都賓陳京以軍興庸調不給請借京城富商錢大率每商畱萬貫
餘並入官不一二十大商則國用濟矣判度支杜佑曰今諸道用兵
月費度支錢一百餘萬貫若獲五百萬貫纔可支給數月甲子詔京
兆尹長安萬年令大索京畿富商刑法嚴峻長安令薛莘荷杖乘車

於坊市搜索人不勝鞭笞乃至自縊京師囂然如被盜賊搜括既畢計其所得纔八十萬貫少尹韋稹又取餽櫃質庫法拷索之纔及二百萬丁丑彭王傳徐浩卒贈太子少師戊寅以中書侍郎平章事張鎰兼鳳翔尹隴右節度使以代朱泚加泚實封五百戶賜竇氏名園涇水上腴田及錦綵金銀器以安其意時滔叛故也壬午貶御史大夫嚴郢爲費州長史杖殺左廵使殿中侍御史鄭詹尹歲餘卒五月丙戌增兩稅鹽權錢兩稅每貫增二百鹽每斛增一百丁亥貶太子詹事邵說歸州刺史卒於貶所辛卯詔旃節度使李懷光率神策及朔方軍東討丙申詔故伊西北庭節度使楊休明故河西節度使周鼎故西州刺史李琇璋故瓜州刺史張銑等寄崇方鎮時屬殷憂固守西陲以抗戎虜歿身異域多歷歲年以迨 于茲旅櫬方旋誠深追悼宜加寵贈以貴幽泉休明可贈司徒鼎贈太保琇璋贈戶部尚書銑贈兵部侍郎皆隴右牧守至德已來陷吐蕃而歿故至是西蕃通和方得歸葬也丁酉加河湟節度使檢校左僕射馬燧同平章事

澤潞李抱真檢校右僕射河陽李芑檢校兵部尚書神策營招討使
李晟右散騎常侍賞破田悅功也乙巳貶戶部侍郎判度支杜佑爲
蘇州刺史以中書舍人趙贊爲戶部侍郎判度支辛亥易定節度賜
名義武軍六月丁巳尚書左丞庾準卒甲子京師地震以左散騎常
侍李涵爲入迴紇弔祭使京兆少尹源休爲光祿卿戊寅以前衢州刺
史趙洎爲尚書左丞右庶子柳載爲右丞辛未朱滔王武俊兵救田
悅至魏州北是日李懷光兵亦至馬燧抱真李芑等盛軍容迓懷光
朱滔等慮其掩襲遽出兵懷光與之接戰於連籬山之西王師不利各
還營壘賊乃壅河決水絕我糧道秋七月甲申以前振武軍使王翃
爲京兆尹以兵部郎中楊眞爲御史中丞京畿觀察使以括率商戶
人情不安癸巳詔除已收納入庫外一切停已貯納者仍明置簿曆
各給文牒後准元數却還甲午以前同州刺史蕭復爲兵部侍郎庚
子馬燧李懷光李抱真李芑等四節度兵退保魏橋朱滔王武俊田
悅之衆亦屯於魏橋東南與官軍隔河對壘自五月不雨甲辰始雨

宣武節度李勉爲檢校司徒懷寧李希烈檢校司空亦寧李懷光同
平章事李芄封開陽郡王八月丁未初分置汴東西水陸運兩稅鹽
鐵事從戶部侍郎判度支趙贊奏也戊午太子賓客第五琦卒華西
辛酉以涇原節度畱後姚令言爲涇原節度使戊辰以江淮鹽鐵使
太常少卿包佶爲汴東水陸運兩稅鹽鐵使己巳加劔南西川節度
使張延賞檢校吏部尚書甲戌以大理少卿崔縱爲汴西水運兩稅
鹽鐵使丁丑以禮儀使太子少師顏真卿爲太子太師庚辰徐海沂
都團練使李洧卒江淮訛言有毛人捕人食其心人情大恐九月丁
亥以李洧部將高承宗爲徐州刺史徐海沂都團練使判度支趙贊
上言請爲兩都江陵成都揚汴蘇洪等州署常平輕重本錢上至百
萬貫下至十萬貫收貯斛斛匹段絲麻候貴則下價出賣賤則加估
收糴權輕重以利民從之贊乃於諸道津要置吏稅商貨每貫稅二
十文竹木茶漆皆什一稅以充常平之本己亥夜有猛獸入宣陽里傷
二人詰朝獲之冬十月辛亥以湖南觀察使嗣曹王臯爲洪州刺史

江西節度使丙辰以吏部侍郎關播爲中書侍郎同平章事都官員外郎樊澤使吐蕃迴與蕃相尚結贊約來年正月望日會盟清水丙子肅王祥薨十一月己卯以淮南節度使賈耽檢校工部尚書兼襄州刺史御史大夫山南東道節度使以興鳳團練使嚴震爲梁州刺史山南西道節度使甲午以前山南東道節度使李承爲潭州刺史湖南觀察使是月朱滔田悅王武俊於魏縣軍壘各相推獎僭稱王號滔稱大興王武俊稱趙王悅稱魏王又勸李納稱齊王僭署官名如國初親王行臺之制丁丑李希烈自稱天下都元帥太尉建興王與朱滔等四盜膠固爲逆

四年春正月戊寅朔丁亥鳳翔節度使張鎰與吐蕃宰相尚結贊同盟于清水庚寅李希烈陷汝州執州將李元吉而去東都震駭甲午遣顏真卿宣慰李希烈軍戊戌以龍武大將軍哥舒曜爲東都畿汝節度使率鳳翔邠寧涇原等軍東討希烈丙午福建觀察使常袞卒二月戊申於河陽三城置河陽軍節度乙卯哥舒曜收汝州丁丑以工

部侍郎蔣鎮充禮儀使三月己卯復置沔州癸未以左散騎常侍孟
皞爲福建都團練觀察使辛卯嗣曹王臯擊李希烈將陳質之衆敗
之收復黃州丁酉荆南張伯儀與賊戰敗績嗣曹王收復蘄州夏四
月庚申以永平宣武河陽等軍節度都統檢校司徒平章事李勉爲
淮西招討使襄陽帥賈耽江西嗣曹王等爲之副甲子京師地震生
黃白毛長尺餘丙子哥舒曜進軍至隸橋大震雷人死者十之三四
乃退保襄城五月辛巳夜京師地震乙酉潁王璩薨乙巳滑濮二州
黃河清滑州馬生角六月庚戌初稅屋間架除陌錢時馬燧李懷光
李抱真李芄屯魏縣李晟屯易定李勉陳少遊哥舒曜屯懷汝間神
策諸軍皆臨賊境凡諸道之軍出境仰給於度支謂之食出界糧月
費錢一百三十萬貫判度支趙贊巧法聚斂終不能給至是又稅屋
所吏秉筆持筭入人廬舍而抄計峻法繩之愁嘆之聲徧於天下秋
七月甲申以國子祭酒李揆爲禮部侍郎復其爵甲午以李揆爲左
僕射兼御史大夫爲入吐蕃會盟使八月丁未李希烈率衆三萬攻

哥舒曜於襄城湖南觀察使李承辛九月戊寅龍見於汝州之城濠
丙戌李勉將唐漢臣劉德信喪師於扈澗汴軍自此不振東都危急
冬十月丙午詔涇原節度使姚令言率涇原之師救哥舒曜丁未涇
原軍出京城至澧水倒戈謀叛姚令言不能禁上令載繒綵二車遣
晉王往慰諭之亂兵已陣千丹鳳闕下促神策軍拒之無一人至者
與太子諸王妃主百餘人出苑北門右龍武軍使令狐建方教射於
軍中聞難聚射士得四百人扈從其夕至咸陽飯數匕而過戊申至
奉天己酉元帥都虞候渾瑊以子弟家屬至乃以瑊爲行在都虞候
神策軍使白志真爲行在都知兵馬使以令狐建爲中軍鼓角使金
吾將軍侯仲莊爲奉天防城使亂兵旣剽京城屯於白華乃於晉昌
迎朱泚爲帥稱太尉居含元殿上以奉天監欲幸鳳翔壬子鳳翔軍
亂殺節度使張鎰乃止癸丑李希烈陷襄城哥舒曜走洛陽乙卯賜
檢校司空崔寧死丁巳以吏部尚書蕭復刑部侍郎劉從一諫議大
夫姜公輔並以本官同中書門下平章事邠寧節度韓遊瓌與論惟

明率兵三千至纔入奉天賊軍亦至乃出拒之王師不利賊乘勝攻門自卯至午殺傷殆半會有草車在門外渾瑊令焚之賊衆遂退癸巳泚賊三面攻城渾瑊力戰禦之方退大將呂希倩死之賊自丁未攻城至巳巳二十餘日矢石不絕十一月乙亥以隴右節度判官隴州畱後殿中侍御史韋臯爲隴州刺史兼御史大夫奉義軍節度使靈武畱後杜希全鹽州刺史戴休顏夏州刺史常春合兵六千來援至漢谷爲賊所敗而退賊由是攻城愈急矢石雨下死傷者衆人心危蹙上與渾瑊對泣朱泚據乾陵作樂下瞰城中詞多侮慢戊子賊造雲橋攻東北隅兵仗不能及城中憂恐相顧失色渾瑊預爲地道及雲橋成城脚陷不得進瑊命焚之風迴焰轉橋焚而賊退朔方節度李懷光遣兵馬使張詔奉表言大軍將至乃令昇詔巡城叫呼歡聲動地賊不之測疑懼緩攻癸巳懷光軍次醴泉是夜賊解圍而去神策將李晟自定州率師赴難軍於渭橋甲午以商州都虞候王仙鶴權商州防禦使十二月壬戌貶門下侍郎平章事盧杞爲新州司馬

貶行在都知兵馬使白志真爲恩州司馬戶部侍郎判度支趙贊爲
播州司馬癸亥以京兆少尹裴腆判度支甲子以湖南觀察畱後趙
憬爲湖南觀察使乙丑以祠部員外郎陸贄爲考功郎中金部員外
郎吳通微爲職方郎中翰林學士並如故以侍御史吳通玄爲起居
舍人充翰林學士己巳以河中尹李齊運爲宗正卿庚午李希烈陷
汴州以右庶子崔縱爲京兆尹癸酉以中書侍郎平章事關播爲刑
部尚書司封郎中杜黃裳爲給事中命給事中孔巢父淄青宣慰華
州刺史董晉河北宣慰

興元元年春正月癸酉朔上在奉天行宮受朝賀詔曰立政興化必
在推誠忘己濟人不吝改過朕嗣服丕構君臨萬邦失守宗祧越在
草莽不念率德誠莫追於既往永言思咎期有復於將來明徵其義
以示天下小子懼德不嗣罔敢怠荒然以長於深宮之中暗於經國
之務積習易溺居安忘危不知稼穡之艱難不恤征戍之勞苦致澤
靡下究情不上通事旣壅隔人懷疑阻猶昧省己遂用興戎徵師四

方轉餉千里賦車籍馬遠近騷然行賁居送衆庶勞止力役不息田
萊多荒暴令峻於誅求疲民空於行軸轉死溝壑離去鄉里邑里丘
墟人煙斷絕天譴于上而朕不寤人怨于下而朕不知馴致亂階變
起都邑賊臣乘豐肆逆滔天曾莫愧畏敢行凌逼萬品失序九廟震
驚上累于祖宗下負于蒸庶痛心覲面罪實在予永言愧悼若墜泉
谷賴天地降祐人祗協謀將相竭誠爪牙宣力群盜斯屏皇維載張
將弘遠圖必布新令朕晨興夕惕惟省前非乃者公卿百寮用加虛
美以聖神文武之號被蒙暗寡昧之躬固辭不獲俯遂群議昨因內
省良所瞿然自今已後中外書奏不得言聖神文武之號今上元統
曆獻歲發祥宜革紀年之號式敷在宥之澤可大赦天下改建中五
年爲興元元年李希烈田悅王武俊李納咸以勳舊繼守藩維朕撫
馭垂方致其疑懼皆由上失其道而下罹其災一切並與洗滌復其
爵位待之如初仍即遣使宣諭朱滔以泚連坐路遠必不同謀永念
舊勲務存弘貸如能効順亦與惟新朱泚反易天常盜竊名器暴犯

陵寢所不忍言獲罪祖宗朕不敢赦除此外並從原宥應赴奉天并進收京城將士並賜名奉天定難功臣身有過犯減罪三等子孫過犯減罪二等先稅除陌間架等錢竹木茶漆等稅並停奉天昇爲赤縣分命朝臣諸道宣諭以奉天行營都團練使楊惠元檢校工部尚書丙戌以吏部侍郎蕭復爲門下侍郎同平章事以吏部侍郎盧翰爲兵部侍郎同平章事戊子命宰臣蕭復往山南荆南湖南江西嶽鄂浙江東西福建等道宣慰已丑以京兆尹裴腆爲戶部侍郎判度支丙申以山南東道行軍司馬樊澤爲襄州刺史山南東道節度使以渾瑊爲行在都知兵馬使以前趙州觀察使康日知兼同州刺史充奉誠軍節度使辛丑詔六軍各置統軍一員秩從二品左右常侍各加一員太子賓客加四員二月戊寅詔故司農卿張掖王段秀實贈太尉諡曰忠烈賜實封五百戶贈滑州兵馬使賈隱林左僕射以滑州刺史李澄兼汴州刺史汴滑節度使是日李晟自咸陽移兵東渭橋避懷光也晟以懷光反狀已明請上幸蜀王武俊効順加中書

門下平章事兼幽州節度使令討朱滔吐蕃遣使來朝請以兵助國討逆乃令御史大夫于頔入蕃宣諭之甲子加李懷光太尉仍賜鐵券赦三死罪懷光怒曰凡人臣反逆乃賜鐵券今賜懷光是反必矣乃投之於地上命翰林學士陸贄曉諭之是日人心恐駭懷光奪楊惠元李建徽所將兵惠元被害丁卯車駕幸梁州留戴休顏守奉天以御史中丞齊映爲沿路置頓使李晟大集兵賦以收復爲已任李懷光患之移軍涇陽連朱泚欲同滅晟晟卑詞厚意致書諭之異其感悟懷光頗增愧懼三月甲申以秘書監崔漢衡爲上都畱守右散騎常侍于頔爲京兆尹是日懷光燒營走歸河中其將孟涉段威勇等千人奔歸李晟丙戌以前饒州刺史杜祐爲廣州刺史嶺南節度使加神策節度使李晟兼京畿渭北鄜坊丹延節度觀察使庚寅車駕次城固唐安公主薨上愛女悼惜之甚壬申至梁州丁丑宣武節度使劉洽加同平章事己亥以行在都知兵馬使渾瑊檢校左僕射同平章事靈州大都督充朔方節度使邠寧振武永平奉天行營副

元帥是日詔授李懷光太子太保其餘官職並罷涇州亂牙將田希鑒殺其帥馮河清自稱畱後四月辛丑朔時將士未給春衣上猶夾服漢中早熟左右請御暑服上曰將士未易冬服獨御春衫可乎俄而貢物繼至先給諸軍而始御之壬寅詔奉天隨從將士並賜號元從功臣以邠寧兵馬使韓遊瓌爲邠寧節度使尚書左丞趙涓卒已巳以陝虢防遏使唐珣爲河中尹河中同晉絳節度使御史大夫李齊運兼京兆尹魏博行軍司馬田緒殺其帥田悅詔贈悅太尉以緒爲魏州長史魏博節度觀察使甲寅以諫議大夫平章事姜公輔爲左庶子加劔南節度使張延賞同平章事以前山南東道節度使賈耽爲工部尚書甲子入蕃使左僕射李揆卒於鳳州乙丑渾瑊與吐蕃將論莽羅之衆破賊將韓旻之衆於武功斬首萬級丙寅加李納平章事丁卯義王玘薨五月淮南節度使陳少遊加檢校司徒東川節度使李叔明太子太傅鎮海軍韓滉檢校右僕射癸酉涇王佺薨徐沂海團練使高承宗卒以其子明應知徐州事丙子李抱真王武

俊破朱滔於京城東南斬首三萬級擒僞相朱良祐李俊以獻朱滔遁歸幽州癸未嶽州李兼黔南元全柔桂管盧嶽加御史大夫嶽加中丞庚寅李納上章稟命乃贈李正巳太尉壬辰商州尚可孤破賊於藍田乙未安西四鎮節度使郭昕北庭都護李元忠加左右僕射是夜李晟自渭北移軍於光泰門外賊來薄我軍爭奮擊大敗之蹙入光泰門斬馘數千計賊黨慟哭而入白華戊辰列陣於光泰門外遣騎將史萬頃往神農村開苑墻二百餘步賊樹柵當之我軍爭柵雲合電擊與賊血戰賊黨大敗追擊至白華朱泚姚令言率衆萬餘遁去晟收復京城是日渾瑊與戴休顏亦破賊三千於咸陽韓遊瓌追朱泚於涇州六月庚子朔昇恒州爲大都督府癸卯贈神策兵馬使楊惠元右僕射是日李晟上敕城露布上覽之涕下霑襟涇州田希鑒斬姚令言幽州京士韓旻於彭原斬朱泚並傳首至行在乙巳遣吏部侍郎班宏入京宣諭已酉加李晟司徒兼中書令實封一千戶駱元光尚可孤加檢校左右僕射皆實封五百戶以涇州將田希

鑒爲涇州刺史涇原節度使。癸丑詔以良州爲興元府鄭縣爲赤畿
官名品制視京兆河南百姓給復二年見任官員加兩階耆老與版
授鄭縣令賜緋加興元尹嚴震檢校右僕射賜實封一百戶加渾瑊
侍中實封八百戶韓遊瓌檢校左僕射實封四百戶戴休顏檢校右
僕射實封二百戶考功郎中知制誥陸贄司封郎中知制誥吉中孚
並爲諫議大夫水部員外郎顧少連爲禮部郎中並依前充翰林學士
行在左右廂兵馬使令狐建時常春並加散騎常侍丙辰斬僞相李
忠臣籍沒其家李晟奏受賊僞署同惡抵法之家所沒財物牛馬奴
婢請以賞軍士從之戊午車駕還京發興元是日大雨及入斜谷晴
霽從官將士懽然以爲天助秋七月丙子車駕次鳳翔府詔放管内
今年秋稅耆壽侍老八十已上各與版授刺史賜紫其餘版授上佐
賜緋府縣置頓官考滿日放選受僞署官喬琳蔣鎮張光晟李通蔣
鑑伏誅朱泚害郡王王子王孫七十七人於馬璘宅丁丑令所司具
凶禮收殮於淨域寺庚辰詔李懷光往因職任頗著幹能朕嗣位之

初首加拔擢託爲心膂授以節旄頃歲河朔不寧俾令征討任兼將
相恩極丘山及朱泚猖狂擾亂京邑懷光迴軍赴難宗社再寧保佑
朕躬厥功甚茂故元帥河中之權太尉中書之秩仍加實封爰及宗親
人臣之榮孰可爲比非朕於懷光不厚豈朕報懷光不崇賊寇未除
猜嫌已構受朱泚姦兇之說聽張佖罔惑之言曾不沈思遂生疑阻
交通逆孽殘害忠良朕志在推誠事皆掩覆禮遇轉厚委任益隆懷光
都不改齒愈深不軌勅書慰問將士懷光並不令宣三軍咸欲收城
懷光並不令出自云已共朱泚定約不能更事國家朕以眇身獲承
鴻業務全大計移幸山南倉皇之間備歷危險據其罪狀情實難容
然以解圍奉天其功不細昨又遣男璵謝罪請束身歸朝朕憫其知
過之心念其赴難之効以功贖罪務在優恩今遣給事中孔巢父賁
先授懷光太子太保勅牒往河中宣諭三日內便與懷光同赴上都
如欲冢口同行亦聽懷光自便朕必能保全終始寵待如初朔方將
士嘗立大功子儀再收京城咸是此軍之効昨遠從河朔赴難奉天

逆賊畏威望風奔遁永言勞績朕不暫忘將士各竭忠謀勦迫脅朕
每矧痛心自咎比者君臣阻隔只爲懷光一人懷光旣請入朝尚捨
其罪况諸將士並是功臣各宜坦然勿更憂慮先賜官封一切如舊
壬午至自興元時渾瑊韓遊瓌戴休顏以其衆扈從李晟駱元光尚
可孤以其衆奉迎步騎十餘萬旌旗連亘數十里都民僧道歡呼感
泣李晟見於三橋自陳收城遲晚之咎伏地請罪上慰勞遣之丁亥
河中宣慰使孔巢父中官啖守盈並爲懷光所害辛卯御丹鳳樓大
赦天下賜李晟永崇里第女樂八人甲午命宰臣諸將送晟入新賜
第教坊樂京兆府供帳食饌鼓吹導從京城以爲榮觀八月辛丑詔
所司爲贈太尉段秀實樹碑立廟淄青節度使承前帶陸海運押新
羅渤海兩蕃等使宜令李納兼之癸卯加司徒中書令合川郡王李
晟兼鳳翔尹充鳳翔隴右節度等使涇原四鎮北庭行營兵馬副元
帥改封西平郡王河東保寧軍節度使太原尹北都畱守檢校司徒
平章事北平郡王馬燧爲奉誠軍晉絳慈隰節度行營兵馬副元帥

以靈鹽節度使侍中兼靈州大都督樓煩郡王渾瑊為河中尹晉絳
節度使河中同陝虢等州及管內行營兵馬副元帥改封咸寧郡王
時方命瑊與馬燧各出師討懷光故也甲辰以金吾大將軍杜希全
為靈州大都督西受降城天德軍靈鹽夏節度營田等使以同絳
節度使唐朝臣為鄜坊丹延等州節度使以保義軍節度使鳳翔尹
李楚琳為金吾大將軍以奉義軍節度使隴州刺史韋臯為左金吾
衛大將軍戊申以奉天行營節度戴休顏為左龍武統軍己酉以延
王玢隨王迅西平長公主薨廢朝己未前湖州刺史表高為給事中
九月庚午宗正卿李琬卒賜渾瑊大寧里第并女樂五人詔宰臣諸
將賜樂饋贈如送李晟入第故事壬午贈故右僕射致仕李涵太子
太保乙亥王武俊加檢校司徒李抱真檢校司空並賜實封五百戶
賞破朱滔之功也甲申以前嶺南節度使元琇為戶部侍郎判度支
丁亥上顧謂宰臣曰今大盜雖除時猶多難宜廣延納以達下情近
日諫官都無論奏自今每正衙及延英坐日常令朝臣三兩人面奏

時政得失庶有弘益也是秋螟蝗蔽野草無遺冬十月乙丑馬燧收絳州戊辰令中官竇文場王希遷監左右神策軍都知兵馬使閏月庚午詔朕臨御萬方失於君道兵革不息于今五年閔衆庶之勞悔征伐之事而李希烈蔑義棄德反道虐人朕哀彼生靈陷于塗炭苟存拯物不憚屈身故於歲首特布新令赦其殊死待以至誠使臣纔及於郊圻巨猾已聞其僭竊酷烈滋甚吞噬無狀將相大臣咸懷憤激繼陳章疏固請討除朕以所行天誅本去人害兵戈旣接玉石難分言念勲臣橫遭脅制雖思改革厥路無由受汚終身嚙冤沒代淪胥以逞誠可痛傷豈孽自一夫而毒流萬姓爲人父母寧不愧懷宜令諸道節度使明行曉諭罪止元兇脇制之徒一切不問唐朝臣奏收永樂縣癸酉以右龍武大將軍李觀爲涇州刺史涇原節度使乙亥詔宋毫淄青澤潞河東恒冀幽易定魏博等八節度螟蝗爲害蒸民饑饉每節度賜米五萬石河陽東畿各賜三萬石所司般運於楚州分付丁丑李晟至涇州誅節度使田希鑒罪其殺馮河清也戊

子希烈將李澄以滑州歸國甲午以李澄爲汴州刺史汴滑節度使封武威郡王神策行營節度使檢校尚書右僕射馮翊郡王尚可孤卒十一月癸卯宋亳節度使劉洽與曲環破希烈之衆於陳州俘斬三萬級生擒賊將翟崇暉以獻戊午劉洽大破希烈之衆擒其僞相鄭賁等五人以獻希烈遁歸蔡州汴州平乙丑宰相蕭復三上章乞罷免許之十二月乙亥淮南節度使檢校司空平章事陳少遊卒贈蕭定太子太師以壽州刺史張建封爲濠壽都團練使庚辰以刑部侍郎杜亞爲揚州長史淮南節度使戊子以吏部郎中崔造爲給事中辛卯以諫議大夫陸贄爲中書舍人依前翰林學士詔翰林學士朝服班序宜同諸司官知制誥例

貞元元年正月丁酉朔御含元殿受朝賀禮畢宣制大赦天下改元貞元戊戌大風雪寒去秋螟蝗冬旱至是雪寒甚民饑凍死者踣於路丁未以饒州刺史盧綦爲福州刺史福建觀察使癸丑始聞太子太師魯郡王顏真卿爲希烈所害追贈司徒廢朝五日謚曰文忠仍

特授男顏碩等官壬戌以吉州長史盧杞爲澧州別駕尋卒二月丙寅朔遣工部尚書賈耽侍郎劉太真分往東都兩河宣慰河南河北饑米斛千錢癸未李抱真嚴振來朝寒食節上與諸將擊鞠於內殿丙戌以檢校秘書監金良相爲檢校太尉使持節大都督雞林州刺史寧海軍使襲封新羅王辛卯大雨三月丙申朔以蜀州刺史韓洄爲兵部侍郎以汴東水陸運等使左庶子包佶爲刑部侍郎辛丑戶部侍郎判度支元琇兼諸道水陸運使丁未李希烈陷南陽殺首將黃金嶽甲寅詔宰臣宣諭御史今後上封彈奏人自陳論不得群署章疏戊午宣武帥劉洽檢校司空以汴滑節度使李澄爲滑州刺史充鄭滑節度使加李納司空夏四月乙丑朔晉王誼改封舒王癸酉鄂嶽觀察使李謙爲洪州刺史江西都團練觀察使丁丑以江西節度使嗣曹王臯爲江陵尹荆南節度使己卯改滑州永平軍名曰義成江陵度支院失火燒租賦錢穀百餘萬時關東大饑賦調不入由是國用益窘關中饑民蒸蝗蟲而食之汴帥劉洽賜名玄佐五月癸

卯分命朝臣禱羣神以祈雨蝗自海而至飛蔽天每下則草木及畜
毛無復孑遺穀價騰踊辛酉以河陽都知兵馬使雍希顏爲河陽懷
都團練使六月丙子以兵部侍郎韓洄爲京兆尹辛巳劉玄佐兼汴
州刺史壬午以工部尚書賈耽兼御史大夫東都畱守都畿汝州防
禦使以汴州刺史薛珏爲河南尹辛卯以左金吾衛大將軍韋臯檢
校戶部尚書兼成都尹御史大夫劔南西川節度觀察使以國子祭
酒董晉爲左金吾衛大將軍幽州朱滔卒贈司徒秋七月甲午朔河
東節度使馬燧自河中行營來朝庚子大風拔樹辛丑以左散騎常
侍李泌爲陝州長史陝虢都防禦觀察陸運使丙午以鎮海軍浙江東
西道節度使韓滉檢校尚書左僕射同平章事江淮轉運使以河南
尹薛珏爲河南水陸運使戊申馬燧還行營辛亥加檢校工部尚書
王士真爲德棣都團練觀察使壬子以前涿州刺史兼御史中丞劉
怱爲幽州御史大夫幽州盧龍節度副大長史兼使知節度管理度
支營田觀察押奚契丹經略盧龍等軍使丁巳以左散騎常侍柳渾

爲兵部侍郎庚申以諫議大夫高叅爲中書舍人關中蝗食草木都
盡旱甚灞水將竭井多無水有司計度支錢穀纔可支七旬甲子詔
夫人事失於下則天變形於上咎徵之作必有由然自頃已來災沴
仍集雨澤不降綿歷三時蟲蝗繼臻彌亘千里菽粟翔貴稼穡枯瘁
嗷嗷蒸人聚泣田畝興言及此實切痛傷徧祈百神曾不獲應方悟
禱祠非救災之術言詞非謝譴之誠憂心如焚深自刻責得非刑法
舛繆忠良鬱湮暴賦未蠲勞師靡息事或無益而重爲煩費任或非
當而橫肆侵蝕有一於茲足傷和氣本其所以罪實在予萬姓何辜
重罹饑殍所宜出次貶食節用緩刑側身增脩以謹天戒朕自今視
朝不御正殿有司供膳並宜減省不急之務一切停罷除諸軍將士
外應食糧人諸色用度本司本使長官商量減罷以救兇荒俟歲豐
登即令復舊甲子李懷光大將尉珪以焦離堡降丁卯懷光將徐連光
以長春宮兵六千人降甲戌朔方大將牛名俊斬李懷光傳首闕下
馬燧收復河中丁丑始雨已卯詔朕誠信未著撫御失宜致使功臣

唐紀五十一
陷於誅戮謂之克敵能不愧心然以懷光一家在法無捨念其昔居將相嘗寄腹心罪雖挂於刑書功已藏於王府以干紀之迹固合滅身以赴難之勲所宜有後宜以懷光男一人爲嗣賜莊宅各一區仍還懷光屍首任其收葬懷光妻諸兒女遞送澧州委李臯逐便安置使得存立其出嫁女諸親並釋放陷賊將士一切並與洗雪河中絳百姓給復一年北平王馬燧咸寧王渾瑊並與一子五品正貲官燧可侍中瑊可檢校司空駱元光韓遊瓌唐朝臣各賜實封二百戶與一子六品正貲官昨河中行營將士共賜二十萬端匹以充宴賞放歸本道新除中書侍郎平章事張延賞爲尚書左僕射時宰相劉從一病詔徵延賞李晟與延賞有隙自鳳翔上表論之延賞罷鎮西川還行至興元改授左僕射戊子前河陽節度使檢校尚書左僕射開封郡王李芑卒九月己亥幽州節度劉怱病請以子濟權知軍州事從之癸卯以牛名俊爲丹州刺史御史大夫崔縱奏准制勘會内外官直商量併省停減詳議聞奏者伏以兵戎未息仕進頗多在官者

既合序遷有功者又頒褒賞比來每至選集不免據闕畱人嘗難遺才仍招怨望況有恩詔甄錄功勞諸道叙優人數甚廣見湏處置不可稽畱今若停減吏員實恐未便於事非但成優者無官可授抑又叙進者無路可容本冀使人翻成歎怨事仍舊貫以適時宜更待事平然後經度制從之乙巳上御正殿策賢良方正能直言極諫等三科舉人辛亥宰相劉從一以疾辭任授戶部尚書庚申劉從一卒幽州節度使劉怱卒辛巳以權知幽州盧龍軍府事劉濟爲幽州長史兼御史大夫幽州盧龍節度觀察押奚契丹兩蕃等使丙戌渾瑊自河中來朝十一月癸巳朔山南嚴震來朝癸卯上親祀昊天上帝於真丘時河中渾瑊澤潞李抱真山南嚴震同華駱元光邠寧韓遊瓌鄜坊唐朝臣奉誠康日知等大將侍祠郊壇畢還宮御丹鳳樓大赦天下丁丑詔文武常叅官共賜錢七百萬貫以歲凶穀貴衣冠窘乏故也十二月戊辰詔延英視事日令常叅官七人引對陳時政得失自是群官互進有不達理道者因多詆訐不適事宜上亦優容遣之

二年春正月壬辰朔以歲饑罷元會禮也丙申詔以民饑御膳之費減半官人月共糧米都一千五百石飛龍馬減半料臺郎御史與兼官出爲畿赤令庚子大雪平地尺餘壬寅以散騎常侍劉滋給事中崔造中書舍人齊映並守本官同中書門下平章事門下侍郎平章事盧翰爲太子賓客丁未以禮部侍郎鮑防爲京兆尹京兆尹韓洄爲刑部侍郎國子祭酒包佶知禮部貢舉以江陵少尹李復爲容州刺史本管經略使癸丑以御史大夫崔縱爲吏部侍郎諫議大夫知制誥翰林學士吉中孚爲戶部侍郎判度支兩稅元琇判諸道鹽鐵榷酒詔宰相齊映判兵部李勉判刑部劉滋判吏部禮部崔造判戶部工部甲寅詔天下兩稅錢物委本道觀察使刺史差人送上都其先置諸道水陸轉運使及度支廵院江淮轉運等使並停時崔造專政改易錢穀職事多隳敗造尋以憂病歸第二月癸亥山南樊澤奏破希烈將杜文朝之衆五千擒文朝以獻乙丑鹿入含元殿衛士執之甲戌戶部侍郎元琇爲尚書左丞京兆少尹李竦爲戶部侍郎判

鹽鐵榷酒三月壬寅滑州李澄奏破希烈之衆於鄭州乙巳以司農卿李模爲黔中觀察使四月丙寅淮西李希烈爲其牙將陳仙奇所酖并誅其妻子仙奇以淮西歸順戊辰以前黔中觀察使元全柔爲湖南觀察使辛巳陝州觀察使李泌奏盧氏山冶出瑟瑟請禁以充貢奉上曰瑟瑟不產中土有則與民共之任人採取甲申詔以淮西牙將陳仙奇爲蔡州刺史淮西節度使都統劉玄佐李澄曲環李臯賁耽張建封各與一子正貢官賞平淮蔡功也丁未以劔南東川節度使李叔明爲太子太傅以東川兵馬使王叔邕爲梓州刺史劔南東川節度使五月丙申自癸巳大雨至於茲日饑民俟夏麥將登又此霖澍人心甚恐米斛復千錢丁酉以伊西北庭節度畱後楊襲古爲北庭大都護伊西北庭節度度支管田翰海等使已亥百寮請上復常膳是時民久饑困食新麥過多死者甚衆伊西北庭節度使李元忠卒贈司空辛酉大風雨街陌水深數尺人有溺死者癸未橫海軍使滄州刺史程日華卒以其子懷直權知軍州事秋七月戊子黔中

觀察使理所復在黔州辛卯以開州別駕白志真爲果州刺史乙未
福建觀察盧慈卒己酉以虔王諒爲申光隨蔡節度大使以淮西兵
馬使吳少誠爲蔡州刺史知節度畱後加東都畱守賈耽東都畿唐
汝鄧都防禦觀察使以隴右行營節度使曲環爲陳許節度使戊午
以鄜坊節度唐朝臣爲單于大都護振武綏銀節度使右金吾大將
軍論惟明爲鄜州刺史鄜坊都防禦觀察使己巳以金吾大將軍董
晉爲尚書右丞庚辰右散騎常侍蔣沈卒丙戌吐蕃寇涇隴邠寧諸
鎮守閉壁自固京師戒嚴遣河中節度駱元光鎮咸陽九月詔左右
金吾及十六衛將軍故事皆擇勲臣出鎮方隅入居侍從自天寶艱
難之後衛兵雖然廢闕將軍品秩尤高此誠文武勲臣出入轉遷之
地宜增祿秩以示優崇並宜加給料錢及隨身糧課仍舉故事置武
班朝叅其廊下食亦宜加給其十六衛各置上將軍一人秩從二品
左右金吾上將軍俸料次於六統軍支給欲求致理必藉兼才文武
遞遷不全限隔自今内外文武缺官於文武班中量才望相叅叙用

仍依故事於本衛量置衛兵所司條件以聞丁酉義成軍節度鄭滑
觀察等使檢校尚書左僕射滑州刺史武威郡王李澄卒以東都畿
唐鄧汝等防禦觀察使賈耽檢校尚書右僕射兼滑州刺史義成軍
節度鄭滑等州觀察使戍戍以吏部侍郎崔縱檢校禮部尚書東都
畱守東都畿唐鄧汝防禦觀察使已亥勅左右衛上將軍大將軍並
於衙內宿乙巳吐蕃寇好時京師戒嚴李晟部將王似擊吐蕃於汴
陽城敗其中軍辛亥寇鳳翔李晟出師禦之一夕而退冬十月壬午
奏關內河中河南等道秋夏兩稅青苗等錢悉折納粟麥兼加估收
糴以便民從之是月李晟破吐蕃摧沙堡十一月甲午冊淑妃王氏
爲皇后乙未兩浙節度使韓滉來朝丁酉冊皇后王氏是日后崩諡
曰昭德辛丑吐蕃陷鹽州壬寅劉玄佐曲環鄂嶽盧玄卿並來朝十
二月丁巳以韓滉兼度支諸道鹽鐵轉運使吐蕃陷夏州又陷銀州
庚申以給事中同平章事崔造爲右庶子貶尚書右丞度支元琇爲
雷州司戶爲韓滉誣奏人以爲非罪諫官屢論之辛未鳳翔李晟來

朝王申京城畿內推酒每斗推錢一百五十文蠲酒戶差役從度支奏也

三年春正月丙戌朔壬寅以左僕射張延賞同中書門下平章事乙巳禮部侍郎薛播卒辛亥以戶部侍郎李竦爲鄂嶽觀察使壬子以兵部侍郎柳渾同中書門下平章事劉滋守本官罷知政事中書舍人平章事齊映貶蔓州刺史戊寅度支鹽鐵轉運使鎮海軍節度浙江東西道觀察等使檢校左僕射同中書門下平章事晉國公韓滉卒贈太傅以果州刺史白志真爲潤州刺史兼御史大夫浙西觀察使宣州刺史皇甫政爲越州刺史浙東觀察使三月庚寅詔今年朝集使宜停丙午鳳翔隴右元帥副兵馬使吳玠爲福建觀察使鳳翔都虞候邢君牙爲鳳翔尹本府團練使丁未制鳳翔隴右涇原四鎮北庭管內兵馬副元帥鳳翔隴右道節度使奉天靖難功臣司徒兼中書令鳳翔尹上柱國西平郡王食實封一千五百戶李晟可太尉兼中書令庚戌以晟甥元帥兵馬使王泌爲右威衛上將軍辛亥河東

馬燧來朝時蕃相尚結贊使大將論頰熱卑辭厚意告馬燧請兩國
同盟和好上疑其不誠不允故燧自將論頰熱入朝盛言蕃相請盟
可以保信上乃從之許盟于平涼夏四月庚申詔蕃寇雖退疆理猶
虞安邊之策必有良筭宜令常叅官各陳邊事隨所見封進以聞入
蕃使崔翰奏於蕃中誘問給役者求蕃國人馬真數云凡五萬九千
餘人馬八萬六千匹可戰者僅三萬人餘悉老幼庚午御麟德殿試
定難樂曲馬燧所獻五月丁亥以侍中渾瑊爲吐蕃清水會盟使兵
部尚書崔漢衡副之瑊與駱元光率師二萬往會盟所丁酉以左丞
暢悅爲湖南觀察使戊戌左右神策左右龍武各加將軍一員丙午
以嶺南節度使杜祐爲尚書右丞以容管經略使李復爲廣州刺史
嶺南節度使蕃相尚結贊請改會盟之所於原州之土梨樹神策將
馬有麟奏土梨地多險阨恐蕃軍隱伏不如平涼川其地坦平又近
涇州乃改盟於平涼川十月東都河南江陵汴州揚州大水漂民廬
舍閏月乙卯以國子司業裴胄爲潭州刺史湖南觀察使戊午陝虢

李泌獻瑞麥一莖五穗庚申詔省州縣官員上州畱上佐錄事參軍司戶司士各一員中州上佐錄事參軍司戶司兵各一員下州上佐錄事司戶各一員京兆河南兩府司錄判司及四赤丞簿尉量畱一半諸赤畿縣畱令丞尉各一員時宰相張延賞請減官收俸料以助軍討吐蕃故也壬戌日有黑暈自辰及申方散癸亥以荆南節度使檢校戶部尚書嗣曹王臯爲襄州刺史山南東道節度使襄鄧郢安隨唐等州觀察使以山南東道節度使樊澤爲江陵尹荆南節度使辛未侍中渾瑊與吐蕃宰相尚結贊同盟于平涼爲蕃兵所劫瑊狼狽遁而獲免崔漢衡已下將吏陷沒者六十餘人癸酉遣使齎書以讓結贊蕃界不受戊寅枉矢墜于虛危辛巳以少府監盧嶽爲陝虢觀察使是月太白晝見凡四十餘日六月丙戌以檢校司徒侍中馬燧爲司徒兼侍中以贊吐蕃之盟失策而罷兵柄也以陝虢觀察使李泌爲中書侍郎平章事以左龍武將軍李自良爲檢校工部尚書太原尹河東節度使乙巳浙西觀察使白志真卒是月吐蕃驅盟夏二州

居民焚其州城而去七月甲寅渾瑊自盟所來素服待罪釋之乙卯詔朕頃緣興師備邊費用不給遂權議減官以務集事近聞授官者皆已隨牒之任扶老携幼盡室而行俸祿未請歸還無所衣冠之弊流寓何依其先勅所減官員並依仍舊初既減員內外咨怨張延賞李泌初入相乃諷諫官論之乃下此詔丙辰平涼陷蕃官員崔漢衡已下各與一子正真官以左羽林大將軍韓潭爲夏州刺史夏綬銀等州節度使壬申賜賂元光姓曰李元諒尚書左僕射同中書門下平章事張延賞薨贈太保癸酉復置吏部小選八月辛巳朔日有蝕之丁亥陷蕃兵部尚書崔漢衡得還己丑以兵部侍郎平章事柳渾爲散騎常侍罷知政事壬申以給事中王緯爲潤州刺史江西觀察使常州刺史劉贇爲宣州刺史宣歙池觀察使戊戌貶前門下侍郎同平章事蕭復爲太子左庶子饒州安置坐宗人位佩儒僖鼎等連郃國長公主姦蠱事也戊辰吐蕃犯塞諸軍戒嚴九月丁巳吐蕃大掠汧陽吳山華亭界民庶徙於安化峽西庚申左庶子崔造卒癸

亥迴紇可汗遣使合闕將軍請昏於我許以盛安公主降之丙寅吐蕃陷華亭又陷涇州之連雲堡甲戌吐蕃退俘掠邠涇隴等州民戶殆盡自是蕃寇常至涇隴冬十月吐蕃修源州城屯據之丁亥太子太傅李叔明卒丙戌神策將魏循上言射生將韓欽緒等十餘人與資敬寺妖僧李廣弘同謀不軌廣弘自言當爲人主約十月十日大舉已署置將相名目詔捕劾之連坐死者百餘人欽緒遊瓌之子特赦之是月復降魚書停刺史務十一月丁丑以湖南觀察使趙憬爲給事中是夜京師地震者三鳥巢散落壬申禁商人不得以口馬兵械市於党項辛丑鄜坊節度使論惟明卒是歲作玄英觀於大明宮北垣

唐書本紀卷第十二